

Ekwo
Sámẹ̀lu
k'ẹ̀bo

Anwùhu Sọlu erwu Dévidi lẹ nchi

¹ TỌbudu iya bụ; Sọlu nwùhuchaephọ; Dévidi shi l'ọgu ono, o gbushiru ndu Amalẹku ono lwa; bya anọo abalị labọ lẹ mkpụkpu Zikulagu. ² O -rwua mbọku ọphu kwe iya ẹto; a bya ele ẹnya; nwoke lanụ, shiwaa l'odu-ọgu Sọlu phẹ rwua; yẹe uwe iya, a gbajashichaaru agbajashi; kporu urwuku kpua onwiya l'ishi. Ọ byapfutaephọ Dévidi; bya adaa kpurumu l'alị gude kwabẹ iya ùbvù. ³ Dévidi jịa ya sụ iya: “?Bụ aweya bẹ i shi?”

Ọ sụ Dévidi: “Mu shikwa l'odu-ọgu ndu Ízurelu gbalaa.”

⁴ Dévidi sụ iya: “?Denu g'ọ nwuru? Jiko kọeshiduru mu iya.”

Ọ sụ Dévidi: “Ndu Ízurelu gbakashihukwaru l'iphu ọgu ono. Ndu ọphu dụ igwerigwe bẹ daru nwùshihu; k'ọphu bụ lẹ Sọlu yẹe nwa iya, bụ Jionatanu bẹ tukuru nwùshihukota.”

⁵ TỌbudu iya bụ; Dévidi bya ajịa nwokorọbya ono, byaru bya akọoru iya iphe ono sụ iya: “?Denu g'i shi maru lẹ Sọlu yẹle nwa iya, bụ Jionatanu bẹ tukuru nwùhuchaa?”

⁶ Nwokorọbya ono, byaru akọoru Dévidi iphe ono sụ: “O nweerupho g'o meru; mu nọdu l'úbvú Gilubowa; Sọlu l'onwiya nọdu l'ẹka ono nmakpuru l'eli arwa iya. Ụgbo-inya ndu ọhogo iya; yẹle ndu agba l'inya ono nọdu achịwa iya kpabẹ kpabẹ. ⁷ No iya; Sọlu bya aghaa ẹnya

l'azú hụma mu; bya araku mu. Mu jĩa ya sụ: “?Bụ gẹ mu mee gụnu?” ⁸ Ọ jĩa mu: “?Bụ onye bẹ ị bụ?” Mu sụ iya lẹ mu bụ onye Amalẹku. ⁹ Ọ sụ mu jiko gẹ mu bya apfụ-kube iya gbua ya; noo kẹle ya nọ ndzụ, Ọnwu ka mma! ¹⁰ Mu jenụ apfụ-kube iya; woru iya gbua; noo kẹle o doru mu ẹnya l'ọ -darwuwa ali bẹ ọ bụwaa iya Ọnwu. Mu bya ekputa iya okpu-eze, o kpu l'ishi; bya agbata iya echi, ọ gba l'ẹka; ọ bụru iya bẹ mu gude wotaru gube nnajịuphu mu l'ẹka-a.”

¹¹ Noo ya; Dévidi yẹle ndu ẹphe l'iya swị ye ẹka l'uwe phe gbajashichaa. ¹² Ẹphe tũko raa ẹkwa; gụa aphụ; swĩa ẹgu jeye l'ụzenyashi l'opfu ẹhu Sọlu; mẹ nwa iya nwoke, bụ Jionatanu; mẹ kẹ ndu ojọgu Chipfu, bụ Ọnu-ulo Ízurẹlu ono, e gude ogu-echi gbushia ono.

¹³ Dévidi bya ajĩa nwokoro bya ono, byaru iya edoru iphe ono sụ iya: “?Ị bụ onye awe?”

Ọ sụ: “Mu bụkwa nwatibe onye Amalẹku, bụ mbyam-bya.”

¹⁴ Dévidi jĩa ya sụ: “?Bụ gụnu bẹ ị tị tsụduru ebvu k'ahali ẹka gbua onye Chipfu wụru manụ l'ishi?”

¹⁵ Dévidi bya ekua onye lanụ l'ụnwokoro bya iya sụ: “Je egbuta nwoke ono tụa!” O je egbuta iya tụa; ọ nwụhu.

¹⁶ Dévidi sụ iya: “G'ọchi ngu tukokwaru ngu l'ishi; noo kẹle i gudewaa Ọnu ngu gbaa onwongu ama sụ l'ọ ngu gburu onye Chipfu wụru manụ l'ishi.”

Dévidi agụ aphụ Sọlu yẹle Jionatanu

¹⁷ Tọbodu iya bụ; Dévidi bya agụa ebvu-aphụ ẹhu Sọlu yẹe nwa iya, bụ Jionatanu; ¹⁸ bya asụ g'e zia ndu Jiuda g'aagụje ebvu-aphụ ono. Ẹpha ebvu ono bụ “apfụ.” Ẹka e deru ebvu ọbu bụ l'ẹkwo Jiasha.

¹⁹ “Ùbvù, ị dụ gube Ízurẹlu bẹ e gbuwaru tọgbo l'eli úbvú!

Gẹ ndu ọkpehu dọ
tùko dabyigbaaru!

²⁰ G'e te pfukwa iya lẹ
mkpukpu Gatu;
Ọphu a rakwa iya arara tsoru
gbororo Ọma mkpukpu
Ashikelonu; a -nonyaa;
ẹhu je atsoahaa unwada
Filisitayinu utso;
mbu a -nonyaa;
unwada ndu ono,
e buduru ubvu ono
tuhaha okoo.

²¹ Unube ubvu ubvu Gilubowa;
g'iji ta akwabaekwa kpua unu;
Ọphu mini edzebaekwaru unu;
Ọphu unu enweekwaru ali,
emehuje iphe.

Noo kele ọo l'eli unu be a no
merwua iphe, ndu ọkpehu dọ
egudeje egbobuta
onwophe l'ogu.

Mbu l'iphe, Sọlu egudeje
egbobuta onwiya l'ogu
be a taa nyibaedu manu.

²² Apfu Jionatanu be ta
akpolajeduru azu g'o to
nmopfuta ẹba ndu ọkpehu dọ;
Ọphu ogu-echi Sọlu
ta alwajeduru l'ebe abu
l'o gburu nemadzu jasuru
o ji iya.

²³ Sọlu waa Jionatanu;

teke unu nọ ndzụ bẹ unu
 shi ama ntụmatu;
 tẹme unu bụru ndu
 e yeru obu.

Ọphu unu ekekahaduru
 ekekahaa jasụ l'ọnwu.

Unu shi ka ugo eme barabara;
 tẹme unu shikwaphọ ka
 oduma ọkpehu.

²⁴ Unubẹ unwada Ízurẹlu;
 unu kwaa ẹkwa Sọlu;
 mbụ onye ono,
 yeru unu uwe uswe-uswe,
 ama mma onọ;
 onye ono, gude
 mkpọla-ododo
 memashịa uwe,
 unu yeru l'ẹhu ememashị ono.

²⁵ Lewarọ gẹ ndu ọkpehu dụ
 dabyigbaaru l'ẹka ẹphe
 larụ l'ọgu!

L'eli úbvú bẹ e gburu
 Jionatanu tọgbo.

²⁶ Mu agụ aphụ ẹhu ngu;
 nwune mu Jionatanu.

I shi bụnukaru mu onye vu
 oke aswa.

N-yemobu, i shi yee mu bẹ
 dukwa biribiri.

Ọ ka n-yemobu k'unwanyi
 adụ biribiri.

²⁷ Lewarọ gẹ ndu ọkpehu
 dabyigbaaru!

Ngwọgu, eegudeje alwụ ọgu

bukotawa ọ̀la-l'iswi!”

2

Echi Dévidi eze ndu Jiuda

¹ Tòbudu iya bụ; e mechaa; Dévidi je akpata Chipfu ishi; sù: “?Bù gẹ̀ mu tũgbua lashĩa mkpũkpu lanù lẹ̀ Jiuda?” Chipfu sù iya: “Ngwanù!”

Dévidi jĩa ya sù: “?Bù aweya bẹ̀ mu a-la?”

Chipfu sù iya: “Lashinaa Hẹ̀buronu!” ² Ọ̀o ya bụ; Dévidi lashĩa ẹ̀ka ono; yẹ̀le unyomu iya ẹ̀phenebo; mbù Ahinowamu kẹ̀ Jiezerẹ̀lu; waa Abigelu kẹ̀ Kamẹ̀lu, bụ nwanỳi ono, ji ya, bụ Nebalù anọ̀edu ono. ³ Dévidi bya achitakwapho unwoke yẹ̀e ya swi; onyenọ̀nu duta ndibe iya; ẹ̀phe je eburu lẹ̀ mkpũkpu Hẹ̀buronu waa mkpũkpu lẹ̀ mkpũkpu, nọ̀gbaa ya nù. ⁴ Ọ̀o ya bụ; ndu Jiuda byatashĩa Hẹ̀buronu. Ọ̀ bũru l'ẹ̀ka ono bẹ̀ ẹ̀phe nọ̀ wuà Dévidi manù l'ishi g'ọ̀ bũru eze ndu ọ̀nu-ùlo Jiuda.

A bya epfuaru Dévidi l'ọ̀o ndu Jiabẹ̀shi-Giladu bẹ̀ liru Sọ̀lu. ⁵ Dévidi bya ezia ndu oozije ozi g'ẹ̀phe je ezia unwoke mkpũkpu Jiabẹ̀shi-Giladu sù phẹ̀: “Gẹ̀ Chipfu gọ̀ru ọ̀nu-ọ̀ma nù unu k'ùbvù ono, unu kwabẹ̀ru Sọ̀lu, bụ nnajìuphu unu; woru iya lia ono. ⁶ Gẹ̀ Chipfu goshikwa unu n-yemobu ọ̀maa ya; goshikwaphọ unu lẹ̀ ya gbaru g'e gude ire iya ẹ̀ka l'opfu ẹ̀hu unu! Mbẹ̀dua, bụ Dévidi l'onwomu e-mekwarupho unu iphe-ọ̀ma eshi ọ̀phu unu meru ẹ̀gube iphe-a. ⁷ Ọ̀o ya bụ; g'ẹ̀ka shihukwa unu ike; unu abũru ndu ike dũ; noo kẹ̀le nnajìuphu unu, bụ Sọ̀lu bẹ̀ nwũhuwaru nù; ndu ọ̀nu-ùlo Jiuda wũwa mu manù l'ishi gẹ̀ mu bũru eze phẹ̀.”

Echi Ishibosheti eze ndu Ízurẹ̀lu

⁸ Ábuna nwa Nẹ̀ru, bụ onye-ishi ndu ojọ̀gu Sọ̀lu bya edufuta nwatibe Sọ̀lu, bụ Ishibosheti duru bya lẹ̀

mkpukpu Mahanayimu. ⁹ Ọ bya emee ya eze ndu Giladu; mẹ ndu Ashuru; mẹ ndu Jiezerẹ̀lu; mẹcha ndu Ifuremu; mẹ ndu Benjiaminu; mẹwaro ndu Ízurẹ̀lu l'ophu. ¹⁰ Nwatibe Sọlu ono, bu Ishibosheti bẹ nọwaru ukporo apha labọ teke e meru iya eze ndu Ízurẹ̀lu. Iphe, ọ nọru l'aba-eze ono bu apha labọ.

Ọle ndu ọnu-ulo Jiuda bu Dévidi bẹ ẹphebedua awu etso. ¹¹ Dévidi buru lẹ mkpukpu Hẹburonu buru eze ndu ọnu-ulo Jiuda. Iphe, ọ nọru l'aba-eze bu apha ẹsaa l'ọnwa ishii.

Ọgu adaru ndu kẹ Dévidi; ẹphe lẹ ndu kẹ Ishibosheti ¹² No iya; Ábuna nwa Nẹru yẹle ndu ejeru Ishibosheti, bu nwa Sọlu ozi shi lẹ Mahanayimu tųgbua jeshia mkpukpu Gibiyonu. ¹³ Jiowabu; nwa Zeruya yẹle ndu ejeru Dévidi ozi tųgbua jepfushia phẹ l'okpuru, nọ lẹ Gibiyonu. Ndu ọphuu dọru l'azọ okpuru ono ibe lanu; ndu ọphuu dọru l'ibiya ọphuu. ¹⁴ Ábuna bya asu Jiowabu: “G'unwokorobya-a haẹduru gbalihu l'iphu anyi je g'ẹphe lẹ nwibe phẹ lwupfuru.”

Jiowabu su: “Ngwanu; g'ẹphe gbalihunu je.”

¹⁵ Ọo ya bu; ẹphe bya awu-lihu; a bya aguta phẹ umadzu iri l'ẹbo l'ẹka iya kẹ ndu Benjiaminu yẹle Ishibosheti, bu nwa Sọlu; bya guta umadzu iri l'ẹbo l'ẹka iya kẹ Dévidi. ¹⁶ Ọo ya bu; onyenonu bya awocharu nwibe iya l'ishi; woru ogu-echi nmachaa ibe phẹ lẹ mgburẹku; ẹphe tųko daa nwushihu l'ugbo lanu. Noo iphe, meru g'ogude e kuahaa ẹka ono “Egu Ogu-echi”. Ẹka ono bẹ nọ lẹ mkpukpu Gibiyonu.

¹⁷ Ọgu mbọku ono kpohu ọku. Ndu kẹ Dévidi lwukpee Ábuna yẹle unwoke Ízurẹ̀lu. ¹⁸ No iya; unwegirima unwoke Zeruya ẹphe n'eto nọdukota l'ẹka ono; mbu Jiowabu; mẹ Abishayi; yẹle Asahẹlu. Asahẹlu bẹ bu

onye emebe barabara gẹ mgbada. ¹⁹ Asahẹlu chipyabe Ábuna kparakpara; l'ẹbe ele ẹnya l'ẹkutara; ọzo ẹkicha; kẹ gẹ ya dakọbe; haa ya achi ọso. ²⁰ Ábuna bya aghaa ẹnya hụma iya. Ọ jia ya sụ: “Asahẹlu; bụ gubedua?”

Ọ sụ iya: “Ọo mbẹdua bẹ ọ bụ.”

²¹ Ọo ya bụ; Ábuna bya asụ iya: “Laphu azụ. Shia ẹkutara ngu; ọzoo ẹkicha; gude onye lanụ l'unwokorobya ono; nashichaa ya ngwọgu iya!” Ọphu Asahẹlu te ekwedu haa ya achi ọso. ²² Ábuna bya anmaarụ Asahẹlu ọkwa ọzo; sụ iya: “Laphu azụ; ba achihe mu! Mu -gbutsukpọo ngu nta-a; ? mu e-shi ishiagha palia iphu l'ẹka nwune ngu, bụ Jiowabu nọ?” ²³ Ọphu Asahẹlu ekwedu lẹ ya a-ha iya achi ọso. Ọo ya bụ; Ábuna bya eworu ọnuonu arwa iya sụa Asahẹlu l'ẹpho; o foo ya l'okpurukpu. Ọ daa nwuhu l'ẹka ono. Ọ nọdu abụjeru; onye jetaru bya ebu ishi l'ẹka ono, Asahẹlu dabyiru ono; l'ọpfuru.

²⁴ Jiowabu yẹle Abishayi chipyabe Ábuna. Ọ bụru g'ẹnyanwu aribawa bẹ ẹphe chirwuru iya l'úbvú Ama, nọ chebe iphu lẹ mkpukpu Giya l'uzo ibiya ọphu eeshije eje l'echiẹgu mkpukpu Gibiyonu. ²⁵ Unwoke Benjiaminu dzukọbe tuko pfuru Ábuna l'azụ. Ẹphe tugba onwophe nanu; bụru ọgbogu lanu; je atuko pfuru l'eli úbvú lanu. ²⁶ Ábuna bya ekua Jiowabu sụ iya: “Bụwaro ya mma bẹ anyi e-gude egbushi onwanyi jasuru? ?Tị madu l'ikpetemazụ bẹ iphe-a e-mechaa bụru anyi aphụ? ?Bụ teke ole bụ a -nọ-beadaru tẹme l'i pfiaru ndu nkengu g'ẹphe haa achi unwunna phe?”

²⁷ Jiowabu yee ọnu sụ: “Eshinu Chileke nọ ndzụ g'ọ nọ iya-a; bẹ ọ tọ bụ l'i pfuru opfu; mẹ ndu-a anọdukwapho achi unwunna phe-a g'ẹphe achi phe jasụ l'utsu.” ²⁸ Ọo ya bụ; Jiowabu bya eworu opu gbua; ndu ojogu ono parụ

achì ndu Ízurẹ̀lu ọso haa; ọphu ẹ̀phe alwụbaeduru ọgu Ọzo.

²⁹ Ábuna yẹle unwoke, ẹ̀phe l'iya swì; shia nsụda Araba jekọta ije l'ẹ̀nyashi mbọku onoya. Ẹ̀phe daa ẹ̀nyimu Jiọdanu. Ẹ̀phe jekọta ije l'ụtsu iya futa lẹ mkpụkpu Mahanayimu.

³⁰ Ọo ya bụ Jiowabu bya eshi lẹ k'achì Ábuna ono lwa; bya akpakọo ndu nkiya. Ụmadzu iri lẹ tete bụru ndu achọ achọcho lẹ ndu kẹ Dévidi; a -gụfukwa Asahẹlu.

³¹ Ọle ndu kẹ Dévidi ono gbukwanwuru ụkporo ụmadzu iri l'ẹsato, bụ ndu ipfu Benjaminu mẹ ndu ẹ̀phe lẹ Ábuna aswije. ³² Ẹ̀phe pata Asahẹlu je elia l'ilu nna iya lẹ Bẹtulehemu. Ọo ya bụ; Jiowabu yẹle ndu nkiya tųgbua l'ẹ̀nyashi ono; ọ bụru lẹ nchi-abọhu bẹ ẹ̀phe jerwuru Hẹburonu.

3

¹ Ọnu-ulo kẹ Sọlu waa kẹ Dévidi bẹ ọgu, daru phẹ nụ bẹ ẹ̀phe lwụkporu nọo ọdu. Ọkpẹhu kẹ Dévidi nọdu aka shii eje; ike ka abvụ ọnu-ulo kẹ Sọlu abvụbvụ eje.

Ụnwegirima, a nwụshiru Dévidi lẹ Hẹburonu
(1Iphẹ 3:1-4)

² A nwụshiru Dévidi unwoke teke o bu lẹ Hẹburonu. Ọkpara iya bụ Amụnonu. Onye nwuru iya nụ bụ Ahinowamu kẹ Jiezerẹ̀lu. ³ Nwa iya k'ẹbo bụ Kilabu. Onye nwuru iya nụ bụ Abigelu, bụ onye shi bụru nyee Nebalụ kẹ Kamẹlu. Nwa iya k'ẹto bụ Abusalomu. Onye nwuru iya nụ bụ Maka nwada Talumayi, bụ eze ndu Geshu. ⁴ Nwa iya k'ẹno bụ Adonijia. Onye nwuru iya nụ bụ Hagitu. Nwa iya k'ise bụru Shefataya. Onye nwuru iya nụ bụ Abitalu. ⁵ Nwa iya k'ishii bụru Ituramu. Onye nwuru iya nụ bụ nyee ya, bụ Ẹgula. Ndu-a bẹ a nwụshikotaru Dévidi teke o bu lẹ Hẹburonu.

Ábuna etsoru Dévidi

⁶ No iya; ọ̀ b́uru teke ono, ọ̀gu adaru ndu ọ̀nu-ùlo Sọ̀lu waa ndu ọ̀nu-ùlo Dévidi ono bẹ́ Ábuna nọ́ l'ẹ̀ka ọ̀lo kẹ́ Sọ̀lu; alwúshi ọ̀gu ike. ⁷ Sọ̀lu bẹ́ nweru nwanyị́, o to shidu alú ọ̀kpobe alúlu. Epha iya bú Rizupa, nwada Aya. O be ujiku lanú; Ishibosheti bya ekua Ábuna sù iya: “?Dẹ̀nu iphe, meru g'o gude unu lẹ́ nwanyị́, nna mu ta lúdu ọ̀kpobe alúlu nọ́du akwajẹ́?” ⁸ Tọ̀budu iya bú; ẹ̀hu ghushiahaa Ábuna egbu ike lẹ́ k'opfu ono, Ishibosheti pfuru ono. Ọ́ sù Ishibosheti: “?Ìiri lẹ́ mu bú oke nkúta ndu Jiuda; k'ọ̀phu mu e-shi eshi teke ono bya eye ntanú-a; gude obu mu g'ọ́ ha t́uru íkẹ̀ yeru nna ngu Sọ̀lu; mẹ́ ndibe iya; mẹ́ ndu yẹ́e ya eshi ònyà. Mu nọ́du alwúkpoeppo ọ̀gu ẹ̀hu unu gẹ́ ndu kẹ́ Dévidi ta alwúta unu; ì gbẹ́ nta-a bya ekobe mu opfu ẹ̀hu nwanyị́-a. ⁹ Gẹ́ Chileke gwakwa mu ọ̀chi; mbú g'o mekwa mu ọ̀phu ka njọ́ m'ọ́ b́uru lẹ́ mu te emeduru Dévidi iphe ono, Chipfu riburu lẹ́ nte; kwee ya ukwe iya ono; ¹⁰ mbú lẹ́ mu a-nafú ọ̀nu-ùlo Sọ̀lu aba-eze ono; woru Dévidi mee g'ọ́ b́uru eze ndu Ízurẹ̀lu mẹ́ Jiuda; e -shi lẹ́ Danu jasú lẹ́ Biye-Sheba.” ¹¹ Ọ̀phu Ishibosheti ahalibaẹ̀duru ọ̀nu k'epfu opfu yeru Ábuna ọ̀zo; kẹ́le ọ̀otsu iya ebvu.

¹² Ọ́o ya bú; Ábuna bya ezia ndu oozije ozi g'ẹ̀phe jeru iya ibe Dévidi lẹ́ Hẹ̀buronu je asú iya: “?Bunaa onye bẹ́ alí-a dọ́ l'ẹ̀ka? Gẹ́ mu lẹ́ ngu gbanaa ndzú; gẹ́ mu eyeta ẹ̀ka mee gẹ́ ndu Ízurẹ̀lu l'ọ̀phu lwakọ́ta ngu l'ẹ̀ka.”

¹³ Noo ya; Dévidi sù: “Ọ́ dọ́ ree! Mu lẹ́ ngu a-gba ndzú ọ̀bu. Ọ́le mu elekwanú ẹ̀nya iphe lanú l'ẹ̀ka ngu, bú iya bú g'i ti shitakwa ẹ̀ka mu nọ́ gbahaa l'i du Mikalu, bú nwada Sọ̀lu dutaru mu m'ì byajẹ́epfo gẹ́ mu lẹ́ ngu hùma!” ¹⁴ Dévidi bya eye ndu-ozí g'ẹ̀phe jepfu Ishibosheti, bú nwa Sọ̀lu je asú iya: “Dee mu nyee mu

Mikalú, bú onye onó mu butaru akpapyí ndu Filisitayinu ụkpóro ise gude kwaa aswa iya onó.” ¹⁵ Ọo ya bú; Ishibosheti zia; e je anata Mikalú l'ẹka jí iya, bú Palùtelu nwa Layishi. ¹⁶ Jí nwanyí onó nọdu ara ẹkwa etso iya l'azu jeye ẹphe jerwua mkpụkpụ Bahurimu. Ábuna sụ iya: “Tụgbule-a lashiá ibe ngu!” Ọ laphushia azu.

¹⁷ Ábuna bya ekua ndu bú ọgerenya ndu Ízurẹlu l'ídzu sụ phẹ: “Unu shiwaa teke dụ ẹnya seta g'unu e-shi mee Dévidi eze unu. ¹⁸ Ngwa; unu mee ya ya nta! Noo kẹle Chipfu kwewaru Dévidi ukwe sụ: ‘Ọo l'ẹka nwozi mu, bú Dévidi bẹ mu e-shi nafuta ndibe mu, bú ndu Ízurẹlu l'ẹka ndu Filisitayinu; mẹ l'ẹka ndu ọhogu phẹ l'ophu.’ ” ¹⁹ Ábuna l'onwiya bya epfukwarupho yeru ndu Benjiaminu. Ọ bya atụgbua jeshia Hẹburonu je edooru Dévidi iphemiphe, ndu Ízurẹlu; mẹ ndu ipfu Benjiaminu l'ophu abya ememe.

²⁰ O beẹpho teke Ábuna yẹle unwoke ụkpóro, yẹe ya swí jeru ibe Dévidi lẹ mkpụkpụ Hẹburonu; Dévidi shiaru iya nri; yẹe ndu yẹe ya swí. ²¹ Ábuna bya asụ Dévidi: “Gẹ mu bya eje nta-a je ekukọoru gube eze, bú nnajíuphu mu ndu Ízurẹlu l'ophu gẹ gụ l'ẹphe gbaa ndzụ; k'ophu ì-bụkotaru eze ndu onó, ọogu obu ngu ẹgu g'ì bụru onó.” Ọo ya bú; Dévidi dukwa Ábuna; ọ tụgbua lashiá l'ẹhu-guu.

Jiowabu egbu Ábuna

²² Ọ bụkpóerupho teke onó bẹ ndu-ozí Dévidi waa Jiowabu shi ọgu ndu ọ-lwụa-ọlaa, ẹphe jeru bata; vuru iphe, parụ ẹka ẹphe kwataru l'ọkwata lwa. Ọle Ábuna ta anọekwanu l'ibe Dévidi lẹ Hẹburonu; kẹle Dévidi dukwawaru iya; ọ tụgbua lashiá l'ẹhu-guu. ²³ Jiowabu yẹle ndu ojogu, yẹe ya swí bataẹpho; e pfuaru iya lẹ Ábuna nwa Nẹru bẹ shikwa byapfuta eze; o dukwawa

iya ọ́ lashĩa l'ẹ̀hu-guu. ²⁴ Ọ́o ya bụ; Jiowabu jefpushia eze je asụ́ iya: “?Bụ́ gụ́nu bẹ́ i meru ẹgube ono? ?Bụ́ gụ́nu meru g'o gude Ábuna byapfuta ngu; ị́ haa ya; ọ́ lashĩa? Nta-a bẹ́ ọ́ lashighawaru! ²⁵ Mbụ́-a; ị́ maru-a onye Ábuna nwa Nẹ́ru bụ́. Ọ́ kwa ụgho bẹ́ ọ́ byaru ngu aghọ́ru; bya g'ọ́ makọtacharu g'iije iya ala; gẹ́ ya makọtaru iphemiphe, iimekpọ́o ememe.”

²⁶ Jiowabu bya atụgbua lụ́fu l'iphu Dévidi. Ọ́ bya ezia ndu-ozí iya g'ẹ́phe gbapfu Ábuna. Ẹ́phe gbapfu Ábuna lẹ́ wẹ́lu Sira kuphuta iya azụ́; ọ́phu Dévidi ta amadụ́. ²⁷ Ábuna lwaphutaẹ́pho azụ́ lẹ́ Hẹ́buronu; Jiowabu kuchi iya ekuchi l'ọ́nu-ọ́guzo g'ọ́ bụ́ l'o nweru iphe, oome g'o pfiaru iya lẹ́ mpya. Ọ́ bụ́ru l'ẹ́ka ono bẹ́ Jiowabu nọ́ nmafua ya ẹ́pho; ọ́ nwụ́hu. O shi nno gwata ụgwọ́ ọ́chi nwune iya phọ́ bụ́ Asahẹ́lu. ²⁸ E mechaa; Dévidi bya anụ́ma iya. Ọ́ sụ́: “Mu lẹ́ ndu alí-eze mu bẹ́ ikpe ta anmakwaru l'iphu Chipfu jasuru asuru lẹ́ k'egbugbu, e gburu Ábuna nwa Nẹ́ru. ²⁹ G'ọ́ bụ́kwaru Jiowabu; mẹ́ ọ́nu-ụ́lo nna iya l'ọ́phu bẹ́ ọ́chi Ábuna a-tụ́-koru l'ishi! G'onye vu atashí ta abvụ́kwa abvụ́bvu l'ọ́nulo Jiowabu; ọ́zoo onye ekpenta eme; ọ́zoo onye gude mgbọ́ro ete ọ́kpa; mẹ́ onye e gburu l'ike; mẹ́ onye akpa nri.” ³⁰ Ọ́ bụ́ru Jiowabu yẹ́le nwune iya nwoke, bụ́ Abishayi bẹ́ gburu Ábuna kẹ́le ọ́o ya gburu Asahẹ́lu, bụ́ nwune phẹ́ l'ọ́gu lẹ́ mkpụ́kpu Gibiyọ́nu.

Eli Ábuna

³¹ Dévidi bya asụ́ Jiowabu mẹ́ ndu ẹ́phe l'iya nọ́: “Unu gbajashĩa uwe unu; unu achĩa uwe-aphụ́ yee; tṹko raa ẹ́kwa Ábuna.” Eze, bụ́ Dévidi nọ́du etso igbe-odzu ono l'azụ́. ³² Ẹ́phe lia Ábuna lẹ́ Hẹ́buronu; eze kwaa idemini

l'ilu Ábuna. Ndu nọkọta l'ẹka ono rakọta ẹkwa. ³³ Eze, bụ Dévidi bya agụa ebvu-aphụ ẹhu Ábuna sụ:

“?Ọ gbaru g'ọ bụru Ábuna bẹ a-nwụhu anwụhu onye-eswe-a?

³⁴ E te keduru ngu ẹgbu l'ẹka; ọphu a tūduru ngu mkpọro l'ọkpa.

Ị larụ l'ike g'onye dabarụ ndu ẹjo-iphe l'ẹka.”

Ndu nọkọta l'ẹka ono tuko tū ụzu-ẹkwa iya ọzo.

³⁵ Ndu ono g'ẹphe ha bya atuko rwoahaa Dévidi g'o ria nri lẹ teke ọ bụkwadu l'eswe. Obenu lẹ Dévidi riburu nte sụ: “Gẹ Chileke gwakwa mu ọchi; mbụ g'o mekwa mu ọphu ka njọ mẹ mu wotawaa nri dee l'Ọnu; ọzoo wota iphe ọzo, ria tẹme ẹnyanwu arība!” ³⁶ Ndu ono l'ophu tūbe iphe ono nvọ; tẹme ọ tsoo phẹ ụtso; mbụ-a; iphemiphe, eze Dévidi meru dukota phẹ ree. ³⁷ Ọo ya bụ; ndu ono g'ẹphe ha; je akpaa lẹ ndu Ízurelu l'ophu tuko maru l'eze, bụ Dévidi bẹ ẹka iya ta adudu l'egbugbu ono, e gburu Ábuna nwa Nẹru. ³⁸ E mecha; eze je asụ ndu-ozì iya: “?Unu ta amadu l'onye-ishi; mbụ oke amadu bẹ nwuhuru nū l'alì Ízurelu ntanụ-a? ³⁹ Ọ bụ eviya l'a wuru mu manụ l'ishi gẹ mu buru eze; obenu l'ike ta adudu mu ntanụ-a; noo kẹle unwegirima Zeruya bẹ nabarụ mu ẹka. Gẹ Chipfu pfukwa ndu eme ẹji ụgwo g'ẹjo-ememe, ẹphe meru habe!”

4

Egbu Ishibosheti

¹ Tọbodu iya bụ; Ishibosheti; nwa Sọlu numaepho lẹ Ábuna bẹ nwuhwaru nū lẹ Hẹburonu; ike bvụ iya; ndzụ gụhu ndu Ízurelu l'ophu. ² Nwa Sọlu ono bẹ nweru unwoke labọ, bụ ndu-ishi ọ-lwua-ọlaa. Ẹpha onye lanụ bụ Bana; ẹpha onye ọphuu buru Rekabu. Ẹphe

tùkoru búru ùnwu Rìmonu, bú onye ipfu Benjiaminu bya abúru onye mkpúkpu Berotu. Berotu ono bẹ́ a gùkoberu l'ẹ́kiya kẹ́ Benjiaminu; ³ kẹ́le ndu Berotu gbaru ọso laa mkpúkpu Gitayimu je ebuarúro l'ẹ́ka ono búru ndu lwarú alwalwa byasú ntanú-a.

⁴ No iya; Jionatanu, bú nwa Sọlu bẹ́ nweru nwa iya nwoke, iphe lónwuru ọkpa labọ́. Ọ búru teke nwata ono nọwaru apha ise bẹ́ e shi lẹ́ Jiezerẹ́lu bya edoo k'anwúhu Sọlu yẹ́le Jionatanu. Nwanyị, ehe nwata ono nùmaepho iphe ono; o kwoo gburumu jeshia gẹ́ ya kuta nwata ono gbalaa; nwata nyífu iya daa; mechaa búru ẹ́niyeni. Ẹ́pha nwata ono bu Mefiboshẹ́ti.

⁵ Noo ya; Rekabu waa Bana, bú ùnwu Rìmonu, bú onye Berotu ono bya atùgbua mbọ́ku ono; ọ búru phẹ́ eje ibe Ishibosheti. Ọ búru l'echilabọ́ eswe bẹ́ ẹ́phe jerwuru ibe Ishibosheti lẹ́ teke ọ nọ atúta unme eswe. ⁶ Ẹ́phe bya abahú l'ime ọ́lo iya g'ọ́ bú l'ẹ́phe eje ahata witi. Ẹ́phe nmafua ya ẹ́pho l'ime ẹ́ka ono; bya epyofu; gbalaa. ⁷ Ọ búru teke Ishibosheti zẹ́ azẹ́ l'iphe-azẹ́e ya bẹ́ ẹ́phe bapfuru iya l'ime mkpuru l'ẹ́ka ọ́ozeje l'ime ọ́lo iya. Ẹ́phe nmaa ya mma; nmagbua ya; bya egbuta iya ishi. Ẹ́phe pata ishi iya ono tùgbua jekọ́ta ije l'uzo nsúda Araba l'ẹ́nyashi mbọ́ku ono l'ophu. ⁸ Ẹ́phe pata ishi iya ono pataru Dévidi lẹ́ Hẹ́buronu; bya asú iya: “Waa ishi nwa Sọlu ono, bú Ishibosheti ba; mbú ọ́hogu ngu ono, shi achọ́ ishi ndzú ngu ono. Ntanú-a bẹ́ Chipfu gwatawaru Sọlu yẹ́le eri iya úgwọ́ iphe, ẹ́phe meru gùbe nnajíuphu anyi, bú eze.”

⁹ No iya; Dévidi bya eyeeru Rekabu yẹ́le nwune iya nwoke, bú Bana ọ́nu; mbú ùnwu Rìmonu, bú onye Berotu ono; sù phẹ́: “Eshinu Chipfu nọ ndzú g'ọ́ nọ iya-a; mbú onye ono, nafútaru mu l'iphe-ẹ́huka; ¹⁰ bẹ́ ọ́onwúru unu g'ọ́ nwúru onye ono teke ọ́ byaru asú mu lẹ́

Sọlu bẹ nwụhuakwaru nụ ono. Ọ gbẹnu ari lẹ ya byaru mu ezi ozi, dū ree; obenu lẹ mu zuguderu iya gbua lẹ mkpụkpu Zikulagu. Ono bụru obunggo, mu buru iya l'ozì, ọ byaru ezizi. ¹¹ ?Tọo kabadarọ njo l'ẹka ọ bụ ndu ẹjo- iphe jeru egbua nwoke, adudu iphe, o meru l'ime ụlo iya; mbụ l'iphe, ọozeje azee? ?Tọ bụedupho gẹ mu gwata unu ụgwọ mee ọchi iya l'ishi unu nta; mbụ wofu unu lẹ mgboko-a?" ¹² Ọo ya bụ; Dévidi bya ezia ụnwokorobya iya; ẹphe gbushia pẹ. Ẹphe kwashia pẹ ẹka yee ọkpa; pakọo ogwehu pẹ je ekobe lẹ mgboru okpuru, nọ lẹ Hẹburonu. Ẹphe pata ishi Ishibosheti je elia l'ilu Ábuna lẹ Hẹburonu.

5

*Eeme Dévidi eze ndu Ízurẹlu l'ophu
(1Iphe 11:1-9)*

¹ Tọbudu iya bụ; ipfu ndu Ízurẹlu l'ophu tuko byapfuta Dévidi lẹ Hẹburonu bya sụ iya: “Anyi lẹ ngu tukurọ bụru mee lanụ waa ogwehu lanụ. ² Teme; teke Sọlu shi bụru eze anyi; bẹ bụkwa gụbedua shi edujeru ndu Ízurẹlu eje ejeje alwa alwalwa l'ọgu. Ọ bụru ngu bẹ Chipfu sụru l'ọo ngu a-nọdu eche ndu nkiya, bụ ndu Ízurẹlu g'onye eche aturu; mbụ l'ọo ngu a-buru onye-ishi pẹ.” ³ Ọo ya bụ; iphe, bụ ndu bụ ọgerenya Ízurẹlu bya awụ-pfu eze, bụ Dévidi lẹ Hẹburonu; ẹphe l'iya gbaa ndzụ l'iphu Chipfu; ẹphe wụa Dévidi manụ g'ọ bụru eze ndu Ízurẹlu. ⁴ Dévidi nọwaru ụkporo apha l'apha iri teke e meru iya eze. Iphe, ọ nọru l'aba-eze bụ ụkporo apha labo. ⁵ Teke o bu lẹ Hẹburonu bẹ ọ nọru l'aba-eze ndu Jiuda apha ẹsaa l'onwa ishii. Ọ bya anọdu lẹ Jierúsalemụ bụru eze ndu Ízurẹlu l'ophu yele ndu Jiuda ụkporo apha l'apha iri l'eto.

⁶ Eze, bụ Dévidi yẹle ndu nkiya wụru jeshia oḡu lẹ Jierúsalem, bụ iya bụ Jiebusu. Ọ bụru ndu Jiebusu bẹ bụ l'alì ono teke ono. Ndu Jiebusu ono bya asụ Dévidi: “?A sùru ngu l'ì dū ike abata l'ẹka-a; mbụ l'ọ kwa ndu atsụ ishi; mẹ ndu ẹniyeni bẹ a-chiphu ngu azụ; mẹ ì -byatashia.” No kẹle ẹphe rìru lẹ Dévidi ta abyadụ adụ ike bata l'alì phẹ. ⁷ Ọle Dévidi mechalẹru-a lwùta ẹka a kpùshiru ike, nọ l'eli úbvú Zayọnu, mecharu bụru mkpùkpu Dévidi.

⁸ Mbọku ono bẹ Dévidi sùru: “Onye a-dū ike lwùa ndu Jiebusu bẹ e-tsorù ọswà-mini bapfu ndu atsụ ishi mẹ ndu ẹniyeni ono, dū Dévidi ashì ono.” Ọo ya bụ iphe ono, eepfufe sù: “Ndu atsụ ishi mẹ ndu ẹniyeni ta abyadụ a-bahù l'ùlo.”

⁹ Dévidi bya akwata unuphu l'ẹka ono, a kpùshiru ike ono. O woru iya gùa mkpùkpu Dévidi. Ọ kpùa igbulọ mkpùkpu ono mgburugburu. O shi l'agbarike igbulọ mkpùkpu ono kpùa ya bahù l'ime. ¹⁰ Dévidi nọdu aka ike ejekpọephe; kẹle Chipfu; mbụ Chileke, bụ Ọkalibe-Kakọta-Ike swiru iya eswiru.

¹¹ Tọbodu iya bụ; Hiram, bụ eze ndu Taya bya eye ndu-ozì iya g'ẹphe vutaru Dévidi oshi sida; bya eyek-waphọ ndu kapyìnta; mẹ ndu edoje ẹja ọlo; ẹphe tùko swìru je akpùaru Dévidi ọlo. ¹² Dévidi bya amaru lẹ Chipfu bẹ mewaru gẹ ya ngùru angùru l'abụ eze ndu Ízurelu; tẹme lẹ Chipfu bẹ gudewaa iswi ẹhu ndibe iya ono, bụ ndu Ízurelu palia alì-eze iya imeli.

¹³ Dévidi bya alùfutachaephe lẹ Hẹburonu; ọ lùtabaa ụnwanyi, ndu ọphu abụ-zidu unyomu iya lẹ Jierúsalem; bya alùshia igwerigwe ụnwanyi. A bya nwùshibakwaru iya phọ ụnwegirima; unwoke mẹ ụnwanyi. ¹⁴ Waa ẹpha ụnwegirima, a nwùshiru iya lẹ Jierúsalem baa: Shamuwa; mẹ Shobabu; mẹ Nétanu; mẹ Sólomọnu;

¹⁵ mẹ́ Ibuha; mẹ́ Elishuwa; mẹ́ Nẹ́fegu; mẹ́ Jiafiya; ¹⁶ mẹ́ Elishama; mẹ́ Ẹ́liyada; mẹ́ Elifẹ́letu.

Dévidi alwù-kpee ndu Filisitayinu
(1Iphe 14:8-17)

¹⁷ Ndu Filisitayinu bya anụmaepho l'a wụwaru Dévidi manụ l'ishi g'ọ bụru eze ndu Ízurẹlu; ẹphe tuko zelihu; chọru Dévidi jeshia. Dévidi nụma iya; bya abahụ l'ẹka ono, a kpụshiru ike ono. ¹⁸ Ndu Filisitayinu bya bya ejerwua je edokaa onwophẹ; ẹphe dzuru nsụda Refayimu. ¹⁹ Oo ya bụ; Dévidi bya eje ajita Chipfu sụ: “?Bụ gẹ mu jepfu ndu Filisitayinu ọgu tọo? ?li-woru phẹ-a ye mu l'ẹka?”

Chipfu yeeru iya ọnu sụ iya: “Jerọ ya; lẹ mu e-woru-a ndu Filisitayinu ọbu ye ngu l'ẹka.”

²⁰ Oo ya bụ; Dévidi jeshia mkpụkpu Belu-Perazimu; je alwù-kpee phẹ l'ẹka ono. O sụ: “Oo g'ukporo-mini ekpoje-a bụ gẹ Chipfu kpotaru ndu ọhogu mu l'ataphu mu.” Oo ya meru g'ọ gude a gụa ẹka ono Belu-Perazimu.

²¹ Ndu Filisitayinu gbadochaa agwa phẹ l'ẹka ono; Dévidi yẹle ndu nkiya chitakota iya tughua.

²² E mechaa; ndu Filisitayinu byakwa bya edokaa onwophẹ dzuru nsụda Refayimu. ²³ Dévidi byakwa eje ajita Chipfu ọzo; Chipfu sụ iya: “Unu te eshikwa phẹ ataphu nhamunha; unu shichikwaa phẹ okotazụ; nọ-pee phẹ mgburugburu l'iphu ẹka ono, oshi balusamu pfulgbaaru ono tsoo phẹ ọgu. ²⁴ Teke unu beberupho nụma iphe, ada g'igiji ọkpa l'eli oshi balusamu ono; unu emekebe ẹgwegwa; noo kẹle ọo teke ono bẹ Chipfu vutawaru unu ụzo g'unu je egbushia ndu ojogu ndu Filisitayinu.” ²⁵ Noo ya; Dévidi mee ya ẹgube ono, Chipfu ziru iya ono. O shiepho lẹ mkpụkpu Geba gbushia ndu Filisitayinu jasụ lẹ mkpụkpu Geza.

6

Eedobe Okpoko Oḡbandzu Chileke l'ibe Óbẹ̀du-Edọ̀mu
(1Iphe 13:1-14; 15:1—16:3,43)

¹ Dévidi byakwa akpakọ-dzua ndu a họtaru lẹ ndu Ízurẹ̀lu. Iphe, ẹ̀phe dọ̀ bụ ụkporo ụnu ụmadzu ugbo ẹ̀to l'ụnu iri l'ise.* ² Dévidi yẹ̀le ndu nkiya l'ophu tųgbua jeshia mkpụkpu Belu, nọ l'alị Jiuda g'ẹ̀phe je apalata okpoko Chileke; mbụ okpoko ono, a ọ̀rụ ẹ̀pha Chipfu, bụ Okalibe-Kakọta-Ike; mbụ onye ono, aba-eze iya nọ lẹ mgbaka cherubimu ono. ³ Ẹ̀phe bya apafuta okpoko Chileke ono l'ulo Abinadabu parụ tukobe l'eli oḡba-kperekpere ọ̀phúú. Ụlo Abinadabu ono tukoru l'eli úbvú. O bụru Uza waa Ahiyo, bụ ụnwu Abinadabu kẹ nwoke bẹ anga oḡba-kperekpere ọ̀phúú ono. ⁴ Ẹ̀phe ngarụ oḡba-kperekpere ono, a tukoberu okpoko Chileke ono lufuta l'ibe Abinadabu. Ahiyo vuru okpoko ono ụzo. ⁵ Dévidi yẹ̀le ndu Ízurẹ̀lu l'ophu tųko gude ike phẹ g'ọ ha ete ẹ̀swa l'iphu Chipfu. Ẹ̀phe nọdu agụ ebvu; akpọ ogumogu; mẹ une; bya akụ nkwa; egbu opu; akụ ogelenda.

⁶ Ẹ̀phe rwuẹ̀pho ẹ̀ka eechishije ẹ̀swa lẹ balị lẹ Nakonu; Uza tufu ẹ̀ka gẹ ya wọta okpoko Chileke ono; kẹle eswi, alọkpu oḡba-kperekpere, a tukoberu iya ono bẹ vukotaru iphe. ⁷ Chipfu tukoshi Uza ẹ̀hu-eghu iya; kẹle ọ tọ sọduru okpoko Chileke ono nsọ. Chileke woru iya chigbua; ọ nwụhu lẹ mgboru okpoko Chileke l'ẹka ono. ⁸ Ẹ̀hu daa Dévidi kẹ dzụu; kẹle oke-ẹ̀hu-eghu Chipfu dapfutaru Uza. A nọdu ekuje ẹ̀ka ono Pérezu-Uza byasụ ntanụ.

⁹ Oo ya bụ; ndzụ Chipfu ọ̀hu Dévidi lẹ mbọku ono; ọ sụ: “?Dẹ̀nukpoo g'e-me palata okpoko Chipfu-a?” ¹⁰ Ophu o to vuẹ̀du Dévidi evuvu g'ọ palata okpoko

* 6:1 6:1 Bụ iya bụ 30,000 lẹ mbekee.

Chipfu ono lẹ̀ mkpụ̀kpụ̀ Dévidi. Ọ̀ patawa iya rọ̀ je edobe l'ibe Óbẹ̀du-Edọ̀mu, bụ́ onye Gatu. ¹¹ Okpoko Chipfu ono nọ̀o ọ̀nwa ẹ̀to l'ibe Óbẹ̀du-Edọ̀mu onye Gatu. Chipfu kebe Óbẹ̀du-Edọ̀mu waa ndibe iya l'ophu l'ọ̀ma.

Eevulata okpoko Chileke lẹ̀ Jierúsalemụ
(1Iphe 15:25-29)

¹² Noo ya; a bya edooru eze, bụ́ Dévidi sụ́: “Chipfu gudekwa k'okpoko Chileke-a kebewaa ndibe Óbẹ̀du-Edọ̀mu l'ọ̀ma; mẹ̀kpoo iphemiphe, o nweru enweru.” Ọ̀o ya bụ́; Dévidi teru ẹ̀swa je apafuta okpoko Chileke ono l'ibe Óbẹ̀du-Edọ̀mu; palaa lẹ̀ mkpụ̀kpụ̀ Dévidi. ¹³ Ọ̀ nọ̀du abụ́jeru; ndu pa okpoko Chipfu ono -tụ́a ntọ̀kpa ishii; Dévidi egbua oke-eswi waa nweswi, ẹ̀ba dụ́ gude gweeru Chileke ngweja. ¹⁴ Dévidi nmarụ́ ẹ̀kwa ọ̀chaa l'upfu; bya egude ike iya g'ọ̀ ha ete ebvu l'iphu Chipfu. ¹⁵ Noo ya; Dévidi yẹ̀le ndu Ízurẹ̀lu l'ophu nọ̀du apalata okpoko Chipfu ono; akpọ̀ okwe etso iya; bya egbu opu.

¹⁶ A nọ̀du apabata okpoko Chipfu ono lẹ̀ mkpụ̀kpụ̀ Dévidi; nwada Sọ̀lu, ẹ̀pha iya bụ́ Mikalu pyofu ẹ̀nya lẹ̀ windo; hụ́ma eze, bụ́ Dévidi g'ọ̀nma-lihuje anmalihu bya ete ebvu l'iphu Chipfu; Ọ̀ nmaa ya phulaphula l'ime obu iya.

¹⁷ Ọ̀o ya bụ́; ẹ̀phe bya apabata okpoko Chipfu ono; woru iya dobe l'ẹ̀ka rwuberu iya nụ́ l'ime ụ̀lo-ẹ̀kwa ono, Dévidi kpọ̀beru g'e dobe iya ono. Dévidi bya egweshia ngweja-akpọ̀-ọ̀ku; mẹ́ ngweja-ẹ̀hu-guu l'iphu Chipfu.

¹⁸ Dévidi gweghechaẹ̀pho ngweja-akpọ̀-ọ̀ku ono; waa ngweja-ẹ̀hu-guu ono; o gude ẹ̀pha Chipfu, bụ́ Ọ̀kalibe-Kakọ̀ta-Ike gọ̀ru ọ̀nu-ọ̀ma nụ́ ndu Ízurẹ̀lu. ¹⁹ Ọ̀ bya ekeeru ndu ono ishi buredi nanụ́ nanụ́ l'ẹ̀hu l'ẹ̀hu; mẹ́ akara, e meru l'akpuru oshi detu; mẹ́ akara, e meru l'akpuru vayinu; kedzuru iya ndu Ízurẹ̀lu ono l'ophu;

unwoke; mẹ ụnwanyi. E mechaa; ndu ono l'ophu wụkashihu lashichaa ibe phẹ l'ẹhu l'ẹhu.

²⁰ O be teke Dévidi larwuru; g'ọ gọru ọnu-oma nụ ndibe iya; nwada Sọlu, bụ Mikalu gbafuta gba Dévidi ndzuta bya asụ iya: “Eze ndu Ízurẹlu bvubenụkakarwu onwiya ebvube ntanụ-a. Ọ gbabechakarwu onwiya ọto l'iphu ụnwumgboko, bụ ohu ndu e jeru iya ozi; mbụ ẹgube ono, iphere abvuje mkpọkoro nemadzụ l'iphu; l'ọgbabe onwiya ọto-a.”

²¹ Dévidi sụ Mikalu: “Ọo l'iphu Chipfu bẹ ọ bụ; mbụ onye ono, harụ nna ngu mẹ onye ọzo, shi l'ọnulo nna ngu họtachia mbẹdua gẹ mu bụru onye-ishi ndu kẹ Chipfu ono, bụ ndu Ízurẹlu; mbụ-a; mu a-nọdu ete ẹswa l'iphu Chipfu. ²² Mu a-kabakpọkwanu eme g'ọ to nwedu iphe, mu bụ; eme l'ọwana, mu meru-a. L'ẹnya nkemu bẹ mu a-bụru onye e wozetaru alị; obenu l'ụnwumgboko ono, bụ ohu, iipfuru ono bẹ a-gbenu akwabẹ mu ụbvù.”

²³ Ọo ya bụ; ọphu nwada Sọlu ono, bụ Mikalu anwutaduru nwa jasụ mbọku, ọ nwuhuru.

7

Ozi, Nétanu ezi Dévidi (1Iphe 17:1-15)

¹ Tọbudu iya bụ; ọ bya ebe teke eze bukpọwaa ebubu l'ibe iya; Chipfu mewa; obu rwua ya alị; ọphu ọ tsuhedu ebvu ndu ọhogu iya, nọ-pheru iya mgburugburu; ² eze pfiaru onye mpfuchiru Chileke, bụ Nétanu sụ iya: “Lenu; mbẹdua bu l'ụlo, e gude oshi sida kpụa; okpoko Chileke bụru l'ụlo-ẹkwa bẹ ọ nọ.”

³ Nétanu sụ iya: “Iphe, bukpoo iphe, dū ngu l'obu; tughua je emee ya; lẹ Chipfu bẹ swiru ngu eswiru.”

⁴ O be l'ẹnyashi mbọku ono; Chipfu pfuru yeru Nétanu; sụ iya: ⁵ “Je ezia nwozi mu, bụ Dévidi lẹ mụbe Chipfu

sūru-a: ?Bū gūbedua bẹ bū onye a-kpūru mu ụlo, mu e-buru? ⁶ Eshi mbọku, mu dufutaru ndu Ízurẹlu l'alị Ijiputu byasū ntanū-a bẹ mu te ebujekwaru l'ụlo. Mu shihawaa jepheta ejephe; bukpọerupho l'ụlo-ẹkwa. ⁷ L'ẹkameka ono, mu lẹ ndu Ízurẹlu jekọtaru ono; ?o nweru teke mu jjeru ndu-ishi ipfu Ízurẹlu; mbū ndu ono, mu sūru g'ẹphe cheje ndibe mu, bū Ízurẹlu g'onye eche atūru ono iphe, meru g'o gude ọphu ẹphe akpūduru mu ụlo sida?

⁸ “Sū nwozi mu Dévidi lẹ-a: ‘Mụbe Ọkalibe-Kakọtalike, bū Chipfu sūru-a: Mu dufutaru ngu l'ẹgu; ẹka ẹku atajẹ nri; g'i ti tsophehe atūru; g'i byachia bya abūru onye-ishi ndibe mu, bū Ízurẹlu. ⁹ Mu shi eswijekpọeru ngu phọ l'ẹkameka, iije; mu tūko ndu ọhogu ngu g'ẹphe ha gbufu l'iphu ngu. Nta-a bẹ mu e-me ẹpha ngu g'ọ paa ẹka g'ẹpha ndu oke amadū, e nwegbaarū lẹ mgboko. ¹⁰ Mu a-nū ndibe mu, bū Ízurẹlu alị ẹka phẹ. Mu adzabẹ phẹ g'oshi l'alị ono; k'ọphu ẹphe e-buru l'alị ẹka phẹ. Ẹka ono ta adūdu onye byaru l'a-chọbaa phẹ opfu ọzo. Ọphu ndu ẹjo-iphe ta abyadū emekpabaa phẹ ẹhu g'e shi emekpa phẹ iya lẹ mbū phọ; ¹¹ mbū g'e shi emekpa phẹ iya; a -gbẹ teke ono, mu họtaru ndu-ikpe g'ẹphe dua ndibe mu, bū Ízurẹlu ono. Mu e-mekwaphọ g'ọgu dabuhuru gūlẹ ndu ọhogu ngu; obu erwua ngu alị. Mụbe Chipfu bẹ epfukwaru ngu phọ lẹ mu e-me g'onulo ngu ngūru angūru. ¹² Teke ndzū ngu bvuerupho; mbū ì -lapfuepho nna ngu phẹ; bẹ mu e-shi l'unwu ngu wofuta onye a-nọ-chi ẹnya ngu; mbū onye e-shi l'ẹhu ngu gẹdegede. Mu emee g'alị-eze iya ngūru angūru. ¹³ Ọ būru onye ono bẹ a-kpūru mụbe Chileke ụlo. Mu emee g'aba-eze iya ngūru angūru jasū lẹ tuutuutuu lẹ mịimiimii. ¹⁴ Mu a-būru nna iya; yebedua abūru nwa mu. O -mee ẹjo-iphe; mu egude ẹchachi ndiphe hùá ya àhùhù;

mbụ chia ya ẹchachi ụnwu-eliphe. ¹⁵ Mu ta abyadụ e-wofu n-yemobu mu l'ẹhu phẹ; ẹgube ono, mu wofuru iya l'ẹhu Sọlu; mbụ onye ono, mu wofuru l'iphu ngu ono. ¹⁶ Ọnu-ụlo ngu waa alị-eze ngu bẹ e-keru ekeru l'iphu mu jasụ ẹ tuutuutuu ẹ mịimiimii. Mbụ-a; aba-eze ngu bẹ ee-me g'ọ nguru anguru jasụ ẹ tuutuutuu ẹ mịimiimii.' ”

¹⁷ Noo ya; Nétanu kọkotaru Dévidi iphe ono ẹgube e pfuru iya ya; mẹ g'ọ hụmaru iya l'ophulenyaa.

Dévidi epfu anụ Chileke

(1Iphe 17:16-27)

¹⁸ Ọo ya bụ; eze, bụ Dévidi gbeshi bahụ l'ime ụlo-ẹkwa Chileke je anọdu l'iphu Chipfu bya asụ: “Gube Nnajiuphu, bụ Chipfu; ?bụ onye bẹ mu bụ? tẹme ọnu-ụlo mu ?bụkwanu gụnu; kẹ g'i woliamu je apfube l'ẹka ha l'eli ẹgube-a? ¹⁹ Ọphu ono atsudu iya gube Nnajiuphu, bụ Chipfu l'ẹnya; ị bya atufua ọnu g'ọnulo onye-ozu ngu a-du l'iphu yekobefua ya. ?Bụ ẹgube ono bụ g'iigudeje ehe nemadzụ; gube Nnajiuphu, bụ Chipfu? ²⁰ ?Bụ gụnu ọzo bẹ mube Dévidi e-pfubaaru ngu? Ị makotaru gẹ mube onye-ozu ngu gbaru; gube Nnajiuphu, bụ Chipfu. ²¹ Ị gude k'iphe, ị pfuru; waa g'ọ du ngu l'obu; mee eze iphe, ha ẹgube-a; bya emee gẹ mube onye-ozu ngu maru iya.

²² “Egube g'ị habekwanụ shii gube Nnajiuphu, bụ Chipfu! Ọ tọ dudu onye du gẹ ngu; ọphu ọ dudu Chileke ọzo, du nụ; gbahaa gubedua; mbụ ẹgube ono, anyi gude nchị anyi nụmawa iya ono. ²³ ?Denukpoo ndu ọzo, dūbaa gẹ ndu nkengu, bụ ndu Ízurelu; mbụ ọha lanụ ẹ mgboko-a, gube Chileke jeru je agbafuta g'ephe buru ndu nkengu; bya egude phẹ mee g'a maru ẹpha ngu amaru; bya emee iphe, pagbaarụ ẹka; bya adu biribiri l'alị phẹ; l'iphu ndibe ngu ono, bụ ndu ono,

ì gbafùtaru l'ẹ̀ka ndu Ijiputu; tẹ̀me ì chikashikwaapho ọ̀hamoha ọ̀zo yẹ̀le agwa, ẹ̀phe agwagbaa l'ìphu ndibe ngu ono? ²⁴ I mewaru gẹ̀ ndu nkengu, bụ̀ ndu Ízurẹ̀lu nguru anguru; bụ̀ru ndu nkengu gẹ̀degede jeyewarọ̀ya; tẹ̀me gùbe Chipfu bya abụ̀waru Chileke phe.

²⁵ “Gùbe Chipfu, bụ̀ Chileke; mekwa g'o keru; mbụ̀ ukwe-ìphe ono, i kweru l'ẹ̀hu mụ̀be onye-ozì ngu; mẹ̀ l'ẹ̀hu ọ̀nu-ùlo mu ono. G'o rekwa g'i pfuru jasụ̀ lẹ̀ tuutuutuu lẹ̀ mị̀mimii. Mekwa g'i pfuru; ²⁶ k'ọ̀phu ẹ̀pha ngu a-pa ẹ̀ka apaa jasụ̀ lẹ̀ tuutuutuu lẹ̀ mị̀mimii. Ọ̀ bụ̀ru teke ono bẹ̀ ndìphe a-sụ̀ l'ọ̀o gùbe Chipfu, bụ̀ Ọ̀kalibe-Kakọ̀ta-Ike bẹ̀ bụ̀ Chileke kẹ̀ ndu Ízurẹ̀lu! Tẹ̀me ọ̀nu-ùlo mụ̀be onye-ozì ngu, bụ̀ Dévidi angụ̀kwarupho anguru l'ìphu ngu.

²⁷ “Eshi ọ̀phu ọ̀ bụ̀ gùbe Chipfu, bụ̀ Ọ̀kalibe-Kakọ̀ta-Ike; bya abụ̀ru Chileke kẹ̀ ndu Ízurẹ̀lu bẹ̀ goshiru mụ̀be onye-ozì ngu iphe-a sụ̀ l'ii-me g'ọ̀nulo mu nguru anguru; bẹ̀ bụ̀ iya meru g'o gude ọ̀nu dụ̀ mụ̀be onye-ozì ngu k'anọ̀du epfu anụ̀ ngu. ²⁸ Gùbe Nnajiuphu, bụ̀ Chipfu; ọ̀o ngu bụ̀ Chileke! Opfu ngu bẹ̀ bụ̀kota ọ̀kpobe-opfu. Ì bya ekweshia mụ̀be onye-ozì ngu ukwe iphe-ọ̀ma, dụ̀gbaa ẹ̀gube-a. ²⁹ G'ọ̀ dụnụ̀ ngu l'obu; mbụ̀ g'ì gọ̀ru ọ̀nu-ọ̀ma ọ̀bu nụ̀waro ọ̀nu-ùlo onye-ozì ngu; k'ọ̀phu ẹ̀phe a-nọ̀du eje kwasẹ̀ru l'ìphu ngu; noo kẹ̀le ọ̀o gùbe Nnajiuphu, bụ̀ Chipfu bẹ̀ pfuru iya nụ̀. G'ọ̀nu-ọ̀ma ngu ono dụ̀kwaru ọ̀nu-ùlo onye-ozì ngu jasụ̀ l'ọ̀jejeje.”

8

Ọ̀gu, Dévidi lwụ̀gbaberu

(*1Iphe 18:1-17*)

¹ E mecha; Dévidi bya alwụ̀-kpee ndu Filisitayinu; mee ẹ̀phe nọ̀du iya l'ẹ̀ka. Ọ̀ nafụ̀ ndu Filisitayinu ono

mkpukpu Metegama. ² Dévidi bya alwụ-kpekwaapho ndu Mówabu; mee ẹphe zeshikota azẹe; kpoo onwophẹ giriri l'alị. O bya ewota eri, du ogologo tũa phẹ g'ẹphe zẹ giriri ono. Oobujeru; o -tũta eri ono ugbo labo l'o woru ndu k'ono gbushikota. O bya atũta k'eto l'o dobe ndu k'ono ndzu. Oo ya bu; ndu Mówabu nodu Dévidi l'eka; bya atukwapho utu anu iya.

³ Dévidi bya alwụ-kpekwaapho Hadadeza nwa Rehobu, bu eze ndu Zoba lẹ teke o jeru gẹ ya mee g'alị, noru je akpaa l'enyimu Yufurétisu lwakota iya l'eka. ⁴ Dévidi nata iya ugbo-inya, du unu labo l'ukporo iri; bya anatakwa iya pho ndu ojogu o-je-l'okpa, du ukporo unu ugbo labo l'unu iri.

⁵ Ndu Arámu, bu lẹ Damasukosu byaephọ g'ẹphe yetaru eze ndu Zoba, bu Hadadeza ẹka; Dévidi gbua phẹ ukporo unu ugbo labo l'unu iri l'ise.* ⁶ Dévidi bya emeta odu ndu ojogu l'alị ndu Arámu kẹ Damasukosu; haru ndu ojogu iya chita dobe iya. Ndu Arámu ono nodu Dévidi l'eka; atũ utu anũ iya. Chipfu nodu emejeephọ gẹ Dévidi lwu-kpee l'ekameka, o jekporo odu. ⁷ Dévidi chikoo iphe, ndu-ozii Hadadeza egbobeje gude ezeru onwophẹ ophu e gude mkpola-ododo meshia chilata lẹ Jierusalẹmu. ⁸ Dévidi shikwapho lẹ mkpukpu Beta; mẹ lẹ mkpukpu Berotayi, bukota mkpukpu, no l'eka Hadadeza; vukoo onyirubvu, hakporo shii.

⁹ Tobudu iya bu; Toyi, bu eze ndu Hamatu numaeapho lẹ Dévidi bẹ lwu-kpekotawaru ndu ojogu Hadadeza; ¹⁰ o ye nwa iya nwoke, epha iya bu Jióramu g'o je ekele eze, bu Dévidi ekele; jaa ya ajaja; kẹle o lwu-kperu Hadadeza. O buru iphe, kparu iya nu bu lẹ Hadadeza bẹ yele Toyi shi anoduje alwu odu. O buru iphe, Jióramu gude

* 8:5 8:5 BU iya bu 22,000 lẹ mbekee.

bya bụ ivu, e megbaaru lẹ mkpọla-ọchaa; mẹ mkpọla-ododo; mẹ l'onwirubvu. ¹¹ Eze, bụ Dévidi woru ivu ono dobechaaru Chipfu iche; ẹgube ono, o dobehawaru mkpọla-ọchaa; yẹe mkpọla-ododo, shikọta l'ọhamoha, ọ lwụ-kpekọtaru phọ; ¹² mbụ ọphu shi lẹ Edomu; mẹ Mówabu; mẹ kẹ ndu Amonu; mẹ ndu Filisitayinu; waa ndu Amaleku. Nokwaphọ g'o woru iphe, ọ nataru eze ndu Zoba, bụ Hadadeza nwa Rehobu l'Ọgu doberu Chipfu iche bụ ono.

¹³ Dévidi bya aburu onye a maru amaru g'o shichaẹpho Nsuda Únú Iwa; mbụ ẹka ono, ọ nọ gbua ndu Edomu ụkporo ụnu nemadzụ ugbo labọ l'ụnu ise.† ¹⁴ Ọ bya emeshia ọdu ndu ojọgu l'alị ndu Edomu l'ọphu; chita ndu ojọgu yekọta iya. Ndu Edomu l'ọphu nọdukota Dévidi l'ẹka. Chipfu nọdu emeje gẹ Dévidi lwụ-kpee l'ẹkameka, o jekporu ọgu.

¹⁵ Ọo ya bụ; Dévidi bụru eze ndu Ízurẹlu l'ọphu; ekperu ndu nkiya ono l'ọphu ikpe l'ụzo, dū ree; mẹ l'ụzo, pfuru ọto. ¹⁶ Ọ bụru Jiowabu nwa Zeruya bẹ bụ onye-ishi ndu ojọgu. Jiehoshafatu nwa Ahiludu bụru onye akwakọbeje iphe, meru ememe. ¹⁷ Zadọku nwa Ahitubu; yele Ahimẹleku nwa Abyiyata bụru ndu-uke Chileke; Seraya bụru onye edeje ẹkwo. ¹⁸ Benaya nwa Jiehoyada bụru onye-ishi ndu Kereti waa ndu Pẹleti, bụ ndu anọduje eche eze nche. Ụnwu Dévidi unwoke bụru ndu mgbazi eze.

9

Iphe-Ọma, Dévidi meru Mefibosheti

† 8:13 8:13 Bụ iya bụ 18,000, lẹ mbekee.

¹ Tọ̀budu iya bụ; Dévidi bya ajĩa sụ: “?O nwekpọ̀ru onye shi l'Ọ̀nulo Sọ̀lu, phọ̀duru nụ̀ gẹ̀ mu gude iswi ẹ̀hu Jionatanu meeru onye ọ̀bu iphe-Ọ̀ma?”

² O nweru nwozi ndu ọ̀nu-ụ̀lo Sọ̀lu, ẹ̀pha iya bụ Ziba. Ẹ̀phe kua ya; ọ̀ bya l'iphu Dévidi. Eze, bụ Dévidi jĩa ya sụ: “?Bụ̀ gụ̀bedua bẹ̀ bụ Ziba?”

Ziba sụ iya: “Ọ̀ kwa-a mụ̀be nwozi ngu bẹ̀ bụ iya nụ̀.”

³ Eze jĩa ya sụ: “?O nwekpọ̀ru onye phọ̀duru nụ̀ l'Ọ̀nulo Sọ̀lu gẹ̀ mu meeru iya iphe-Ọ̀ma, shi l'ẹ̀ka Chileke?”

Ziba bya asụ eze: “O nweru nwa Jionatanu lanụ̀, nọ̀kwadu nụ̀, bụ onye ọ̀kpa labọ̀ nwụ̀huru anwụ̀hu.”

⁴ Eze jĩa ya sụ: “?Bụ̀ l'awe bẹ̀ ọ̀ nọ̀?”

Ziba sụ l'ọ̀ nọ̀kwa l'ibe Makiya nwa Amiyẹ̀lu lẹ̀ mkpụ̀kpu Lodeba. ⁵ No iya; eze, bụ Dévidi zia g'e je Lodeba l'ibe Makiya nwa Amiyẹ̀lu je eduta iya.

⁶ Nwanwa Sọ̀lu ono, bụ Mefiboshẹ̀ti; nwa Jionatanu ono ruwẹ̀pho l'iphu Dévidi; ọ̀ daa l'alị phozeru Dévidi gude kwabẹ̀ iya ụ̀bvù. Dévidi bya ekua ya sụ: “Mefiboshẹ̀ti!” Ọ̀ za iya ẹ̀nu sụ: “Ọ̀o nwozi ngu bẹ̀ mu bụ̀.”

⁷ Dévidi sụ iya: “Ta atsụ̀kwa ebvu; noo kẹ̀le mu e-gude iswi ẹ̀hu nna ngu, bụ Jionatanu meeru ngu iphe-Ọ̀ma. Alị nna ngu oche, bụ Sọ̀lu bẹ̀ mu a-nuphukọ̀ta ngu azụ; tẹ̀me ọ̀ bụru lẹ̀ teburu mu bẹ̀ ị̀-nọ̀duje eri nri mbọ̀kumboku.”

⁸ Mefiboshẹ̀ti phozeta l'alị sụ: “?Bụ̀ gụ̀nu bẹ̀ mụ̀be nwozi ngu bụ̀kwanu kẹ̀ g'ị̀ nyata odzu nkụ̀ta, dụ̀ gẹ̀ mbẹ̀dua?”

⁹ Ọ̀o ya bụ; eze bya ekua Ziba, bụ nwozi Sọ̀lu bya asụ iya: “Mu wowaru iphe, bụ iphe kẹ̀ Sọ̀lu je akpaa lẹ̀ kẹ̀ ndu ọ̀nu-ụ̀lo iya gẹ̀degede woru nụ̀ nwanwa nnajịuphu ngu. ¹⁰ Gụ̀bedua waa ụ̀nwu ngu; mẹ̀ ndu-ozị ngu bẹ̀ a-kọ̀jeru iya alị iya ono; kọ̀taje nri k'ọ̀phu nri a-dụ̀ru nwanwa nnajịuphu ngu. Ọ̀zo bụ lẹ̀ nwanwa nnajịuphu

ngu ono, bụ Mefiboshèti bẹ a-nòduje eri nri lẹ teburu mbèdua, bụ Dévidi.” Teke ono bẹ Ziba nwùtaru unwoke iri l’ise; bya enweru ndu-ozì ụkporo.

¹¹ Tòbudu iya bụ; Ziba sù eze: “Mùbe nwozi ngu bẹ e-mekòtaephe iphe, gùbe nnajìuphu mu, bụ eze ziru mu gẹ mu mee.”

No iya; Mefiboshèti riahaa nri lẹ teburu Dévidi g’ò bụ nwatibe eze. ¹² Mefiboshèti bẹ nwùtaru nwata nwoke nshì, ẹpha iya bụ Mayìka. Ndibe Ziba l’ophu tukurù bụkotaru ndu-ozì Mefiboshèti. ¹³ Ọo ya bụ; Mefiboshèti buru lẹ Jierúsalemù; kẹle ọo-nòduje eri nri lẹ teburu eze; tẹme ọ bụrù ẹniyenu, ọkpa labọ nwùshihuchaaru anwùshihu.

10

Ọgu, Dévidi yẹle ndu Amọnu alwù

(1Iphe 19:1-19)

¹ A nọnyaa; eze ndu Amọnu bya anwùhu. Nwa iya nwoke, bụ Hanunu bya abùru eze nọchia ẹnya iya.

² Dévidi bya epfua sù: “Mu e-meru Hanunu nwa Nahashi ree; ẹgube nna iya meru mbèdua.” Ọo ya bụ; Dévidi zia ndu-ozì g’ẹphe je akpọru Hanunu iphu nna iya ono.

O be gẹ ndu-ozì Dévidi ono rwuru alì ndu Amọnu; ³ ndu-ishi ndu Amọnu sù Hanunu, bụ nnajìuphu phẹ: “?Ìiri l’ọo ùbvù bẹ Dévidi akwabẹ nna ngu ẹgube ono meru g’ò gude o zia g’a bya akpọru ngu iphu nna ngu? ?Tòbudu ezizi bẹ Dévidi ziru g’ẹphe nwùa mkpùkpu-a ngge; genwushia ya ẹhu; woru iya lwùa?”

⁴ Ọo ya bụ; Hanunu gudeshia ndu ono, Dévidi ziru ozì ono kpùshichaa phẹ ẹjí-agba ibe lanù ibe lanù; bya eshi lẹ nhamùnha ike bukashìa uwe-mgbalanù phẹ; nwufu phẹ; ẹphe lashìa. ⁵ O be teke e pfuru iya Dévidi; o zia g’a gba phẹ ndzuta; kẹle e meru phẹ iphe-iphèrè parù ẹka.

Eze zia ozi sù phẹ: “Unu nọdu lẹ Jieriko jeye teke éjí-agba unu erwudzu; tẹme unu alwatashiwaro.”

⁶ Ndu Amọnu bya amaerupho l'ẹphe eshiwaa tukurubaa l'imi Dévidi; ẹphe je ebuta ndu ojogu ndu Arámu, bu lẹ Bẹtu-Rehobu; mẹ ndu kẹ Zoba. Ẹphe tukuru bụru ndu ojogu, eje l'ọkpa. Iphe, ẹphe tukuru dū bụ ụkporo unu unwoke ugbo labo l'unu unwoke iri. Ẹphe butafua eze ndu Maka; yele ndu ojogu, dū unu labo l'ụkporo iri; bya ebutafua ndu Tobu unu unwoke ụkporo l'iri yeru onwophe. ⁷ Anuma, Dévidi anuma iya; o yefu Jiowabu yee ndu ojogu iya g'ẹphe ha. ⁸ Ndu Amọnu wufuta bya akpoo giriri k'ogu l'iphu eka eeshije abahu lẹ mkpukpu ono. Ndu kẹ Arámu pho, shi lẹ Zoba; mẹ Rehobu; mẹ ndu shi l'alị Tobu; waa ndu kẹ Maka nọdu l'oma ẹgu.

⁹ Jiowabu humaeapho l'e gburu iya giriri iphu l'azu k'ogu ono; o hokoo ndu Ízurelu ndu ophu kachaa amaru k'ogu chiru phe ye g'ẹphe kwaberu ndu kẹ Arámu. ¹⁰ O chiru ndu ophuu dobe g'ẹphe nọdu nwune iya, bu Abishayi l'eka kwaberu ndu kẹ Amọnu. ¹¹ Jiowabu sụ: “O -buru lẹ ndu Arámu-a lwukpeaharu mu; unu abya eyetaru mu eka; teke o bukwanu l'oo ndu kẹ Amọnu lwukpeaharu unu; anyi abya eyetaru unu eka. ¹² G'obu shihu unu ike; g'anyi lwua ogu ehu ndibe anyi ge ndu bu mkparawa; mbu g'anyi lwua ogu l'iswi ehu mkpukpu kẹ Chileke. Chipfu e-me-a iphe, dū iya ree l'enya nkiya.”

¹³ Oo ya bu; Jiowabu yele ndu nkiya tuko wu-pfuaaha ndu Arámu k'ogu ono; ẹphe ye okpa l'oso gbalaaharu iya agbala. ¹⁴ Ndu kẹ Amọnu humaeapho lẹ ndu Arámu gbalaru; ẹphebedua yefua okpa l'oso nkephe gbalaaharu Abishayi; gbaru gbaba l'ime mkpukpu phe. Oo ya bu; Jiowabu shi l'ogu ẹphe lẹ ndu Amọnu ono lwatashia Jierúsalem.

¹⁵ Ndu Arámu hùmaepfo lẹ ndu Ízurèlù lwù-kpewaru phẹ; ẹphe je edzukọbe. ¹⁶ Hadadeza zia ndu Arámu, nọ l'azù ẹnyimu Yufurétisu; ẹphe bya. Shobaku, bụ onye-ishi ndu ojọgu Hadadeza duta phẹ; ẹphe wùru laa mkpụkpu Helamu. ¹⁷ E pfuleru iya phọ Dévidi; ọ kpakọo ndu Ízurèlù l'ophu; ẹphe daa azù ẹnyimu Jiódanu jeshia Helamu. Ndu Arámu ono kpọo giriri; tsoo Dévidi phẹ ọgu. ¹⁸ Ndu Arámu ono mechaa gbaaru ndu Ízurèlù ọso. Dévidi gbua ndu ụgbo-inya, dū ụnu l'ụkporo iri l'ise; bya egbua ndu ojọgu o-je-l'ọkpa, dū ụkporo ụnu ise;* bya egbutsua Shobaku, bụ onye-ishi ndu ojọgu phẹ; ọ nwùhu l'ẹka ono. ¹⁹ Ọo ya bụ; ndu eze ono, ẹphe lẹ Hadadeza shi tuko nmagba bụru nanụ ono hùmaepfo lẹ ndu Ízurèlù lwù-kpewaru phẹ; ẹphe je; ẹphe lẹ ndu Ízurèlù doshia; ẹphe nọdu ndu Ízurèlù l'ẹka. Ndu Arámu tsùahaa ebvu jịka eyetaru ndu Amọnu ẹka ọzo.

11

Dévidi anata Uráya nyee ya

¹ O be lẹ mini-ọduu; mbụ teke ndu eze ejeje ọgu; Dévidi bya ezia Jiowabu yẹle ndu-ozì iya; mẹ ndu Ízurèlù l'ophu; ẹphe je emebyishia ndu Amọnu; kephee mkpụkpu Raba. Dévidi l'onwiya nọdukwanu lẹ Jierúsalemù.

² O be l'ụzenyashi ujiku lanụ; Dévidi gbẹshi l'iphe-azẹe ya gẹ ya kpaphe akpaphe l'eli ụlo ibe-eze iya. Ọ nọdu l'eli ẹka ono tufu ẹnya hùma nwanyị, awụ ẹhu. Nwanyị ono nọdu amashikpoo mma ike. ³ Ọo ya bụ; Dévidi zia nemadzụ g'o je akpaaru iya ishi onye nwanyị ono bụ. Onye o ziru sụ iya: “Ọ kwa Batusheba, bụ nwada

* ^{10:18} ^{10:18} BỤ iya bụ 40,000, lẹ mbekee, mbụ ndu ọphu eje l'ọkpa.

Eliyamu. Ọ̀ bụ́ nyee Uráya, bụ́ onye Hetu.” ⁴ Dévidi bya eye ndu-ozí iya g'ẹ̀phe je edutaru iya ya. Batusheba byaẹ̀pho; Dévidi duta iya; yẹ́e ya kwaa. Ọ̀ bụ́ru teke ono bẹ́ Batusheba fùtaerupho l'eme nsọ́ aswafu nturwu, eemeje mẹ́ nwanyị́ nọ́-ghechaa nsọ́ nwanyị́. E mechaa nwanyị́ ono tughua lashiá. ⁵ Nwanyị́ ono bya atsuta ime; bya ezia Dévidi sụ́ iya lẹ́ ya dukwa ime.

⁶ Ọ́o ya bụ́; Dévidi bya ezia Jiowabu sụ́ iya g'o ziaru iya Uráya, bụ́ onye Hetu g'Ọ́ lwa. Jiowabu bya ezia Uráya g'o je aza Dévidi ẹ́nu. ⁷ Uráya bya abyapfuta iya; Dévidi jĩa ya aji Jiowabu; mẹ́ ndu ojogu iya; mẹ́ g'ogu eje ala. ⁸ Ọ́o ya bụ́; Dévidi bya asụ́ Uráya: “Lashiwaro ibe ngu je atuta unme.” Ọ́o ya bụ́; Uráya bya agbeshi l'ibe eze tughushia. Eze gweru iphe nụ́ g'e wolaaru iya unuphu. ⁹ Obenu lẹ́ Uráya bẹ́ mechaaru kwaa l'onu-abata ibe eze. Ẹ̀phe lẹ́ ndu ejeru nnajuphu iya ozi tuko zẹ́e l'ẹ́ka ono. Ọ́phu Ọ́ larwuẹ́duru unuphu ibe iya. ¹⁰ A bya epfuaru Dévidi lẹ́ Uráya ta laekwaru unuphu. Ọ́ bya ajiá ya sụ́: “?Tọ́ bunná ẹ́ka dụ́ ẹ́nya bẹ́ i shi lwa nta? ?Bụ́ gunu meru iphe i ti larwuduru unuphu?”

¹¹ Uráya sụ́ Dévidi: “Okpoko Chipfu; mẹ́ ndu Ízurelu; mẹ́ ndu Jiuda; mẹ́ nnajuphu mu, bụ́ Jiowabu; mẹ́ ndu-ozí iya phẹ́ bẹ́ tukuru wushi l'ẹ́gu ọ́gu. ?Denu g'ee-shi gẹ́ mbẹ́dua lashiá unuphu je eria; ngua; mu lẹ́ nyee mu akwaa? Eshinu i nọ́ ndzụ́ g'i nọ́ iya-a bẹ́ mu ta abyakwa e-me nno!”

¹² Tọ́budu iya bụ́; Dévidi sụ́ iya: “Nọ́-gbufuwaro ntanu-a; o -rwua echele mu aha ngu g'i laphushia azu.” Ọ́o ya bụ́; Uráya nọ́o lẹ́ Jierusalẹ́mu mbọ́ku ono; waa echele iya. ¹³ Dévidi bya ekua ya; Ọ́ bya; yẹ́le iya tuko ria ngua. Dévidi kwatakpo cheshia ya mẹ́e ike. E mechaẹ́la; o rwua l'enyashi; Uráya gbeshikwa je azẹ́e l'ẹ́ka Ọ́ zẹ́

unyahpu iya; ẹ̀phe lẹ̀ ndu ejeru nnajìuphu iya ozi; ọ̀phu Ọ̀ tọ̀ laduru ibe iya.

¹⁴ O be l'utsu; Dévidi deeru Jiowabu ẹ̀kwo-ozì; woru nù Uráya g'Ọ̀ nù iya. ¹⁵ O deru l'ẹ̀kwo-ozì ono sù: “Duru Uráya ye l'ataphu ẹ̀ka ọ̀gu kachaa ekpohu ọ̀ku. I -ducharu iya ye; unu alaphu azù g'e meka ya iphe; g'Ọ̀ nwùhu.” ¹⁶ E mechaa; ọ̀ bùru teke Jiowabu chìru ndu ojọ̀gu iya gbaa mkpùkpu ono mgburugburu bẹ̀ o duru Uráya ye l'ẹ̀ka ọ̀ maru l'ọ̀o ẹ̀ka ono bẹ̀ ndu ọ̀hogu iya phẹ̀, ike kachaa adùdu nọ̀. ¹⁷ Ndu mkpùkpu ono wùfutaepho jepfu Jiowabu phẹ̀ ọ̀gu; a harù ndu ojọ̀gu Dévidi gbushia. Uráya, bù onye Hetu yìru lẹ̀ ndu nwùhuru nù.

¹⁸ Jiowabu bya ezia ozi kọ̀oru Dévidi g'Ọ̀gu ono gude jee. ¹⁹ Jiowabu pfiaru onye ono, o ziru sù iya: “I -doghechaerupho eze g'Ọ̀gu ọ̀bu jeru la; ²⁰ bẹ̀ ọ̀ -bùru l'ẹ̀hu-eghu byaru iya l'ẹ̀hu; ọ̀ -jìahaa ngu sù: ‘?Dẹ̀nu g'o gude unu je anọ̀dunuka mkpùkpu ọ̀bu ntse alwù ọ̀gu? ? Unu ta amahaada l'ẹ̀phe a-gbẹ̀ l'eli igbulọ̀ agba apfù? ²¹ ? Bùnaa onye bẹ̀ gburu Abimẹ̀leku nwa Jierubẹ̀shetu? ? TỌ̀ b̀naa nwanyì, nọ̀ l'eli igbulọ̀ mkpùkpu Tebẹ̀zu gude mkpuma, eegudeje egwe nri tugbua ya; ọ̀ nwùhu? ?Dẹ̀nu g'o gude unu je anọ̀dunuka igbulọ̀ ọ̀bu ntse?’ Sù-a; ọ̀ -bùru l'ọ̀ jìru ngu ẹ̀gube ono; sù iya lẹ̀ nwozi iya, bù Uráya onye Hetu bẹ̀ nwùhufukwarupho ya.”

²² Nwozi ono tugbua jeshia. O jerwua je atùko iphe, Jiowabu ziru iya zikọ̀ta Dévidi. ²³ Nwozi ono sù iya: “Ndu ono bẹ̀ nabarù anyi ẹ̀ka; wùru wù-pfuta anyi ọ̀gu l'ọ̀ma ẹ̀gu. Ọ̀le anyi chì-phuru phẹ̀ azù jeye anyi rwua l'ọ̀nu ẹ̀ka eeshije abahù lẹ̀ mkpùkpu phẹ̀. ²⁴ Ọ̀o ya bù; ndu chì arwa nọ̀du l'eli igbulọ̀ atù ndu-ozì ngu arwa. Ẹ̀phe harù tù-gbushia ndu-ozì gùbe eze. Ọ̀zo bù lẹ̀ nwozi ngu, bù Uráya onye Hetu yìkwapho lẹ̀ ndu nwùhuru nù.”

²⁵ Dévidi bya ezia nwozi ono; sụ́ iya: “Iphe, ii-pfuru nụ́ Jiowabu bụ́ lẹ́ mu sụ́ru g'ẹ́hu be jekwa unu arwụ́shihu; noo kẹ́le ọ́o gẹ́ nkogo tarụ́ ishi onye lanụ́ bụ́ g'ọ́o-ta k'onye ọ́zo. Unu kukebekwa ẹ́hu tsoo mkpụ́kpụ́ ono ọ́gu; lwụ́a phẹ́ lwụ́ta. Je epfuaru Jiowabu ẹ́gube ono gude mee g'obu shihu iya ike.”

²⁶ Nyee Uráya nụ́maepho lẹ́ ji iya nwụ́huwaru; o raa ẹ́kwa iya. ²⁷ Batusheba raghechaepho ẹ́kwa ono ẹ́gube arajẹ́ iya; Dévidi je eduta iya lụ́ahaa. Ọ́ nwụ́aru iya nwa nwoke. Ọ́le iphe ono, Dévidi meru ono dụ́ Chipfu ẹ́ji.

12

Nétanu abarụ́ Dévidi mba k'ẹ́jo-iphe, o meru

¹ Tọ́budu iya bụ́; Chipfu bya ezia Nétanu g'o je ibe Dévidi. Nétanu jerwua bya asụ́ iya: “O nweru unwoke labọ́, bu lẹ́ mkpụ́kpụ́ lanụ́. Onye lanụ́ bẹ́ nweru iphe; onye ọ́phuu bụ́ru onye ụ́kpa. ² Onye k'ono nweru iphe ono bẹ́ kwatakpọ́oru nweru atụ́ru waa eswi, parụ́ ẹ́ka apaa. ³ Obenu l'onye ụ́kpa phọ́ te enwedu iphe, o nweru; gbahaa nwada atụ́ru, ọ́ zụ́taru azụ́ta; chee ya jasụ́ ọ́ nọ́du yẹ́le ụ́nwegirima ibe iya l'ẹ́ka vuta. Nwoke ono yẹ́le atụ́ru iya ono nọ́du anọ́duje erigba nri; tụ́ko angụ́ mini l'okoro lanụ́; mbụ́ je akpachaa k'ọ́phu bụ́ l'oohejeru nwatụ́ru ono eheru l'o ku mgbẹ́nya. Atụ́ru ono nọ́du ọ́nodu nwada iya. ⁴ Tọ́budu iya bụ́; ẹ́byaa byaru nwoke ono, nweru iphe ono; ọ́ haa akpụ́ta atụ́ru iya ono nanụ́; ọ́zoo eswi iya phọ́ nanụ́ gbua gude shiaru onye byaru ibe iya nri; ọ́ gbẹ́-chia je akpụ́ta nwada atụ́ru k'onye ụ́kpa phọ́ gbua gude shiaru onye byaru nụ́ ono nri.”

⁵ Dévidi vọ́ru ọ́ku wụ́a ẹ́hu l'opfu ẹ́hu onye ono; bya asụ́ Nétanu: “Eshinu Chipfu nọ́ ndzụ́ g'ọ́ nọ́ iya-a bẹ́ iphe, gbaru onye meru ẹ́gube iphe ono bẹ́ bụ́kwa anwụ́hu! ⁶ Ọ́ pfụ́futaje ụ́gwo atụ́ru ono ugbo ẹ́no; eshinu

o meru ẹgube iphe ono; ọp̄hu imemini onye ụkpa ono adụdu iya.”

⁷ Tọbudu iya bụ; Nétanu sụnu Dévidi: “Ọo gụbedua bụ onye ọbụ! Chipfu, bụ Chileke kẹ Ízurẹlu pfuru sụa: ‘Mu wụru ngu manụ l'ishi g'ị bụru eze, ndu Ízurẹlu. Mu byakwaphọ anafuta ngu l'ẹka Sọlu. ⁸ Mu woru ụlo Sọlu, bụ nnajiuphu ngu ye ngu l'ẹka; wochaaru unyomu iya ye ngu l'ẹka. Mu woru alị-eze ndu Ízurẹlu; mẹ kẹ Jiuda woru ye ngu l'ẹka. Mbụ; ọ -bụru l'iphemiphe ono bẹ pehuru nụ; bẹ mu gege eyekwabakpọru ngu iya iphe. ⁹ ? Denu g'o gude; ọ bụru Opfu Chipfu bẹ ị kpọru ẹbo l'afu; shi nno mee iphe, dū iya ẹji l'ẹnya? I gude ogu-echi gbua Uráya onye Hetu; duta nyee ya lụahaa. Ọ bụru ogu-echi ndu Amọnu bẹ i gude gbua ya. ¹⁰ Iphe, ịi-maru bụ l'egbu ọchi ta abyadu abvu abvubvu l'ibe ngu jasuru asuru; noo kẹle o to nwedu iphe, ị gụberu mu; tẹme ị nata Uráya, bụ onye Hetu nyee ya lụahaa.’

¹¹ “Chipfu sūru-a: ‘Mu e-shi l'ibe ngu vofuta ẹjo-iphe kpube ngu l'ẹhu. Ịi-nọdu rakafu ẹnya; mu anashia ngu unyomu ngu phẹ woru nụ onye ọzo; mbụ l'oo-jepfu unyomu ngu phẹ ono l'echilabọ eswe ọchaa. ¹² I meru nkengu lẹ mpya; ọle mu e-mekwanu ngu nkengu l'atatiphu ndu Ízurẹlu l'ophu; l'echilabọ eswe ọchaa.’ ”

¹³ Dévidi sụ Nétanu: “Mu meswekwaru Chipfu.”

Nétanu sụ iya: “Chipfu gụwaru ngu nvu l'iphe-ẹji, i meru ono. Ị tịi nwuhudu. ¹⁴ Obenu l'eshinu ndu ọhogu Chipfu gudewaa iphe-a, i meru-a epfubyishi iya; bẹ nwata ono, a nwuru ngu ono ta adzụkwaru ndzụ.” ¹⁵ E mechaa; Nétanu tųgbua; ọ bụru iya ala unuphu.

Anwuhu nwatibe Dévidi ono

Tọbudu iya bụ; Chipfu danaa nwata ono ẹka kẹ njọ; mbụ nwata ono, nyee Uráya nwutaru ono. Iphe-ememe

zup̄yabe nwata ono. ¹⁶ Dévidi rwọ́ahaa Chileke l'iswi ẹ́hu nwata ono. Ọ swiá ẹ́gu; bahụ́ l'ime ụ́lo iya je azẹ́kota l'alì l'enyashi ono l'ophu. ¹⁷ Ndu bú ọ́gerenya l'ibe iya bya apfụ́-kube iya g'ẹ́phe kpụ́-lia ya l'ọ́ma alì ono, ọ zẹ́ ono; ọ́phu o to kwedu; tẹ́me ọ́phu o kwekwaphọ́ tsoru phẹ́ ria nri. ¹⁸ O be lẹ́ mbọ́ku k'ẹ́saa; nwata ono nwụ́hu. Ndu ozi Dévidi nọ́du atsubu ebvu g'ẹ́phe e-me pfiaru iya lẹ́ nwata ono nwụ́huwaru; kẹ́le ẹ́phe sụ́ru: “Teke nwata ono nọ́kwadu ndzụ́ bẹ́ anyi pfuru yeru Dévidi; ọ́phu ọ́ tọ́ ngaduru anyi nchì. ?Dẹ́nu g'anyi e-shi pfiaru iya lẹ́ nwata ọ́bu nwụ́huwaru? Oo-mekakwa onwiya iphe.”

¹⁹ Dévidi bya ahụ́ma gẹ́ ndu-ozì iya achì-phe nwirin-wiri l'ime onwophẹ́; o rwua ya l'ẹ́hu lẹ́ nwata ono bẹ́ nwụ́huwaru nụ́. Ọ́ jìá phẹ́ sụ́: “?Nwata ọ́bu nwụ́huwaru tọ́o?”

Ẹ́phe sụ́ iya: “Ee; ọ́ nwụ́huakwaru.”

²⁰ Ọ́o ya bú; Dévidi bya agbẹ́shi l'ọ́mali ẹ́ka ọ́ zẹ́ ono je awụ́a ẹ́hu; nyiá manụ́. Ọ́ bya agbanwee uwe iya bahụ́ l'ime ụ́lo Chipfu je abaarụ́ iya ẹ́ja. O mechaa nno bya alashiá ibe iya. Ọ́ larwua bya asụ́ g'a nụ́ iya nri gẹ́ ya ria. A nụ́ iya ya; o ria. ²¹ Ndu ozi iya bya ajìá ya; sụ́: “?Dẹ́nu g'ọ́ gude ì nọ́du emee ẹ́gube umere ọ́wa-a? Teke nwata ono nọ́kwadu ndzụ́ bẹ́ i shi akwa ẹ́kwa; aswì ẹ́gu. Ọ́ bú-chiaru nta-a, ọ́ nwụ́huwaru-a bẹ́ ì gbẹ́shiru ria nri!”

²² Dévidi sụ́ phẹ́: “Mu shi akwa ẹ́kwa; aswì ẹ́gu teke nwata ono shi nọ́dukwadu ndzụ́; kẹ́le mu rìru sụ́: ‘?Bụ́ onye maru mẹ́ Chipfu e-meru mu eze-iphe-ọ́ma dobe nwata ono ndzụ́?’ ²³ Ọ́le nta-a g'ọ́ nwụ́huwaru-a; ? bú gụ́nu bẹ́ mu a-nọ́du aswì-doru ẹ́gu? ?Mu a-dù ike wophuta iya azụ́ ọ́zo tọ́o? Mu e-mechaa jepfu iya; Ọ́le yẹ́bedua ta alwaẹ́du azụ́ alwapfuta mu ọ́zo.”

Anwụ́nwu Sólomoni

²⁴ Ọo ya bụ; Dévidi bya adụa nyee ya, bụ Batusheba obu. Ọ bya alapfu iya; yẹe ya kwaa. Ọ nwụaru iya nwa nwoke. Dévidi gụa nwata ono Sólomonu. Chipfu yee nwata ono obu. ²⁵ Chipfu gude kẹ n-yemobu ono, o yeru iya ono zia onye mpfuchiru iya, bụ Nétanu g'o je agụa ya Jiedidaya, bụ iya bụ “onye Chipfu yeru obu.”

Jiowabu alwuta mkpukpu Raba
(1Iphe 20:1-3)

²⁶ No iya; Jiowabu je etsoo mkpukpu Raba ọgu. Mkpukpu ono dū l'alì ndu Amonu. Ọ lwu ya lwuta ẹka onye eze phẹ bu. ²⁷ Jiowabu bya ezia ndu-ozì iya g'e je ezia Dévidi ozi; sù iya-a: “Mu tsoakwaru mkpukpu Raba ọgu; natachawa phẹ ẹka ẹphe shi angu mini. ²⁸ Ọo ya bụ; kpakoo ndu ojogu ọphu phoduru nu bya ekepheta mkpukpu ono; nata iya; teke mu a-gbẹ nata iya; e woru ẹpha mu gụa mkpukpu ono.” ²⁹ Ọo ya bụ; Dévidi bya akpakoo ndu ojogu ono g'ẹphe ha; bya achiru phẹ jeshia mkpukpu Raba. Ọ -rwua; bya abapfu phẹ ọgu; lwuta mkpukpu ono. ³⁰ Ọ kputa eze phẹ okpu-eze, o kpu l'ishi. Ẹrwa mkpola-ododo, e gude mee okpu-eze ono bẹ dū talentu lanu. Ọ buri mkpuma, vu oke aswa bẹ nọ iya nu. E woru okpu-eze ono kpube Dévidi l'ishi. Dévidi kwatakwapọ okwata, paru ẹka lẹ mkpukpu ono. ³¹ Ọ rwukoo ndu mkpukpu ono dobe g'ẹphe gudeje soya; yele ikworo-ígwè; waa ogbunku jeaha ozi; bya eye phẹ g'ẹphe yoje ẹja ulo. Ọ buri ẹgube ono bẹ o mekotaru mkpukpu, nokota l'alì ndu Amonu l'ọphu. E mechaa; Dévidi yele ndu ojogu iya l'ọphu laphushia azu lẹ Jierusalẹmu.

¹ Abụsalomu; nwa Dévidi nweru nwune nwanyị, ama mma, ẹpha iya bụ Tama. A nọnyaa; nwa nwoke Dévidi ọzo, aza Amụnonu bya eyee Tama obu. ² Ẹhu gbangahụ Amụnonu k'ọphu ọ bụwaro iphe-ememe zụpyabe iya lẹ k'opfu ẹhu nwanna iya ono, bụ Tama. Ọ bụru iphe, nyịberu Amụnonu g'oo-shi gẹ ya kpabata iya; kele Tama bụ nwamgboko, yee nwoke ta akwajeduru. ³ Noo ya; Amụnonu ono be nweru ọnyà, ẹpha iya bụ Jionadabu nwa Shimeya; mbụ nwa nwune Dévidi. Jionadabu ono bụ onye ẹregede. ⁴ Ọ bya ajịa Amụnonu sụ: “?Bụ gūnu kparū iphe, ọ bụ nnata gūbe nwatibe eze abụjeru ụtsu g'ụtsu; l'ị nwūpyashihu ẹgube-a? ?Tị kaduru mu iphe ọbu?”

Amụnonu sụ iya: “Mu yeru Tama obu; mbụ nwune Abụsalomu, bụ nwanna mu ono.”

⁵ Jionadabu sụ iya: “Je azẹ azẹe l'iphe-azẹe ngu; mekiritaru g'iphe-ememe eme ngu. Nna ngu -byaẹ ngu phọ ajiji; sụ iya l'irwo iya g'ọ haa Tama, bụ nwanna ngu nwanyị g'ọ bya anū ngu nri g'i ria. G'ọ nọdukwanu ngu l'iphu mee nri ọbu gude ẹka iya nū ngu iya g'i ria.” ⁶ Ọo ya bụ; Amụnonu kwe je azẹe g'onye iphe-ememe eme.

Eze byaẹ ya phọ ajiji; Amụnonu sụ iya: “Jiko gẹ nwanna mu nwanyị, bụ Tama byanū bya anọdu mu l'iphu ghee akara nū mu gẹ mu taa.”

⁷ Tọbudu iya bụ; Dévidi zia g'e zia Tama l'ẹka ọ nọ l'unuphu; sụ iya g'ọ tūgbua je l'ulo nwanna iya, bụ Amụnonu je emeeru iya nri. ⁸ Tama bya atūgbua jeshia l'ulo nwanna iya Amụnonu; o rwua; Amụnonu zẹ azẹe. Tama bya ekpota ukpokutu iphe, eegudeje eme akara bya agwokobe iya gude mee akara l'iphu iya; bya eworu iya ghee egheghe. ⁹ Ọ bya achiru akara ono ye lẹ gbamūgbamu woru nū iya. Ọ jịka iya eriri. Amụnonu sụ: “Karū onyenonu g'ọ lufukota l'ẹka-a!” Onyenonu bya

atũko lufuchaa. ¹⁰ Ọo ya bũ; Amũnonu bya asũ Tama: “Wobata nri ọbu l'ime mkpuru gude ẹka ngu nũje mu iya gẹ mu ria.” Ọo ya bũ; Tama pata akara ono, o gheru ono wojeshiaru nwanna iya, bũ Amũnonu l'ime mkpuru iya.

¹¹ Tama bya ewoerupho nri ono nũ iya g'o ria; Amũnonu zũkobe iya sũ iya: “Bya gẹ mu lẹ ngu kwaa; nwanna mu.”

¹² Tama sũ iya: “Waawakwa; nwanna mu! Te egudekwa mu k'ike! E te emejekwa ẹgube iphe ono l'alĩ Ízurẹlu! Ọphu te emekwa ẹbyi ọwana. ¹³ A -bya l'ẹhu nkemu; ?bũ awaya bẹ mu a-parũ ẹgube iphe-iphere ọwa je? Teme gũbedua l'onwongu bẹ a-yĩkwaru lẹ ndu emeshi eswe ike l'alĩ Ízurẹlu. Jiko pfunuru yeru eze; ọ tọo jikadu g'ĩ tĩ lũ mu.” ¹⁴ O pfua nta; pfua imo; ọphu Amũnonu angaduru iya nchĩ; o gude iya jepfu k'ike; kẹle ọ ka iya ọkpehu.

¹⁵ E mechaa; Tama bya adũ Amũnonu ashĩ k'ọphu parũ ẹka apaa. Ashĩ, ọ dũ iya bya aka shii; e me lẹ g'o shi yeberu iya obu. Amũnonu bya asũ iya: “Gbẹshi tũgbua lashĩa!”

¹⁶ Tama jĩka; sũ iya: “Waawaa! Achĩchi ọwa-a, ìchĩ mu gẹ mu lũfu-a kabakwa ẹji; eme l'ọphu i mewaru mu.” Ọphu Amũnonu angaduru iya rọ nchĩ. ¹⁷ O kua onye-ozĩ iya, eyetajẹru iya ẹka sũ iya: “Kpũfuru mu nwanyĩ-a l'iphu; guburu iya ye l'etezi; swọ-chia iphe lẹ mgbol!”

¹⁸ Ọo ya bũ; nwozi iya ono nwufu iya; guburu iya ye l'etezi swọbe iphe lẹ mgbo ono. Tama bẹ yeru ẹguru uwe mgbalanũ, nweru ẹka ogologo; kẹle ọo ẹgube uwe ono bẹ ụnwada eze ndu ọphu bũkwadu ụnwumgboko, nwoke teke ejepfuswee eyeje. ¹⁹ Tama kpota ntũ kpube onwiya l'ishi; woru ẹguru uwe mgbalanũ ono, o ye ono gbajashĩa. Ọ chĩru ẹka kwẹe l'ishi; rarũ ẹkwa lashĩa.

²⁰ Nwune iya, bũ Abũsalomu hũma iya bya ajĩa ya sũ: “?Ọ dũ gẹ nwanna ngu, bũ Amũnonu mebyiwarũ ngu? Nọduro nwadoo nwune mu. Ọo nwanna ngu bẹ ọ bũ; te

ejekwa evuru iphe ono l'obu.” Ọo ya bụ; Tama je eburu l'ibe nwune iya Abụsalomu nọdu bụru nwanyi, e bufuru ebufu.

²¹ Eze Dévidi numaepho iphe nwuru nụ; ẹhu ghushi-ahaa ya egbu ike. ²² Abụsalomu gbaa nkuchi; ọphu o pfujeduru ọpfi ọma; ọzoo ẹjo ọpfi yeru Amunonu. Amunonu du iya ashị; kele o guderu nwune iya nwanyi, bu Tama jefu k'ike.

Abụsalomu egbu Amunonu

²³ A bya anọchaa apha labo le teke ndu ebushijeru Abụsalomu aturu iya ẹjị no le mkpukpu Belu-Hazo, no-kube oke ali ndu Ifuremu; Abụsalomu zia iphe, bu unwoke, eze nwuru nzi g'ephe byakotaru iya le nri. ²⁴ Abụsalomu jefu eze l'onwiya je asu iya: “Mube nwozi ngu be ndu ebushije aturu ẹjị byakwaru ozi. Mu nodu arwo gube eze ge gu le ndu-ozu ngu tsonuru mu je ẹka ono.”

²⁵ Eze su iya: “Waawaa; nwa mu. Anyi ta atukodu abya; kele anyi a-bya aburu ivu-erwa duru ngu.” O rwo ya nta-a rwo imo; ọphu o to kwedu le ya e-je. O buru onu-oma be o goru nu iya.

²⁶ Abụsalomu bya asu iya: “O -buru l'i tị byadu; jiko ge nwanna mu Amunonu tsonuru anyi je!”

Eze jia ya; su: “?Bu ke gunu be oo-gude tsoru unu je?” ²⁷ Abụsalomu rwo shiahaa ya ike; o kweta ge Amunonu yele unwu eze Dévidi ndu k'ophuu tsokotaru iya je.

²⁸ Noo ya; Abụsalomu bya akaru ndu-ozu iya; su phe: “Unu tonwube enya maru teke Amunonu ngwaru mee; o nodu atsu iya atsutsu. Mu -su unu g'unu chitsua Amunonu; unu woru iya chigbua. Unu ta atsukwa ebvu. Oo mbedua ziru iya unu. Unu shihu obu ike; mee okpehu!” ²⁹ Ndu ozi Abụsalomu mee Amunonu iphe, o

ziru g'ẹ̀phe mee ya. Ọo ya bụ; unwoke, eze nwụshiru ono wụ-lihu; onyenonu pfukotachaa inya-mulu iya; gbalaa.

³⁰ Ẹ̀phe nọdukwaduro l'uzo; ozi gbẹ́ rwuwanu Dévidi nchị́ lẹ́ Abusalomu gbushikotawaru unwoke, eze nwuru; l'o to nwedu onye ophu phoduru nu. ³¹ Eze zilihu; ye ẹ́ka l'uwe iya gbajashia. Ọ gwodoshihu l'alí. Ndu ozi iya pfu-kube iya l'ẹ́ka ono tuko uwe phé gbajashikwaapho. ³² Jionadabu; nwa Shimeya; mbụ́ nwa nwune Dévidi bya asụ: “Nnajiuphu mu; ba arishi l'unwu-eze be e gbushikotawaru. Ọo Amunonu kpoloko be nwuhuru nu. Ọo iphe Abusalomu shihawaa rita k'ememe e -shi mboku ono, Amunonu guderu nwune iya nwanyi, bu Tama k'ehuka jepfu pho. ³³ Su-a; ge nnajiuphu mu, bu eze ba chishiru uche ye l'a suru l'unwu-eze nwushihukotawaru. Ọo Amunonu kpoloko be nwuhuru nu.”

³⁴ E mecha; Abusalomu ye okpa l'oso gbala.

Ọo ya bụ; nwoke, echeje nche palia enya huma ikpoto ndu no lẹ́ gbororo l'uzo azu iya; g'ẹ̀phe shi l'aguga úbvú eje abya. ³⁵ Jionadabu bya asụ eze: “Lenu; unwu gube eze alwaakwa. Ọo epho ge mube nwozi ngu pfuru bu g'ọ́ nwuru.” ³⁶ Ọo ya bụ; epfughe, oopfughe nno; unwu-eze ono wubata; chiahaa mkpu ekwa. Eze yele ndu-ozí iya g'ẹ̀phe ha tuko chiswee ekwa; rashikpo o ya ike.

³⁷ Abusalomu gbalaa lapfushia Talumayi; nwa Amihudu; mbụ́ eze ndu Geshu. Dévidi nọdu anọduje ara ekwa nwa iya ono mbokumboku. ³⁸ Abusalomu gbaru laa Geshu ono je anoo apha eto l'ẹ́ka ono. ³⁹ A nonyaa; oghoroko Abusalomu bya adushia eze, bu Dévidi ike; kele a dutawaru iya lẹ́ k'anwuhu Amunonu.

14

Abusalomu alwaphuta azu lẹ́ Jierusalẹ́mu

¹ Noo ya; Jiowabu; nwa Zeruya bya amaru l'oghoroko Abusalomu bẹ dushi eze ike. ² Ọo ya bụ; ọ bya eye nemadzu g'o je mkpukpu Tekowa je ekuaru iya nwanyi, maru iphe l'eka ono; su iya: "Mekiritaru g'i bu onye no l'aphu. Yee uwe onye no l'aphu. Ta anyikwa manu mbeleke. Mekpopho g'i bu nwanyi, shi teke du enya noduta l'aphu onye nwuhuru anwuhu. ³ L'i jepfu eze je epfuaru iya egube ono." Ọo ya bụ; Jiowabu bya ezikota iya iphe oo-pfu.

⁴ Nwanyi Tekowa ono bya ejepfu eze ge ya pfuru yeru iya; bya adaa kpurumu l'iphu iya; woru iphu kpube l'ali gude kwabe iya ubvu. Ọ bya asu eze: "Gube eze; jiko yenuru mu aka!"

⁵ Eze ja ya su: "?Bu gunu be atsu ngu l'ehu?"

Ọ su iya: "Mu bu nwanyi, ji iya anodedu; mbu le ji mu nwuhwaru. ⁶ Mube nwozi ngu nwanyi buru unwoke labo be mu nwutaru. Su-a; ephenebo wata alwu ogo l'egbudu; ophu o dudu onye no l'eka ono; k'ophu e gbokaharu phe. Onye lanu chita ibe iya tua; woru iya chigbua. ⁷ Noo ya; ndibe anyi l'ophu wu-lihu ripyabe mube nwozi ngu nwanyi su mu ge mu kpufutafuaru phe onye ophuu chigburu nwune iya nwoke pho g'ephe gbua gude gwata ugwo ochi nwune iya nwoke ono, o gburu ono; mbu l'ephe e-wofufua ndzu onye ophu e-ri iphe nna phe. Su-a; ephe eshi nno menyia nwa akpuru icheku-oku lanu ono, mu toghboru ono; mbu mee g'epha ji mu me awa iya chihu l'eliphe-a."

⁸ Eze bya asu nwanyi ono: "Tugbua lasha ibe ngu; ge mu bya aturu ekemu nu phe l'opfu eh ngu."

⁹ Nwanyi Tekowa ono bya asu iya: "Gube nnajuphu mu, bu eze; g'uta, e gege ata ngu tukokwaru mu l'ishi; me l'ishi onu-ulo nna mu. G'o to dukwaro onye eje ata eze; yee aba-eze iya uta."

¹⁰ Eze sù iya: “O -nwekpọwaru onye jeru ngu epfuru; duta iya byapfuta mu; g'onye Ọbu aha ngu epfuchi nchi.”

¹¹ Ọo ya bụ; nwanyị ono sù: “Jiko gùbe eze kpọ-kunu Chipfu, bụ Chileke ngu; k'ọphu onye ọ dū l'ẹka; mbụ agwata ụgwo ọchi ono a-ha egbu nwa mu nwoke ono.”

Eze sù iya: “Eshinu Chipfu nọ ndzụ g'ọ nọ iya-a bẹ ẹgbushi, nọ nwa ngu l'ishi ta abyakwa erifu mẹ nanụ daa l'alị.”

¹² Noo ya; nwanyị ono sù: “Gẹ mụbe nwozi ngu nwanyị pfufunaaru akpuru opfu lanụ yeru gùbe nnajịuphu mu, bụ eze.”

Ọ sù iya: “Pfuokpọoro ya.”

¹³ Nwanyị ono sù iya: “?Denu g'o gude gùbe eze mee ndibe Chileke ẹgube ẹjo-iphe ọwa-a? ?T'ọ bụdu ikpe bẹ gùbe eze anma onwongu l'iphe ono, iipfu nta-a ono; kẹle nwa ngu phọ, a chifuru achifu phọ bẹ gùbe eze teke eduphutada azụ. ¹⁴ G'anyi ha nwuhufutaje anwuhu. Anyi dū gẹ mini, wushihuru l'alị, te nweedu g'ee-shi kukọbe iya l'iphe ọzobaa. O to nwedu onye Chileke gufuru anwuhu l'ẹhu iya. O chia iphe, oomeje bụ l'ọchoje ụzo, ee-shi g'onye a chifuru achifu lwaphuta azụ lwapfuta iya. ¹⁵ Sù-a; mu byaru gẹ mu pfularu iya gùbe nnajịuphu mu, bụ eze; kẹle ndiphe mewaru ndzụ nọdu agụ mu. Mụbe nwozi ngu nwanyị rịa sù lẹ mu epfuru yeru gùbe eze; ?a maru; ?l'i-meru nwozi ngu iphe, ọo rwọ ngu. ¹⁶ Mbụ; ?a maru gùbe eze a-nụma opfu mu nafuta mụbe nwozi ngu l'ẹka nwoke ono, achọ ụzo, ooshi gbua mu lẹ nwa mu; nafu anyi okiphe, Chileke nuru anyi ono? ¹⁷ Ọo ya bụ; mụbe nwozi ngu nwanyị pfua sù: ‘Jiko g'opfu gùbe nnajịuphu mu, bụ eze mekwaa gẹ meji nmapfuru mu’; noo kẹle nnajịuphu mu, bụ eze dū g'ojosi Chileke, amajeru iphe, dū ree waa iphe, dū ẹji. Gẹ Chipfu, bụ Chileke ngu swikwaru ngu eswiru.”

¹⁸ Ọo ya bụ; eze bya ajĩa nwanyị ono sụ: “Ta awachikwaru mu iphe-a, mu eme gẹ mu jĩa ngu-a awachi.”

Nwanyị ono sụ iya: “Jĩnaa mu iphe ọbu; gube nnajịuphu mu, bụ eze.”

¹⁹ Eze bya ajĩa ya sụ: “?Eka Jiowabu dụ l'iphemiphe-a, iipfu-a tọo?”

Nwanyị ono sụ iya: “Gube nnajịuphu mu, bụ eze; eshinu ì nọ ndzụ g'ì nọ iya-a ?bụ onye bẹ a-lọkata iphe, gube nnajịuphu mu, bụ eze pfuru shia ẹkutara; ọzoo loru laa l'ẹkicha? Ee; ọo nwozi ngu Jiowabu bẹ bụ onye ziru gẹ mu mee iphe-a; ọ bụkwaru iya phọ bẹ sụru gẹ mu pfua gẹ mu epfua. ²⁰ Ọo nwozi ngu, bụ Jiowabu bẹ meru iphemiphe ono; k'ọphu ọnodu-a, a nọ nta-a l'a-gbanwe. Gube nnajịuphu bẹ maru mmamiphe g'ojosi Chileke; k'ọphu bụ l'ì makotaru iphemiphe, eme lẹ mgboko-a.”

²¹ No iya; eze bya asụ Jiowabu: “Ọ dụ ree; mu eme iphe ono. Tugbua je edulata nwokorọbya ono, bụ Abụsalomu.”

²² Jiowabu daa kpurumu woru iphu kpube l'alì gude kwabẹ iya ùbvù; bya etua eze ẹpha. O pfua sụ: “Ntanụ-a bẹ mube nwozi ngu marweta lẹ mu dụ gube nnajịuphu mu, bụ eze l'obu; noo kẹle i meru mu iphe, mu pfuru g'i meeru mu.” ²³ Ọo ya bụ; Jiowabu tugbua jeshia mkpukpu Geshu je eduphuta Abụsalomu azụ lẹ Jierúsalem. ²⁴ Ọle eze sụkwanuru g'o jeekwapho eburu l'ụlo ẹka iya; g'ọ tọ hụmakwa iya ẹnya. Noo ya; Abụsalomu je eburu l'ụlo nkiya; ọphu ọ tọ hụmajeduru eze atatiphu.

Jiowabu edoshiru Abụsalomu yẹ Dévidi opfu

²⁵ L'alì Ízureļu mgburugburu bẹ ọ tọ dudu nwoke ọzo, a jaberu ajaja kẹ mma, ọoma g'a ja Abụsalomu. E

-shi l'ishi jasù l'òbochi-òkpa bẹ ọ tọ dudu ẹka iphe, takuru iya l'ẹhu. ²⁶Ọ nọdu abujeru; ọ -kpushia ẹgbushi, dọ iya l'ishi; kele ọokpuje iya aphagapha m'ọ nyijee ya phọ ẹrwa; l'o wota iya tọa atutù maru g'ọonyita-be ẹrwa. Ẹrwa ẹgbushi iya bọru shẹkelu ukporo iri bẹ ọobujeru; mẹ e -gude iphe, ndu eze egudeje atù ẹrwa iphe tọa ya. ²⁷Unwegirima unwoke ẹto; waa nwata nwanyị lanu bẹ Abusalomu nwutaru. Ẹpha nwa iya nwanyị ono bu Tama; ọ bọru nwanyị, ama mma.

²⁸ Abusalomu bua apha labọ lẹ Jierusalemu; ọphu ọ tọ humajeduru eze iphu. ²⁹Ọo ya bu; Abusalomu zia g'e ziaru iya Jiowabu g'ọ bya gẹ ya zia ya ibe eze. Ọphu Jiowabu ekwedu bya iya aza ẹnu. Ọ bya ezia ya k'ugbo ẹbo; ọ jikakwapho abyabya. ³⁰Tọbudu iya bu; ọ bya ezia ndu-ozì iya; sù phẹ: “Unu lenu; ẹgu, Jiowabu kọru balì bẹ nọ-kube nkemu. Unu je atọa ya ọku.” Ndu ozi iya ono tųgbua je eworu ọku tọa ya.

³¹ Ọo ya bu; Jiowabu tųgbua jepfu Abusalomu l'ibe iya je asù iya: “?Bu gunu meru g'o gude ndu-ozì ngu je atọa ọku l'ẹgu mu?”

³² Abusalomu sù Jiowabu: “Mu ziru ozi g'e zia ngu g'ì bya gẹ mu zia ngu g'i jepfu eze je ajia ya: ‘?Buhunu gunu meru iphe, mu shi mkpukpu Geshu lwatashia? O gege akaru mu ree lẹ mu nọkwadu l'ẹka ono.’ Ọo ya bu lẹ-a; mee gẹ mu huma eze iphu. Ọ -bọru l'o nweru ẹjo-iphe, mu meru; g'o gbua mu rọ egbugbu.”

³³ Ọo ya bu; Jiowabu tųgbua je epfuaru eze iphe ono. Eze bya ekua Abusalomu. Ọ byarwuta l'atatiphu iya; bya adaa kpurumu woru iphu kpube l'ali. Eze bya etsutsua Abusalomu ọnu.

15

Ẹjo idzu, Abusalomu achiru Dévidi

¹ Tòbodu iya bú; Abùsalomu bya enweru ụgbo-ìnya; waa ìnya k'èkiya; waa unwoke ụkporo labọ́ l'iri, bú ndu evutajẹru iya ụzo. ² Ọ́ nọ́du abụjẹru o -rwua l'ònmewa ụtsu; Abùsalomu agbẹshi je apfuru l'aguga gbororo eeshije bahụ́ l'ime mkpụkpu ono. Teke ọ́ bú l'o nweru onye eje echiru eze ichi g'eze kpee opfu ono; Abùsalomu ekua ya jĩa ya sụ: “?Bụ́ mkpụkpu awe bẹ́ i shi?” Onye ono asụ́ iya: “Nwozi ngu shikwa l'ipfu lanụ́ l'ime ipfu ndu Ízurẹ́lu.” ³ Onye ọ́bu -pfuchaa iphe ọ́ byaru; Abùsalomu asụ́ iya: “Iphe, i pfuru dụkwa ree; bya abụru iphe, pfuru ọ́to; obenu l'o to nwedu onye a-nọ́-chi ẹnya eze nụma iphe, adaru unu.” ⁴ Iphe ọ́zo, Abùsalomu epfujefua bú: “Ọme ọ́ bú l'ọ́o g'a họtakwadu mu phọ́ gẹ́ mu bụru onye-ikpe l'alì-a; m'ọ́ bụjekwaru iphe, bú onye wotaru mu opfu; ọ́zoo onye byaru echia mu ichi; mu ekpejeẹpho ikpe ono; kperu iswi-ọ́du-mma nụ́ iya.” ⁵ Nokwaphọ́ g'ọ́ bụjẹru; ọ́ -duru onye byapfutaru iya nụ́ gẹ́ ya phozeta l'iphu iya; kele iya ekele; l'ọ́ machĩa ẹka; nmatachia onye ọ́bu akpa; tsutsua ya ọ́nu. ⁶ Noo gẹ́ Abùsalomu shi emeje iphe, bú ndu Ízurẹ́lu, gude ikpe abya ibe eze bú ono. O shi nno mee; ọ́ bụru yẹbedua bẹ́ ndu Ízurẹ́lu yeru obu.

⁷ Apha ẹno lachaẹpho; Abùsalomu sụ́ eze: “Jiko; hana mu gẹ́ mu je mkpụkpu Hẹburonu je emeeru Chipfu iphe, mu kweru iya ukwe iya. ⁸ Noo kẹle teke ono, mụbe nwozi ngu nọkwadu lẹ́ mkpụkpu Geshu l'alì Arámu bẹ́ mu kweru ukwe sụ: ‘Chipfu -mewaa mu lwaphuta azụ́ lẹ́ Jierúsalemụ́ bẹ́ mu a-barụ́ iya ẹja.’”

⁹ Eze sụ́ iya: “Jekwaa l'ẹhu-guu!” Ọ́o ya bú; ọ́ tųgbua jeshia Hẹburonu. ¹⁰ Abùsalomu bya ezia ndu-ozì ẹphe je ejekọta lẹ́ mpya l'ipfu ndu Ízurẹ́lu l'ophu sụ́ phẹ: “Unu -nụmaẹpho ọ́da opu; unu tụa ụzu sụ: ‘Abùsalomu

bụakwa eze ịe Hẹburonu.’ ” ¹¹ Ndu ẹphe ịe Abụsalomu shi ịe Jierúsalemụ swịru bẹ dū unwoke ụkporo iri. Ndu ono bẹ bụ ndu e ziru nzi g'ẹphe bya ẹbyaa. Ẹphe gude obu ìphóró jeshia; ọphu ẹphe amadụ iphe, anwụ nụ. ¹² Abụsalomu gudekwadụ ngweja ono l'ẹka egwe; bya ezia g'e je ekuaru iya Ahitofẹlu, bụ onye mkpụkpu Gilo ịe mkpụkpu iya bụ Gilo g'ọ bya. Ahitofẹlu ono bẹ bụ onye mgbazi Dévidi. Noo ya; ẹjo idzu ono, aachịru Dévidi kabaa eshihu ike; ndu awụ etso Abụsalomu nọdu aka shii eje.

Dévidi agbafu ịe Jierúsalemụ

¹³ Tọbudu iya bụ; nwozi lanụ gbaru bya asụ Dévidi: “?Ị maru-a l'obu ndu Ízurẹlu l'ophu bụwaa l'ẹka Abụsalomu nọ bẹ ọ dukota?”

¹⁴ Dévidi bya epfuru yeru ndu-ozì iya g'ẹphe ha, bụ ndu yẹe ya tukuru nọdu ịe Jierúsalemụ sụ phẹ: “Unu wụ-lihukwa g'anyi gbalachaa; ọdumeka bẹ ọ tọ dukwa onye byaru l'anahụ Abụsalomu. Unu mekebe ẹgwegwa g'anyi tughua; a nọnyanu o mee ẹgwegwa gbabuta anyi bya emeru ẹjo-iphe kpua anyi; mbụ gude ogu-echi gbug-bushia ndu mkpụkpu-a.”

¹⁵ Ndu ozi eze tuko sụ iya: “Ọo iphe, gube nnajịuphu anyi, bụ eze turu ẹka l'ọo iphe, ee-me bẹ anyịbe ndu-ozì ngu e-mekọtaepfo.” ¹⁶ Ọo ya bụ; eze tughua; ndibe iya l'ophu tsoru iya. Eze bya ahaa ụmadzu iri, bụ ụnwanyi, ndu ọphu abụ-zidu unyomu iya g'ẹphe letaru iya ẹnya l'unuphu.

¹⁷ Ọo ya bụ; eze tughua; waa ndu yẹe ya swikota; ẹphe jekpọepfo jerwua ẹka dū ẹnya; tẹme ẹphe bebe dọshia. ¹⁸ Ndu ozi iya bya awughakota iya; mbụ ndu Kereti; mẹ ndu Pẹleti; mẹ ụnu nemadzu l'ụkporo iri ono, shi ịe mkpụkpu Gatu tsoru iya phọ. Ẹphe ghata eze; vuta ụzo.

¹⁹ Tõbudu iya bũ; eze bya asũ Itayi, bũ onye Gatu: “?Bũ gũnu meru g'õ gude i tsoru anyi? Laphukwa azũ lapfu eze, bũ Abusalomu; kẹle ì bũ onye õhõzo; tẹme ì bũru onye akpũru lẹ ndzũ l'ibe unu. ²⁰ ?Denu g'ee-shi l'õõ-bũru gũbe onye byaru unyaphu bẹ bũwaa ntanũ-a mu abya emee g'i tsoru anyi ghapheaha aghaphe l'ẹbe abũ lẹ mu maru ẹka mu eje ala. Chĩta ndibe unu laphu azũ. Gẹ Chipfu phũkwaaru ngu obu-imemini; goshi ngu l'õ bũ onye apfũshije ike l'iphe, o pfuru.”

²¹ Noo ya; Itayi yeeru eze õnu; sũ iya: “Eshinu Chipfu nõ ndzũ g'õ nõ iya-a; tẹme gũbe nnajiũphu mu, bũ eze nõdu ndzũ g'ì nõ iya-a; bẹ bũkwa ẹka gũbe nnajiũphu mu, bũ eze nõ bẹ mũbe nwozi ngu a-nõdu; mẹ lẹ ndzũ; mẹ l'õnwu.”

²² Dévidi sũ Itayi: “Ngwa; ghata vuru ũzo g'anyi je!” Ọo ya bũ; Itayi, bũ onye Gatu bya aghata; mẹ ndu yẹe ya swì; waa unwegirima, tso iya nũ. ²³ Noo ya; ũzu-ẹkwa nõdu atũ wõwoowoo l'alì ono l'ophu gẹ ndu ono tũkoru awũghagbaa. Eze waa ndu ono, yẹe ya swì ono je adaghaa nggele Kidirõnu; kwasẹru chebe ũzo echiegu.

²⁴ Abyiyata bya aghata; Zadõku ghatakwapõ; mẹ ndu Lívayi l'ophu, bũ ndu pa okpoko õgbandzu Chileke. Ẹphe bya apazeta okpoko Chileke ono dobe l'alì jeye teke ndu ono tũkoru wũfutakota lẹ mkpũkpu ono. ²⁵ Eze sũ Zadõku: “Paphu okpoko Chileke ono azũ l'ime mkpũkpu ono. Ọ -bũru lẹ mu dũ Chipfu l'obu bẹ oo-duphuta mu-a azũ; mee gẹ mu hũmabaa okpoko Chileke ono õzo; waa ẹka ono, õonoduje ono. ²⁶ Teke ọ bũ l'ẹhu ta tsõdu Chileke ỳtso l'õpfu ẹhu mu; wanaa mu-a baa; g'õ mekwaa mu g'õ dũ iya ree.” ²⁷ Eze pfukwaarũpho Zadõku, bũ onye uke Chileke ono sũ iya: “?Tìi bũnaa onye aphũje ọphulenyã? Laphushia azũ l'ime mkpũkpu ono l'ẹhu-guu; unu lẹ nwa ngu, bũ Ahimaazu; waa Jionatanu,

bụ nwa Abyiyata. ²⁸ Mu a-nọdu kwabẹ l'Okpa ẹnyimu Jiódanu l'ibe iya Ọp̄hu eerwuje iya erwurwu l'ụzo echiẹgu jasụ unu ezia ozi g'e zia mu.” ²⁹ Ọo ya bụ; Zadọku yẹe Abyiyata pata okpoko Chileke ono laphushia azụ lẹ Jierúsalem̄u je anọ-kirishia l'ẹka ono.

³⁰ Dévidi tųgbua kwasẹru ara ẹkwa enyikota eli úbvú olivu. O kpuchia iphe l'ishi gbaru Okpa ọto eje. Ndu ẹp̄he l'iya swị g'ẹp̄he ha tųko kpuchishikọta iphe l'ishi awu etso iya; bya ara ẹkwa g'ẹp̄he ejekpọp̄ho ono. ³¹ A bya ep̄fuaru Dévidi sụ iya: “Ahitofẹlu bẹ tsokwa Abusalomu achị ẹjo idzu ono.” Ọo ya bụ; Dévidi pfuru nụ Chileke sụ: “Jiko Chipfu; menaa gẹ mgbazi ono, Ahitofẹlu agbazi ono bụru iphe-mmanụ.”

³² Dévidi nyirwuẹp̄ho mkpakpọnu úbvú ono, bụ ẹka aanọduje abarụ Chileke ẹja; ọ bya amaru Hushayi, bụ onye Akụ gbawa iya ndzuta. Uwe Hushayi gbajashiḥucha agbajashiḥu; tẹme o kporu ntụ kpua l'ishi. ³³ Dévidi sụ iya: “I -tsowaru mu bẹ ịi-bụkwaru ivu-erwa duru mu. ³⁴ Ọ -bụru l'ị laphuru azụ lẹ Jierúsalem̄u je asụ Abusalomu: ‘Mu a-bụru nwozi ngu gụbe eze; mbụ ẹgube ono, mu shi bụru nwozi nna ngu Dévidi phọ. Nta-a bẹ mu a-bụru nwozi ngu.’ I -mee nno; bẹ ii-yetarụ mu ẹka gbanwe ẹjo idzu ono, Ahitofẹlu achị ono. ³⁵ Zadọku yẹle Abyiyata, bụ ndu-uke Chileke bẹ unu l'ẹp̄he a-tųkona-a nọdu l'ẹka ono. Iphemiphe, ị nụmakporu l'ibe eze; pfujeru phẹ iya. ³⁶ Unwu phẹ ẹphenebo; mbụ Ahimaazu nwa Zadọku; waa Jionatanu nwa Abyiyata bẹ ẹp̄he l'ẹp̄he tųkoru nọdu l'ẹka ono. Iphe, bụkpoo iphe, Ị nụmaru zia phẹ g'ẹp̄he bya ep̄fuaru mu iya.”

³⁷ Ọo ya bụ; erwurwu, ọnyà Dévidi, bu Hushayi erwu Jierúsalem̄u; Abusalomu nọdu abatakpọp̄ho abata l'ime mkpụkpu ono.

16

Dévidi yẹ̀le Ziba

¹ Tọ̀budu iya bụ; Dévidi jeribeerupho nwanshii lẹ̀ mkpakpọ̀nu úbvú ono; ọ̀ bya l'amaru; ọ̀ hụma nwozi Mefibosheti, bụ Ziba g'ọ̀ nọwa kwabere iya g'ọ̀ gba iya ndzuta. Ọ chiru nkafu-igara olemole, e dozichaaru ree bya ebo iya ishi buredi ukporo iri; waa echa-mbekee ukporo ise, e gude akpuru vayinu ghee; waa akpuru oshiom i ukporo ise; waa otumu mee lanu. ² Eze bya aja Ziba su iya: “?Bu ke gunu be i vutaru iphe owa-a?”

Ziba su iya: “Nkafu-igara ono bu iphe, ndibe eze a-nọ-kojeru agbaphe. Ophu bu buredi; yee akpuru oshiom i pho be bu iphe, unwoke, tso ngu nu a-noduje ata. Mee pho bu ndu ike bvuru l'echiegu be a-ngutaje iya gude rokota ike.”

³ Eze ja ya su: “?Denu nwanwa nnajiuphu ngu?”

Ziba su iya: “O nokwa le Jierusalemu; efuje su le ntanu-a be ndu Izurelu e-woru ali-eze nna iya oche nuphu iya azu.”

⁴ Oo ya bu; eze su Ziba: “Iphemiphe, shi buru iphe Mefibosheti be buwaa nkengu nta.”

Ziba su iya: “Mu wozeru onwomu ali ephozeru ngu; jiko ge mu tubajekwa ngu l'enya gube nnajiuphu mu, bu eze.”

Shimeyi ephu Dévidi iphu

⁵ O be teke eze, bu Dévidi erwu mkpukpu Bahurimu; a bya l'amaru nwoke lanu, yee Solu shi l'enya-unuphu lanu shiwaa l'eka ono futu. Epha iya bu Shimeyi; nwa Gera. O nodu ephushi iphu eje abya. ⁶ O tuahaa Dévidi; yele ndu-ozii iya g'ephe ha mkpuma; l'eka ndu yee ya swi me ndu ojogu iya nokakwaru iya ro l'ekutara me l'ekicha. ⁷ Shimeyi nodu ephu iphu ono asuje: “Tugbua!

Tugbu; gube ogbu-ochi ono; gube onye ejo-iphe ono!
⁸ Chipfu gwatawaru ngu ugwo ochi ndu i gbushiru l'onulo Solu; mbu onye ono, i no l'aba-eze, o shi ndu ono. Chipfu nafuwaru ngu ali-eze ono woru nu nwa ngu, bu Abusalomu. Humanu l'ejo-ememe, iime gudeshiwaru ngu; kele i bu o-gbu-ochi!”

⁹ Oo ya bu; Abishayi; nwa Zeruya su eze: “?Denu g'o gude odzu nkuta-a ndu ephu gube nnajiuphu mu, bu eze iphu? Jiko hanaa mu ge mu je egbubufu iya ishi.”

¹⁰ Eze su iya: “?Bu gunu be mu l'unu jigba; unube unwu Zeruya? O -buru l'oo Chipfu ziru iya g'o phu mu iphu obu; ?bu onye a-du ike jia ya su: “?Bu gunu kparu iphe, iime nno?” ” ¹¹ No iya; Dévidi bya epfuaru Abishayi yele ndu-ozu iya g'ephe ha su: “Unu lewaro l'oo nwa mu, shi mu l'ephe be achu ishi ndu mu. ?Bu chia onye owana, bu onye Benjaminu-a be ta a-kabadaru njo? Unu paru iya haa g'o phu mu iphu obu; kele oo Chipfu ziru iya ya. ¹² O nweru-a g'oo-du; Chipfu elee enya huma egube ejo-iphe, dapfutaru mu nu; l'oo-meeru mu iphe-oma gude pfua mu ugwo iphu-a, eepushi mu ntanu-a.” ¹³ Noo ya; Dévidi yele ndu nkiya ono kwasokpoerupho gbororo uzo ono; Shimeyi kwaseru aguga ubvu, no chebe iphu l'ibiya ophu Dévidi no. O ndu eje bya epushi iya iphu; atu iya mkpuma; bya aphuru iya nu. ¹⁴ Eze yele ndu ono, yee ya tuko swiru ono bya e-jerwu aka ephe eje; ike bvushikotawa phe; ephe jerwua bya anodu l'eka ono rokota ike.

Ahitofelu ezi Abusalomu ejo-nzi

¹⁵ Tobudu iya bu; Abusalomu yele ndu ono l'ophu; mbu unwoke Izurelu wuru zebata le Jierusalemu. Ahitofelu tsokwaru phe pho. ¹⁶ Oo ya bu; Hushayi, bu onye Aku, bu onya Dévidi jepfu Abusalomu je asu iya:

“Nõdukwa ndzũ ogologo; gũbe eze! Gũbe eze! Nõdukwa ndzũ ogologo!”

¹⁷ Abũsalomu bya asũ Hushayi: “?Bũ n-yemobu, i yeru ònyà ngu õbu-a baa? ?Bũ gũnu meru g'o gude õphu unu l'ònyà ngu ta aswĩdu?”

¹⁸ Hushayi sũ Abũsalomu: “Waawaa; kẹle ọo onye ọphu Chipfu; mẹ ndu-a; waa ndu Ízurẹlu l'ophu họtaru bẹ mu a-bũru nkiya. Ọ bũru iya bẹ mu l'iya a-nõduwaro ya. ¹⁹ Tẹmanu; ?bũ onye bẹ ọ gbaru gẹ mu jeru ozi; bũ nna tọo nwa? Ọo nwa bẹ mu e-jeru ozi. Ọo ẹgube mu shi ejeru nna ngu ozi bũ gẹ mu e-jekwarupho gũbedua ozi.”

²⁰ Abũsalomu bya asũ Ahitofẹlu: “Chì-koshikwa mu idzu iphe, anyi e-me.”

²¹ Ahitofẹlu pfunaaru Abũsalomu sũ iya: “Je ejep-fukọta unwanyi ono, ndu ọphu abũ-zidu unyomu nna ngu ono; mbũ g'unu l'ẹphe kwa akwakwa nwoke yẹle nwanyị; mbũ unwanyi ono, ọ harũ g'ẹphe leta ibe eze ẹnya ono. Ọo teke ono bẹ ndu Ízurẹlu l'ophu a-nũma l'i mewaru onwongu ì nõdu eshiwaa nna ngu tũkuruba; tẹme obu akabakwaphọ eshihu ndu ono, etso ngu nũ ono ike.” ²² Ọo ya bũ; a bya akpọberu Abũsalomu ọlo-ẹkwa l'eli mkpotsu-ọlo ibe eze; Abũsalomu jepfu unwanyi ono, abũ-zidu unyomu nna iya ono l'ẹka ndu Ízurẹlu l'ophu ele iya ẹnya.

²³ Teke ono bẹ mgbazi Ahitofẹlu shi adũjeepho g'ẹgube, eejeje l'ajì l'ẹka Chipfu-a. Ọ bũru ẹgube ono bẹ Dévidi yẹle Abũsalomu shi ewotaje mgbazi Ahitofẹlu.

17

Hushayi ezi Abũsalomu ẹjo-nzi

¹ Ahitofẹ̀lu bya ekua Abusalomu sù iya: “Haa gẹ̀ mu họt́a unu unwoke ukporo l'iri g'anyi tũgbua je achia Dé-vidi ọ̀so l'ẹ̀nyashi-a. ² Mu a-bapfu iya teke ike bvũshiaru iya; ọ̀ dũwaa gọ̀logolo. Mu emee gẹ̀ ndzũ-agũgu rwuta iya gẹ̀ ndu ono, yẹ̀e ya swi l'ophu ono gbakashihu. Mu agbẹ̀ teke ono woru eze gbugbua nwẹ̀kinyi iya. ³ Mu e-duphutakotaru ngu ndu ono azũ. Onye ono, iicho -nwũhuwaa bẹ̀ ndu ophuu g'ẹ̀phe ha lwakotawaru azũ. Ndu ono g'ẹ̀phe ha bẹ̀ ta adũdu mẹ̀ onye lanũ, a byaru e-merwu ẹ̀hu.” ⁴ Iphe ono tũko dũ Abusalomu yẹ̀e ndu bũ ọ̀gerenya ndu Ízurẹ̀lu l'ophu ree.

⁵ Abusalomu bya asũ: “Unu kufua Hushayi, bũ onye Akũ g'anyi nũmafua iphe, oo-pfu.” ⁶ Hushayi byapfuta ẹ̀ ya phọ̀; Abusalomu sù iya: “Wakwa iphe Ahitofẹ̀lu pfuru baa. ?Bũ g'anyi mee iphe, o pfuru? Teke ọ̀dumeka yekwaa ọ̀nu nkengu.”

⁷ Ọ̀o ya bũ; Hushayi bya asũ Abusalomu: “Idzu, Ahitofẹ̀lu chĩ-koshiru ngu k'ọ̀giya-a ta adũkwa ree. ⁸ Í mahawarũ gẹ̀ nna ngu gbaru; mẹ̀ ndu nkiya. Ẹ̀phe bũkota ndu ike dũ l'ọ̀gu; emebe ẹ̀huka g'agũ, a chĩtarũ unwu iya. A -gũfukpooro ono bẹ̀ nna ngu bũ onye k'ọ̀gu doru ẹ̀nya; yẹ̀le ndu ophuu ta abyadũ azẹ̀ l'ẹ̀ka lanũ l'ẹ̀nyashi-a. ⁹ Lenu; nta-a bẹ̀ o domiwaru onwiya l'ime ọ̀gba ọ̀zoo l'ẹ̀ka ọ̀zo. Ọ̀ -bũru l'ọ̀ fũtaru bya etsoo unu ọ̀gu nta-a; ndu ojọ̀gu ngu harũ nwũhu; bẹ̀ onye nũmakporu iya nũ a-sũkwa: ‘E gbushiakwaru nemadzũ shii l'echilabọ̀ ndu etso Abusalomu.’ ¹⁰ Je akpachaa lẹ̀ ndu ike dũ l'ọ̀gu; mbũ ndu ono, obu shihuchaaru ike g'oduma ono bẹ̀ ndzũ-agũgu e-rwutachakwaa; noo kẹ̀le ndu Ízurẹ̀lu l'ophu bẹ̀ maru lẹ̀ nna ngu bẹ̀ bũ onye ike dũ l'ọ̀gu; tẹ̀me ndu yẹ̀e ya swi bũ-chaaru ndu ọ̀kpehu dũ. ¹¹ Sũ-a; iphe, bũ idzu nkemu bũ gẹ̀ ndu Ízurẹ̀lu l'ophu

dzukọ̀be byapfuta ngu; e shikpọ̀o lẹ́ Danu jasú lẹ́ Biye-Sheba; mbú g'ẹ̀phe zahú g'ẹ̀ja, nọ́ l'agúga eze-ẹ̀nyimu; gúbedua l'onwongu e-duru phẹ́ jeshia ọ̀gu ọ̀bu. ¹² Ọ́o ya bú; anyi etsoo ya ọ̀gu l'ẹ̀ka anyi chọ́-vukpoẹ̀ru iya phọ́. Anyi adapyabẹ́ iya ẹ̀gube ono, iji ọ̀tsu anọ́duje adashì l'alì-a. Yẹ̀bedua l'onwiya waa ndu yẹ́e ya swì l'ophu bẹ́ ta adúdu onye ọ̀phu e-dobe ndzú m'onye lanú. ¹³ Ọ́ - búru l'o nweru mkpúkpu, o pyobaru; ndu Ízurẹ̀lu l'ophu e-gude eri bya lẹ́ mkpúkpu ono; bya eworu iya lọ́-tsua; lọ́o ya wuruwuru nwuru ye lẹ́ nsúda; k'ọ̀phu bú l'a ta abyadú a-húma m'ibiribe ẹ̀ja lanú l'ẹ̀ka ono.”

¹⁴ Abúsalomu mẹ́ ndu Ízurẹ̀lu l'ophu tọ́ko zúá sù: “Ídzu kẹ́ Hushayi, onye Akú bẹ́ kakwa kẹ́ Ahitofẹ̀lu ree.” Iphe, kparú iya nù bú lẹ́ Chipfu chì-buwaru gẹ́ ya shi nno kpakashìá ọ̀kpobe idzu ono, Ahitofẹ̀lu chì-koshiru ono; k'ọ̀phu Chipfu e-shi nno mee g'ẹ̀jo-iphe dapfuta Abúsalomu.

Ama gbaru Dévidi; ọ́ gbalaa

¹⁵ Tọ̀budu iya bú; Hushayi bya akaru Zadọ́ku yẹ́e Abyiyata, bú ndu-uke Chileke idzu ono, Ahitofẹ̀lu chì-koshiru Abúsalomu yẹ́le ndu bú ọ̀gerenya ndu Ízurẹ̀lu ono; waa ọ̀phu yẹ̀bedua l'onwiya chì-koshiru phẹ́. ¹⁶ Sù: “Unu mee ẹ̀gwegwa zia ozi g'e zia Dévidi sù iya g'ọ́ tọ́ kwakwa akwakwa l'ẹ̀ka eerwuje ẹ̀nyimu Jíọ́danu er-wurwu l'echiẹ̀gu ono. G'ọ́ tọ́ dúkwa iphe, e-me g'ọ́ tọ́ dafú azú iya ọ̀phuu; ọ́ -dúdu bẹ́ aa-túkọ́kwa yẹ̀bedua bú eze waa ndu yẹ́e ya swì kpo g'eekpoje ntú-a.”

¹⁷ Teke ono bẹ́ Jionatanu yẹ́le Ahimaazu anọ́duje lẹ́ Enu-Rogelu; kẹ́le ẹ̀phe ta tọ́du ama abahú lẹ́ mkpúkpu Jierúsalemú. Ọ́ búru nwata nwamgbọ́ko, eje ozi bẹ́ eezije g'ọ́ je ezia phẹ́ ozi; ẹ̀phe eje ezia ya eze, bú Dévidi.

¹⁸ Ọ́le o nweru nwokorọ́bya lanú húmaru phẹ́ nù; o

je edooru iya Abusalomu. Ephenebo meeḗpho eḡwegwa lufu l'eka ono tṗgbua jeshia ibe nwoke, bu lẹ mkpṗkpu Bahurimu. Nwoke ono nweru wẹlu l'oma-unuphu ibe iya. Eḗphe nyiba l'ime wẹlu ono. ¹⁹ Nye nwoke ono chita iphe kpuchite onu wẹlu ono; bya eworu akpuru mebyi iphe susaa l'eli iya. Oḗphu o tṗ dudu onye maru nu. ²⁰ Ndu ozi Abusalomu byapfutaḗpho nwanyi ono l'ulo; eḗphe jia ya su: “?Bu aweya be Ahimaazu ye Jionatanu no?”

Nwanyi ono su phe l'eḗphe daakwaru azu nggele pho tṗgbua.

Eḗphe choo phe; oḗphu eḗphe ahumaduru phe; eḗphe laphushia azu lẹ Jierusalemu. ²¹ Ndu ono lashichaepho; Ahimaazu ye Jionatanu shi lẹ wẹlu ono nyifuta tṗgbua jeshia ezi eze, bu Dévidi ozi ono. Eḗphe rwua bya akoro iya eḡube idzu, Ahitofelu chiru; bya asu iya g'o tṗgbuekwapho nta-a dafu azu enyimu azu iya oḗphuu. ²² Noo ya; Dévidi ye ndu ye ya swi tṗgbua je adaa enyimu Jiordanu. Nchi bohushia; oḗphu o nweedu onye oḗphu phoduru nu; eḗphe dafukotawa azu enyimu Jiordanu.

²³ Ahitofelu humaepho l'o tṗ budu idzu nkiya be e tsoru; o nyikota eli nkapfu-igara iya gbagbua; o buru iya ala ibe iya lẹ mkpṗkpu, o shi. O larwua bya edozichaa ibe iya g'oo-du; o je aswi-gbua onwiya. Oo ya bu; o nwuhu; e lia ya l'ilu nna iya.

²⁴ Dévidi tṗgbua jeshia mkpṗkpu Mahanayimu; Abusalomu ye unwoke ndu Izurelu l'ophu, eḗphe l'ia swi, daa enyimu Jiordanu kwaseru. ²⁵ Abusalomu woru Amasa mee onye-ishi ndu ojogu iya l'ozo Jiowabu. Amasa be bu nwatibe onye Izurelu, epha iya bu Itura. Itura ono be luru Abigelu, nwada Nahashi bya aburu nwune Zeruya, bu ne Jiowabu. ²⁶ Abusalomu ye ndu Izurelu je adoru l'ali Giladu.

²⁷ Dévidi byarwutaẹpho Mahanayimu; Shobi nwa Nahashi kẹ mkpụkpu Raba, dụ l'alì ndu Amọnu; mẹ Makiya nwa Amiyẹlu kẹ mkpụkpu Lodeba; mẹ Bazilayi, bụ onye Giladu, shi lẹ mkpụkpu Rogelimu; ²⁸ vukọo iphe vutaru Dévidi yẹe ndu yẹe ya swị g'ẹphe riye. Iphe, ọ bụ bụru iphe-azẹe; mẹ eze gbamụgbamu; mẹ iphe, a kpụshiru l'ẹja; mẹ witi; mẹ balị; mẹ ereshi, e gweru egwegwe; mẹ ọphu a hụru ahụhu; mẹ azamu; mẹ ọkpa; ²⁹ mẹ manụ-ẹnwu; mẹ mini ẹra-eswi, tọru atọto; mẹ aturu; mẹ mini ẹra-eswi, hụkoru ahụko. Noo kẹle ẹphe sụru lẹ Dévidi phẹ bẹ ẹgu agụwa; ike bvụshiwa phẹ; tẹme ẹgu mini nọdu agụkwa phẹ phọ l'echiẹgu.

18

Anwụhu Abusalomu

¹ Tọbudu iya bụ; Dévidi bya akpakọo ndu yẹe ya swị; bya ahọta ndu-ishi ojọgu kẹ ndu ọphu dụ unu labọ l'ụkporo iri iri; bya ahọta ndu-ishi ojọgu kẹ ndu ọphu dụ ụkporo ise ise. ² Dévidi bya eye ndu ojọgu ono g'ẹphe tughua. Nkereto lẹ ndu ojọgu ono bẹ bụ Jiowabu bụ onye-ishi phẹ; nkereto ọzo bụru Abishayi; nwa Zeruya; mbụ nwune Jiowabu, bụ onye-ishi phẹ; nkereto ọzo bụru Itayi onye Gatu bẹ bụ onye-ishi phẹ. Eze sụ ndu ono: “Mbẹdua l'onwomu a-fulakwapho bya etsoru unu jeshia.”

³ Obenu lẹ ndu ono sụru iya: “Ọ tọ dụkwa iphe bya eme g'i tsoru anyi je; kẹle ọ -bụru l'anyi yeru ọkpa l'oso bẹ ẹphe ta akpadu anyi ishi. Ọ -bụru lẹ nkeru-ẹbo l'ime anyi nwushihuru bẹ ẹphe ta abyadu akpa anyi ishi. Gụbedua l'onwongu ha g'anyibedua ụkporo unu nemadzụ l'unu ise. Sụ-a; iphe, kachia ree bụ g'ị nọduchia lẹ mkpụkpu; gbẹ l'ẹka ono bụchiaru agbarike anyi.”

⁴ Eze sù phẹ: “Ọo iphe, unu rìkpoerupho l'ọ kaa ree bẹ mu e-me.” Ọo ya bụ; eze bya apfucha l'aguga ọnu-abata mkpukpu ono; ndu ono nọdu awughatagbaa; ndu ọphu adu ukporo ise ise; ndu ọphu adu unu labo l'ukporo iri iri. ⁵ Eze nmaru okwa nu Jiowabu; me Abishayi; me Itayi su: “Unu gudekwaro iswi ehu mbedua haa eme nwokorobyia ono, bu Abusalomu iphe kpanganga-a.” Ndu ono l'ophu numakota g'eze nmaru okwa ehu Abusalomu yechaa ndu-ishi ndu ojogu ono l'eka.

⁶ Ọo ya bu; ndu ono wuru jeshia l'oma egu je etsoo ndu Izurelu ogu. O buru l'oswa Ifuremu be ephe no lwa ogu ono. ⁷ Ndu ke Dévidi nodu l'eka ono lwu-kpee ndu ojogu ndu Izurelu. Ndu e gburu egbugbu mboku ono paa eka apaa. Ephe du ukporo unu nemadzu ugbo labo l'unu iri.* ⁸ Ogu ono swokobe dzuru ali ono l'ophu. Ndu nwuhuru nu l'ime oswa mboku ono ka ndu ọphu e gude ogu-echi gbushia.

⁹ A nodu alwu ogu ono; Abusalomu yele ndu ojogu Dévidi dzugbabe. Teke ono be Abusalomu agba inyamulu iya; inyamulu ono gbaba le mkpula eze achi. Ekali achi ono kota Abusalomu l'ishi; o kwaa iphe l'echi; kuaaha eregede l'ekali achi. Inyamulu ono, o shi agba ono gbakwaseru tugbua. ¹⁰ Nwoke lanu huma iya; je edooru iya Jiowabu su: “Lenu; mu humakwaru Abusalomu g'ọ kwakoru aku eregede l'achi.”

¹¹ Jiowabu ja nwoke ono, pfuru iya iphe ono su: “?I suru l'oo gunu? ?I humaru iya l'enya to? ?Bu gunu meru g'ọ gude ọphu i ti chitaduru iya tua l'ali l'eka ono. Mu gege anu ngu pho shekelu mkpola-ochaa iri; waa akpo, eekebutaje l'upfu.”

* 18:7 18:7 BỤ iya bu 20,000, le mbekee.

¹² Nwoke ono sụ Jiowabu: “Obetakpọo e jee aparu shẹkelu mkpọla-ọchaa, dụ unu labọ l'ụkporo iri dẹe mu l'ẹka; mu tege ahalikwa ẹka k'egbutsu nwatibe eze; l'ẹka anyi nūmakwaru-a ọkwa, eze nmaru ye unu lẹ Abishayi; mẹ Itayi l'ẹka sụ: ‘G'unu gudekwa kẹ yẹbe eze gbobuta nwokorọbya ono, bụ Abusalomu.’ ¹³ Sụ-a; ọ -bụ lẹ mu jeru etsebe ndzụ mu l'ọnu ẹta; woru Abusalomu gbua; g'o to nwedu iphe, eedomiru eze edomi-a; mẹ unu apfuri becharu je apfuru paru mu buhaa.”

¹⁴ Tọbudu iya bụ; Jiowabu sụ: “Mu taa kwabekotaduru ngu egube ono.” Ọ chita arwa ẹto je anmaa Abusalomu l'obu; lẹ gẹ Abusalomu nọkwadu ndzụ l'eli achị ono. ¹⁵ Unwokorobyia iri, bụ ndu achijeru Jiowabu ngwọgu nọ-phae Abusalomu mgburugburu woru iya gbugbua; ọ nwụhu.

¹⁶ Noo ya; Jiowabu bya egbua opu gude sephuta ndu ojogu ono azụ. Ọo ya bụ; ephe haa achị ndu Ízurelu ọso. ¹⁷ Ephe bya apata odzu Abusalomu chie l'eze iduma, nọ l'ọswa l'ẹka ono; kwaa ikpo mkpuma kùbe iya l'eli. Ndu Ízurelu gbẹ teke ono tuko tsukahụ; onyenonu lashia ibe iya.

¹⁸ Teke Abusalomu nọ ndzụ bẹ ọ pataru òbvúru je ebvube lẹ Nsuda Eze g'ọ bụru iphe, ee-gudeje nyata iya; kẹle ọ riru sụ: “Mu te enwedu nwa nwoke, ee-gudeje nyata epha mu.” O woru epha nkiya gube òbvúru ono. A nọdu anọduje eku iya iphe, e gude anyata Abusalomu byasụ ntanụ-a.

Eepfuru Dévidi k'anwụhu Abusalomu

¹⁹ No iya; Ahimaazu nwa Zadọku sụ: “Gẹ mu bya agbagbua je ezia eze lẹ Chipfu bẹ nafutawaru iya l'ẹka ndu ọhogu iya.”

²⁰ Jiowabu sù iya: “Ọ tọ̀ bụ̀du gùbedua bẹ̀ ọ̀ gbaru g'i jeshia ezi ozi ntanụ̀-a. O -rwua mbọ̀ku ọ̀zo; l'i jearọ̀ ezia ya ozi. Ọ̀ -bụ̀ru kẹ̀ ntanụ̀-a bẹ̀ ọ̀ tọ̀ gbaduru g'i je ezia ya ozi; noo kẹ̀le nwatibe eze bẹ̀ nwuhuru nù.” ²¹ Ọ̀o ya bụ̀; Jiowabu pfiaru nwoke, shi l'alì Kushi sù iya: “Tugbua je akọ̀oru eze iphe, ì hụ̀maru.” Onye Kushi ono phozeru Jiowabu iphu l'alì; bya agbagbua; ọ̀ bụ̀ru iya ejeje.

²² Ahimaazu nwa Zadọ̀ku bya epfukwaaru Jiowabu ọ̀zo; sù iya: “Haarọ̀ gẹ̀ mu gbatsoru onye Kushi ono azụ̀ l'azụ̀; obetakpọ̀o gụ̀nu je e-me.”

Jiowabu sù iya: “Nwa mu; ?bụ̀ gụ̀nu meru g'o gude ọ̀ dū̀ ngu g'i je? O to nwedu obunggo, ee-bu ngu l'ozi ono.”

²³ Ọ̀ sù iya: “Obetakpọ̀o gụ̀nu je e-mee bẹ̀ mu jefutaje.”

Ọ̀o ya bụ̀; Jiowabu sù iya: “Gbagbunaa!” Ọ̀o ya bụ̀; Ahimaazu gbagbua shia ụ̀zo nsụ̀da ẹ̀nyimu Jiọ̀danu shi nno gbaghata onye Kushi phọ̀.

²⁴ Teke ono bẹ̀ Dévidi nọ̀ lẹ̀ mgbaka echilabọ̀ ọ̀nu-abata ime mkpụ̀kpu ono; waa ọ̀phu nọ̀ mẹ̀ a -nọ̀du alụ̀fu alụ̀fu. Onye-nche nyihu eli igbulọ̀ ono, e gude kpua ọ̀nu-abata ono je apfuru l'eli iya. Onye-nche ono jeshia ele ẹ̀nya; ọ̀ hụ̀ma nwoke, agbakpọ̀epho ọ̀so nwẹ̀kinyi iya. ²⁵ Onye-nche ono kua eze oku; pfiaru iya ya. Eze sù: “Ọ̀ -bụ̀ru l'ọ̀ swì nkị̀nyi iya; bẹ̀ bụ̀ ozi, dū̀ ree bẹ̀ ọ̀oby ezizi.” Nwoke ono nọ̀du agbakpọ̀epho abya ntse ntse.

²⁶ Ọ̀o ya bụ̀; onye-nche ono tufu ẹ̀nya hụ̀ma nwoke ọ̀zo, agbakwaphọ̀ ọ̀so abya. O kua onye-nche ọ̀nu-abata mkpụ̀kpu sù: “Lenu; onye ọ̀zo agbakwa ọ̀so nwẹ̀kinyi iya abya!”

Eze sù: “Ọ̀o ozi, dū̀ ree bẹ̀ ọ̀obyakwapho ezizi.”

²⁷ Onye-nche ono sù: “Onye kẹ̀ mbụ̀ phọ̀ bẹ̀ ọ̀so iya gbẹ̀ dū̀ mu g'ọ̀ bụ̀ kẹ̀ Ahimaazu nwa Zadọ̀ku.”

Eze sù: “Ọ̀o ọ̀kpobe nemadzù bẹ̀ ọ̀bu; ọ̀ b̀uru ozi, dù ree bẹ̀ ọ̀obyaje ezizi.”

²⁸ Noo ya; Ahimaazu gbarwuta bya ekua eze sù iya: “Iphemiphe d̀ukotaekwapho ree-o!” O phozeta buaru eze iphu l'ali sù: “G'ajaja b̀uru kẹ̀ Chipfu, b̀u Chileke ngu! O wofuwarù ndu ono, haliru ẹ̀ka g'ẹ̀phe g̀bua g̀be nnajìuphu mu, b̀u eze.”

²⁹ Eze jìà ya sù: “?To nwed̀unu iphe, meru nwokor̀bya ono, b̀u Ab̀usalomu?”

Ahimaazu sù iya: “Mu h̀maru g'aatù ẹ̀jo ̀uzu lẹ̀ teke ono, Jiowabu eme g'o zia m̀be nwozi g̀be eze ozi-a. Ọ̀le mu ta amakwanù ishi ̀uzu ono, aatù ono.”

³⁰ Eze sù iya: “Ghak̀be p̀furu l'ẹ̀ka-a.” Ọ̀o ya b̀u; ọ̀ bya aghachi p̀furu l'ẹ̀ka ono.

³¹ Ọ̀o ya b̀u; onye Kushi ono byarwuta bya asù: “G̀be nnajìuphu mu, b̀u eze; ǹmakwa ozi ẹ̀hu-̀tso! Lẹ̀ ntanù-a bẹ̀ Chipfu naf̀takotawaru ngu l'ẹ̀ka ndu wulihuru etso ngu opfu.”

³² Ọ̀o ya b̀u; eze jìà onye Kushi ono sù iya: “?To nwed̀unu iphe, meru nwokor̀bya ono, b̀u Ab̀usalomu?”

Onye Kushi ono sù iya: “G'iphe, b̀ukpoo ndu ọ̀hogu nnajìuphu mu, b̀u eze; m̀ekpoo iphe, b̀u ndu wulihuru etso ngu opfu d̀ukotaekwapho gẹ̀ nwokor̀bya ono.”

³³ Iphe ono rwua eze l'ẹ̀hu shii; ọ̀ nyìgobe jeshia l'̀ulo ọ̀phu a kp̀uru l'eli ọ̀nu-abata mkp̀ukpu je anọ̀du raahaa ẹ̀kwa. Ọ̀ nọ̀du eje bya arajẹ̀ sù: “G̀be nwa mu Ab̀usalomu; nwa mu-ee; nwa mu Ab̀usalomu! Ọ̀ -b̀u l'ọ̀o mbẹ̀dua nwùhuru; g̀bedua nọ̀duroya. G̀be nwa mu Ab̀usalomu; nwa mu-ee; nwa mu-eel!”

19

Jiowabu abarù Dévidi mba

¹ Tòbodu iya bụ; e je edooru Jiowabu sụ iya: “Eze bẹ agụkwa aphụ; bya ara ẹkwa Abụsalomu.” ² Alwụ-kpe ono, ndu ojọgu lwụ-kperu mbọku ono bya aghaa igharaphu bụru ndu ojọgu ono g'ẹphe haa iphe aphụ; noo kẹle ẹphe nūmaru g'aasụje l'eze bẹ akwakwa ẹkwa nwa iya ono nwuhuru nū ono. ³ Ẹphe tọ nwẹhu zitachaa onwophẹ ezita pyoba l'ime mkpụkpu mbọku ono; g'ẹgube ono, ndu iphere dū l'ẹphe gbaru ọso l'ọgu ezitajẹ onwophẹ ezita pyobata ono-a. ⁴ Eze kpuchia onwiya iphe l'iphu chia mkpu ẹkwa sụ: “Gube nwa mu Abụsalomu! Oowa-e Abụsalomu nwa mu; nwa mu-ee!”

⁵ Noo ya; Jiowabu bya ejepfu eze l'ime ụlo je asụ iya: “Nta-a bụ ndu nkengu, dzọru ngu ndzụ; dzọo ụnwu ngu; mẹ unyomu ngu; mẹ ụnwanyi, abụ-zidu unyomu ngu-a bẹ ị tukuru meru iphe-iphere kpua ntanụ-a; ⁶ Ọ bụru ndu ị dū ashi bẹ i yeru obu; kpọ-chia ndu yeru ngu obu ashi. Umere ngu ntanụ-a mewaru o doo ẹnya l'ọ tọ dudu iphe, ị gụberu ndu-ishi ndu ojọgu ngu; waa ndu-ozu ngu phẹ. Mu humawaru l'ẹhu gege agbẹ atso ngu uto ọme ọ -bụ lẹ Abụsalomu nọ ndzụ ntanụ-a; anyịbedua tuko g'anyi ha nwushihukota. ⁷ Ngwa; tūgbukwaa jepfu ndu-ozu ngu je eyeru phẹ njima. Mu gudekwa ẹpha Chipfu eriburu ngu angụ; l'ọ -buru l'ị tị gbeshiduru je; bẹ anyi a-wufu-gbukwa gbado ngu; o to nwedu mẹ onye lanụ ihumakwadu lẹ mgboru ngu l'enyashi-a. Ọ bụru ono a-bya akakota ngu atsụ l'ẹhu eme l'ẹjo-iphe, shikpọ teke ị bụ nwokorọbya nwutaru ngu byasụ ntanụ-a.” ⁸ Ọo ya bụ; eze bya agbeshi pata oshi iya je anọdu l'ọnu ẹka eeshije abahụ lẹ mkpụkpu ono. A bya akọru ndu ono sụ phẹ: “Unu lenu; eze nọkwa l'ọnu ẹka eeshije abata lẹ mkpụkpu-a.” Ndu ono tuko g'ẹphe ha wụ-pfuta iya.

Dévidi alaphu azụ lẹ Jierúsalemụ

Teke ono bẹ ndu Ízurẹ̀lu gbakashìhuwaru; onyenỌnu lashìchawa ibe iya. ⁹ Ndu Ízurẹ̀lu g'ẹ̀phe ha swọaha ọswo l'ipfu nọnu; ndu nọnu ẹ̀phe epfugbaa; asùje: “Ọo eze bẹ nafutaru anyi l'ẹ̀ka ndu Ọhogu anyi; bya adzỌta anyi l'ẹ̀ka ndu Filisitayinu. Obenu lẹ nta-a bẹ ọ gbafuru l'ali-a; ọ bọru opfu ẹ̀hu Abusalomu bẹ o gude gbafu obu. ¹⁰ Abusalomu-a, bọ onye ono, anyi wuru manu l'ishi g'ọ bọru eze anyi ono-a byawanu anwuhu l'ọgu. Sụ-a; ?bọ gunu meru g'o gude ọphu e te yedu ọnu g'ee-shi g'e duphuta eze azu?”

¹¹ Eze, bọ Dévidi bya ezia ozi g'e zia Zadọku yele Abyiyata, bọ ndu-uke Chileke sụ: “Unu jiedu ndu bọ ọgerenya ndu Jiuda sụ phẹ: “?Bọ gunu meru g'o gude ọ bọru unubẹdua eme g'unu kperu azu l'eme g'eze lwaphuta azu l'ibe iya; l'ẹ̀ka iphemiphe, ndu Ízurẹ̀lu l'ophu epfu rwuchawaru l'ẹ̀ka mube eze nọ l'ibe mu? ¹² Unubẹdua bẹ bọ unwunna mu; mbu lẹ mu l'unu tukoru bọru anu-ẹ̀hu waa mee lanu. Sụ-a; ?denuhununu g'o gude; ọ bọru unubẹdua bọ ikpazu lẹ g'ee-shi mee g'eze lwaphuta azu?” ¹³ Unu asu Amasa lẹ mu suru-a: “? Mu lẹ ngu ta abudu anu-ẹ̀hu lanu waa mee lanu tọo? Ọo gubedua bẹ mu e-gude dochia ẹnya Jiowabu g'i bọru ishi ndu ojogu mu shita ntanu-a kwaseru; ọ -dudu nno; gẹ Chileke gwakwa mu ọchi; mbu g'o mekwa mu ọphu ka njo!” ¹⁴ Ọo ya bu; o pfubuta ndu Jiuda; obu bya aburu phẹ nanu. Ẹ̀phe bya ezia sụ g'e zia eze sụ iya g'ẹ̀phe lẹ ndu nkiya tuko lwatashia.

¹⁵ Eze bya alwatashia; lwaberu ẹnymu Jiọdanu. Teke ono bẹ ndu Jiuda jewaru anodu lẹ mkpukpu Gilu-galu g'ẹ̀phe gba iya ndzuta; g'ẹ̀phe edughatawa iya ro l'ẹnymu Jiọdanu. ¹⁶ Tọbudu iya bu; Shimeyi; nwa Gera, bọ onye Benjiaminu kẹ mkpukpu Bahurimu mekebeephọ ẹ̀wegwa tsoru ndu Jiuda; ẹ̀phe jeshia agba

eze, bụ Dévidi ndzuta. ¹⁷ Ndu ipfu Benjiaminu, ẹphe l'iya swị bẹ dụ unu labọ l'ụkporo iri; waa onye-ozì ọnu-ulo Sọlu, bụ Ziba; yẹle unwu iya unwoke, dụ iri l'ise; waa ndu-ozì iya ụmadzu ụkporo. Ẹphe mee ẹgwegwa je agba eze ndzuta l'ọnenyimu Jíọ́danu l'ẹka ọ nọ. ¹⁸ Ẹphe rwughata ẹnyimu Jíọ́danu g'ẹphe kughata ndibe eze; tẹme waa g'ẹphe meeru eze iphe, ọ dụ iya g'e meeru iya.

Dévidi agụru Shimeyi nvụ

O be gẹ Shimeyi; nwa Gera daerupho ẹnyimu Jíọ́danu; ọ daa kpurumu l'atatiphu eze; ¹⁹ sụ iya: “Pakwarụ haa; jiko nnajịuphu mu l'ẹka mu mesweru ngu. Te ejekwa anyata iphe, dụ ẹji, mụbe nwozi ngu meru gụbe nnajịuphu mu, bụ eze lẹ mbọku ono, i shi Jierúsalemụ tughua ono. Eze; jiko wofukwa iya l'obu ngu. ²⁰ Noo kẹle mụbe nwozi ngu maru-a lẹ mu meru iphe-ẹji; ọle ọ kwanụ mbẹdua bụ onye ivuzọ l'ọnulo Jíosefu l'ophu, byaru ntanụ-a bya agba gụbe nnajịuphu mu, bụ eze ndzuta.”

²¹ Ọo ya bụ; Abishayi; nwa Zeruya sụ: “Ọ gbaru g'e gude k'iphe-a gbua Shimeyi; noo kẹle ọo iphu bẹ o phuru onye Chipfu wụru manụ g'ọ bụru eze.”

²² Dévidi sụ: “?Bụ gụnu bẹ mu l'unu jigba; unubẹ unwu Zeruya; meru g'o gude unu je a-bụru ndu etso mu opfu lẹ ntanụ-a? ?Ọ gbaru g'o nweru onye ee-gbu egbugbu l'alì Ízurẹlu ntanụ-a? ?Tọ lẹ mu ta amadụ l'ọo mbẹdua bụ eze ndu Ízurẹlu ntanụ-a?” ²³ Ọo ya bụ; ọ sụ Shimeyi: “E tee gbudu ngu rọ ya.” Eze kwee ya ukwe ribuaru iya nte.

Dévidi emeru Mefiboshẹti iphe-oma

²⁴ Nwanwa Sọlu, bụ Mefiboshẹti tughbukwapho jeshia eze ndzuta. Ọ tọ nwụbejeduru ọkpa iya ẹnya; ọphu ọ tọ kpụbotajeduru ẹjí-agba iya akpụbota; ọphu ọ sajẹduru

uwe iya asasa e -shi mbọ̀ku ono, eze lufuru tugbua; jasụ mbọ̀ku, ọ lwaphutaru azụ l'ẹ̀hu-guu. ²⁵ O shiẹ̀pho Jierúsalemu bya gẹ ya gba eze ndzuta; eze jia ya sụ: “Mefiboshẹti; ?bụ gụnu meru g'o gude ọp̄hu i ti tsoduru mu tugbua?”

²⁶ Ọ sụ: “Gube nnajiuphu mu, bụ eze; eshinu mube nwozi ngu bụ ẹniyeni be mu sukwaru nwozi mu g'o doziaru mu nkapfu-igara mu gẹ mu nọdu iya gbaru tsoru gube eze; obenu le nwozi mu ono, bụ Ziba ghoru mu ugho. ²⁷ Teme ọ byawa bya epfutoşhia mube nwozi ngu l'eka gube nnajiuphu mu, bụ eze nọ. Ọle gube nnajiuphu mu, bụ eze be du-a g'ojosi Chileke. Iphe, dukpoe ngu pho ree; mee ya. ²⁸ Iphe, shi rwube ndu onu-ulo nna mu l'ophu bu g'ephe nwushihu l'iphu nnajiuphu mu, bụ eze; Ọle e mecharu i woru mube Mefiboshẹti, bụ nwozi ngu dobe gẹ mu yiru le ndu a-nọduje eri nri le teburu nkengu gededede. O to rwubeekwaru mu me ililekpoo gẹ mu rajebaaru kpua gube eze.”

²⁹ Eze sụ iya: “?Bụ opfu ẹhu ngu be ii-gudewarọ epfupfu? Mu sụwaru gẹ gụ le Ziba kekaha ali ono!”

³⁰ Mefiboshẹti sụ eze: “Haa gẹ Ziba wotakotaro iphemiphe; eshinu e mecharu gube nnajiuphu mu, bụ eze lwarwuta ibe ngu l'ẹ̀hu-guu.”

Dévidi emeru Bazilayi iphe-oma

³¹ Bazilayi ke Giladu be shi le mkpukpu Rogelimu bya gẹ ya tsoru eze daa ẹnyimu Jiordanu; mbụ gẹ ya dughata iya ẹnyimu Jiordanu. ³² Bazilayi be buwaa ọgerenya shii. Ọ nọwaru ukporo apha ẹno. Ọ bụ nwoke nweru iphe shii k'ophu bụ l'oo ya shi anuje eze nri teke ọ nọ le Mahanayimu. ³³ Eze sụ Bazilayi: “Tsuru mu daa ẹnyimu-a; g'anyi je anodu le Jierúsalemu k'ophu mu a-nodu eleta ngu ẹnya ree.”

³⁴ Bazìlayi sù eze: “?Mu a-nọ́fua apha ole nta-a kẹ́ gẹ́ mu tsoru gùbe eze lashia Jierúsalemu? ³⁵ Iphe, mu nọ́waru nta-a bukwa ukporo apha eno. ?Mu makwaduru iphe, dù ree waa iphe, dù eji? Tọ́ ?mu adu ike amakwaduru utso iphe, mu eri eriri; ọ́zoo ọ́phu mu angu angungu? Tọ́ ?mu adu ike anumakwadu olu-ebvu unwoke; ọ́zoo k'unwanyi? ?Bu kẹ́ gunu bẹ́ mube nwozi ngu a-bya aburu ivu-erwa duru gube nnajiuphu mu, bu eze? ³⁶ Mube nwozi ngu bua gẹ́ mu duriberu ngu nwanshi l'azu enyimu Jiordanu azu iya ọ́phuu. ?Bu kẹ́ gunu bẹ́ gube eze e-gude bua mu obunggo ọ́phu ha egube ono? ³⁷ Haarọ́ gẹ́ mube nwozi ngu lashia k'ọ́phu mu a-nodu lẹ́ mkpukpu eka mu shi nwuhu; mbu l'eka no-kube ilu nna mu waa kẹ́ ne mu ntse. Su-a; waa nwozi ngu, bu Kimuhamu baa; g'o tsoru gube nnajiuphu mu, bu eze dafu azu iya ọ́phuu; l'iimeeru iya iphe, dukpoe ngu pho ree.”

³⁸ Eze sù iya: “Kimuhamu bẹ́ e-tsoru mu-a dafu azu iya ọ́phuu; o buru iphe, dù ngu ree bẹ́ mu e-meru iya. Ọ́zo buru l'ọ́o iphe, i sukpoerupho gẹ́ mu meeru ngu bẹ́ mu e-meru ngu.” ³⁹ Ọ́o ya bu; ndu ono l'ophu dafukota azu enyimu Jiordanu azu iya ọ́phuu; eze bya adafukwapho. Eze bya eworu onu tsutsua Bazìlayi; goru onu-oma nu iya. Bazìlayi lashia ibe iya.

Ndu Ízurẹ̀lu ekoru ndu Jiuda okophoo

⁴⁰ Eze bya adaa enyimu ono jeshia mkpukpu Gilugalu; Kimuhamu tsokwaru iya pho. Ndu Jiuda l'ophu me nkeru-ẹ́bo ndu Ízurẹ̀lu tuko tsoru edu eze. ⁴¹ Noo ya; iphe, bu ndu Ízurẹ̀lu l'ophu zahu byapfuta eze bya asu iya: “?Denu g'o gude unwunna anyi phe, bu ndu Jiuda bya eduta gube eze lẹ́ mpya; mbu duta gu lẹ́ ndibe

ngu; mẹ́ ndu gú l'ẹ̀phe swì l'op̄hu dafùta azú ẹ̀nyimu Jìódanu?"

⁴² Ndu Jiuda l'op̄hu t̀kọ́ g'ẹ̀phe ha yeeru ndu Ízurẹ̀lu ọ̀nu sù phẹ́: “Ip̄he, kparù iya nù bẹ́ bụ́ l'anyi l'eze bẹ́ ka abụbu. Sù-a; ?bụ́ gúnú meru ip̄he, ẹ̀hu eḡhu unu eḡhu lẹ́ k'ip̄he ono? ?O nweru ip̄he, shi eze l'ẹ̀ka anyi riru? Tọ́; ?o nweru ip̄he, anyi natarù g'ọ́ b̀ru nkanyì?”

⁴³ Ọ́o ya bụ́; ndu kẹ́ Ízurẹ̀lu yeeru ndu Jiuda ọ̀nu; sù phẹ́: “Ẹ̀ka anyi d̀kwa l'ẹ̀hu eze ugbo iri. Ọ́o b̀kpoo ru nù l'anyi kakwa iya unu enweru. ?Dẹ̀hunu g'o gude; ọ̀phu unu ag̀beduru anyi ip̄he? ?Tọ́ b̀na anyìbedua vu ụ́zo wata ep̄fu g'ee-shi g'e duphuta eze azú?”

Ọ́le ndu kẹ́ Jiuda gbẹ́ kabaanù eyeru ndu Ízurẹ̀lu ọ̀nu ẹ̀huka ẹ̀huka.

20

¹ Tọ́budu iya bụ́; o nweru ọ̀galemkpa nemadzù, nọ́ l'ẹ̀ka ono, ẹ̀pha iya bụ́ Sheba nwa Bikiri. Ọ́ bụ́ onye ip̄fu Benjaminu. O woru op̄u gbua chishia mkpu sù:

“Ọ́ tọ́ d̀kwa òkè, anyi nweru l'ẹ̀hu Dévidi.

Ọ́ tọ́ d̀kwa okip̄he, anyi nweru l'ẹ̀hu nwa Jiesi!

Unubẹ́ Ízurẹ̀lu; g'onyenọ̀nu lashia ibe iya-o!”

² Ọ́o ya bụ́; ndu Ízurẹ̀lu l'op̄hu gbadochaa Dévidi je awù-tsorù Sheba nwa Bikiri. Ọ́le ndu kẹ́ Jiuda nọ̀ep̄ho nọ̀nyabe eze shitakpọ́o l'ẹ̀nyimu Jìódanu jasù lẹ́ Jierúsalemù.

³ Dévidi bya alarwua ibe iya lẹ́ Jierúsalemù; bya achita unwanyi iri ono, abù-zidu unyomu iya ono, ọ́ harù g'ẹ̀p̄he nọ́du leta ibe eze ẹ̀nya ono. Ọ́ ch̀ru phẹ́ ye l'ùlo ẹ̀ka a nọ́ eche phẹ́ nche. Ọ́ nọ́du azù phẹ́ lẹ́ nri; ọ́le o to jep̄fjeduru phẹ́. E wuchia phẹ́ l'ime ụ́lo; ẹ̀p̄he nọ́du ọ̀nodu unwanyi, ji phẹ́ anọ̀edu jasuru ẹ̀p̄he nwùshihu.

⁴ No iya; eze bya bya ezia Amasa sù iya: “Gude ujiku ẹ̀to

kukọ́oru mu ndu Jiuda g'unu l'ẹ̀phe tũko wu-pfuta mu l'ẹ̀ka-a.”⁵ O be teke Amasa jeru gẹ ya kukọ́o ndu Jiuda ọ́bu; o je anọghata teke eze tũ-buru iya.⁶ Dévidi bya asu Abishayi: “Ejo-iphe, Sheba nwa Bikiri e-me anyi bẹ kakwa ọ́phu Abusalomu meru. Chĩta ndu-ozí mụ́be nnajĩuphu ngu chĩpyabe iya; ọ́dumeka bẹ ọ́o-bahụ́kwa lẹ mkpụ́kpu, a kpụ́-pheru igbulọ́ mgburugburu; nahụ́ anyi gbalaa.”⁷ Ọ́o ya bụ; Abishayi chĩtanu ndu ojọ́gu Jiowabu; mẹ́ ndu Kereti; mẹ́ ndu Pẹ́leti; mẹ́ ndu bụ́kpoo ndu ike dũ l'Ọ́gu; ẹ̀phe shi lẹ́ Jierúsalemu tũgbua jeshia achí Sheba nwa Bikiri.

⁸ O be teke ẹ̀phe nọkwadu l'oke mkpuma, nọ́ lẹ́ mkpụ́kpu Gibiyọ́nu; Amasa byapfutashia phẹ́. Teke ono bẹ́ Jiowabu yeru uwe ojọ́gu iya; gude akpọ́, o we l'upfu gude kebuta ogu-echi, a tsuru ọ́bo. O jeshia ahata ọ́kpa; ogu-echi ono shi l'ọ́bo iya mífú daa.⁹ Jiowabu bya ajiá Amasa sụ́ iya: “?Ehu dṹ ngu-a ree; nwanna mu?” Jiowabu bya eworu ẹ́kutara dẹ́ Amasa l'ẹ́ji-agba gẹ́ ya tsutsua ya ọ́nu.¹⁰ Ọ́phu Amasa te elerwetaduru ẹ́nya hụ́ma ogu-echi, Jiowabu kpapyabẹ́ru l'ẹ̀ka. Ọ́o ya bụ; Jiowabu woru iya nmaa ya l'ẹ̀pho; akụ́repho iya kposhihu l'alí. Ọ́phu ọ́ nmaẹ́duru iya ogu-echi ono ọ́zo; ọ́ bụ́waru iya nṹ anwụ́hu.

Ọ́o ya bụ; Jiowabu yẹ́le nwune iya, bụ́ Abishayi chĩpyabe Sheba nwa Bikiri.¹¹ Onye lanụ́ lẹ́ ndu ojọ́gu Jiowabu je apfuru lẹ́ mgboru Amasa asụ́je: “Onye sụ́ru lẹ́ Jiowabu dṹ iya l'obu; mbụ́ onye sụ́ru lẹ́ ya bụ́ kẹ́ Dévidi; g'onye ọ́bu tsonụ́ru Jiowabu!”¹² Noo ya; Amasa dabyiru l'echilabọ́ gbororo l'ẹ̀ka ono arwaswi onwiya lẹ́ mee ya. Ọ́ nọ́du abụ́jeru; onye jetaru rwua ẹ́ka ono; l'ọ́ kpọ́o beru. Nwoke ono hụ́maepho l'ọ́obujeru; onye jetaru rwua ẹ́ka ono; l'ọ́ kpọ́o beru; ọ́ lọ́cha Amasa l'ẹ́gbudu; chĩta kpowula-kpowula uwe phukputa iya.¹³ Ọ́ bụ́ru

g'a pafueru iya pho l'uzo ono be ndu ojoḡu ono l'ophu tukuru wuru tsoru Jiowabu chiahaa Sheba nwa Bikiri.

¹⁴ Sheba ghajakota iphe, bu ipfu, du l'ali ndu Izurelu je akpaa le mkpukpu Abelu-Betu-Maka. Ndu shi l'ipfu Bikiri g'ephē ha kpakodzua wu-tsoru iya.

¹⁵ Jiowabu me ndu ojoḡu iya phe bya bya ekephe mkpukpu Abelu-Betu-Maka mgburugburu; kebuta Sheba l'eka ono. Epehe bya akube eja gude kpu-buta mkpukpu ono; eja ono ndu rwua l'igbulo mkpukpu ono. Epehe ndu etsukposhi igbulo mkpukpu ono; g'ophofukwanu daa. ¹⁶ O nweru nwanyi maru mmamiphe, bu le mkpukpu ono, ara ora su: "Unu ngabekpodapho-o! Unu ngabekpodapho-o! Jiko ziaru mu Jiowabu g'o bya ge mu pfuru yeru iya." ¹⁷ Jiowabu bya ejekubeshia ya; nwanyi ono ja ya su: "Bu gubedua be bu Jiowabu?"

O su iya: "Ee."

Nwanyi ono su iya: "Ngabekwa nchi l'iphe, mube nwozi ngu nwanyi abya epfufu."

Jiowabu su iya: "Mu ngaberu-a nchi."

¹⁸ Nwanyi ono su: "Teke ndiche be e shi asuje: 'G'e jekwa akpata ishi le mkpukpu Abelu!' A -kpatawa ishi ono; eeshi nno doshia opfu, ada nu. ¹⁹ Su-a; anyi bu ndu du agu; teme anyi buru ndu e gude ire anyi eka l'ali Izurelu. Nta-a be iime g'i mebyishia mkpukpu, no onodu ne l'ali Izurelu. ?Denu g'o gude i ndu eme g'i lwua ndu bu okiphe Chipfu?"

²⁰ Jiowabu su: "Tuswekwa! Tuswekwa! G'o to bukwaru mu a-lwu mkpukpu unu; ozo mebyishia ya. ²¹ O to bukwa g'o du bu ono. Ole o nwekwanuru nwoke lanu, epha iya bu Sheba nwa Bikiri, shi l'ali ubvu ubvu ndu Ifuremu, bu onye kwefuru eze, bu Dévidi ike. Unu -kputawa nwoke ono ye mu l'eka; mu alufu le mkpukpu-a."

Nwanyị ono sụ Jiowabu: “Ee-shi l'eli igbulọ tufuru ngu ishi nwoke obu.” ²² Tọbudu iya bụ; nwanyị ono gude mmamiphe iya ono jepfu ndu mkpukpu ono; ephe gbuta ishi Sheba nwa Bikiri woru tufuru Jiowabu. O woru opu gbua; ndu ojogu ono wufu le mkpukpu ono; onyenonu lashichaa ibe iya. Jiowabu laphu azu jepfushia eze le Jierusalẹmu.

Ndu-ishi Dévidi

²³ Oo Jiowabu be bu onye-ishi iphe, bukpo ndu ojogu l'ali ndu Izurelu. Benaya nwa Jiehoyada buru onye-ishi ndu Kereti me ndu Pleti. ²⁴ Adoniramu buru onye-ishi ogo ozi. Jiehoshafatu nwa Ahiludu buru onye akwakobeje iphe, meru ememe. ²⁵ Sheva buru onye edeje ekwo. O buru Zadoku ye Abiyata bu ndu-uke Chileke. ²⁶ Ira ke mkpukpu Jayi bukwarupho onye uke Chileke ke Dévidi.

21

Egu-ememe waa g'e gude gbushia unwu Solu

¹ O nweru teke egu mejeru l'ali Izurelu mkpurumkpuru apha eto le teke Dévidi bu eze. Dévidi bya akpaa Chipfu ishi iphe ono. Chipfu su: “Iphe, kparu iya nu bu l'ikpe ochi tukoru Solu ye onu-ulo iya l'ishi; kele o gbushiru ndu Gibiyonu.” ² Ndu Gibiyonu ono be ta abudu ndu Izurelu gededede. Ephe bu ndu phoduru nu le ndu Amoru. Ndu Izurelu riburu phe nte l'ephe e-dobe phe ndu. Solu gudekwanu 'amenya ke ndu Izurelu waa ndu Jiuda bya egbushigbua phe. Oo ya bu; eze, bu Dévidi bya akpakọ ndu Gibiyonu pfuru yeri phe. ³ O ja phe su: “?Bu gunu be mu e-meru unu? ?Denu ge mu e-me mezita unu; k'ophu unu a-goru onu-oma nu ndu ono, bu okiphe Chipfu?”

⁴ Ndu Gibiyọnu ono sù iya: “Anyi ta akpadu ishi mkpọ́la-ọ́chaa ọ́zoo mkpọ́la-ododo, shi Sọ́lu l'ẹ́ka; ọ́zoo ọ́phu shi l'ẹ́ka ndibe iya. Ọ́phu ọ́ tọ́ dọ́kpodanu anyi l'ẹ́ka g'anyi gbua nemadzù l'alì Ízurẹ́lu.”

Ọ́ sù phẹ: “Ọ́o iphe, unu sùkpọ́erupho gẹ́ mu meeru unu bẹ́ mu e-meru unu.”

⁵ Ọ́o ya bụ; ẹ́phe sù eze: “Ọ́o nwoke ono, bụ́ iya gbushiru anyi ono; bya achị́pyaa g'ee-shi g'e gbushigbua anyi; g'anyi ta aphọ́duhe l'alì Ízurẹ́lu l'ọ́phu ono; ⁶bẹ́ ee-duta ụ́nwegirima iya unwoke ẹ́saa dufutaru anyi g'anyi je megbushia l'iphu Chipfu lẹ́ Gibiya, bụ́ mkpụ́kpu Sọ́lu, bụ́ onye ono, Chipfu họtaru ono.”

Ọ́o ya bụ; eze bya asù phẹ: “Mu e-duta phẹ́ nù unu.”

⁷ Obenu l'eze, bụ́ Dévidi gude k'ọ́gbandzu yẹ́le Jionatanu, bụ́ nwa Sọ́lu nọ́ l'iphu Chipfu gbaa dobe Mefiboshẹ́ti ndzù. Mefiboshẹ́ti bụ́ nwa Jionatanu; bya abụ́ru nwanwa Sọ́lu. ⁸ Ọ́ bụ́ru Amoni waa Mefiboshẹ́ti, bụ́ unwoke labọ́, Rizupa, bụ́ nwada Aya nwutaru Sọ́lu bẹ́ ọ́ kpuru nù phẹ́. Ọ́ kpụtakwapho unwoke ise, nwada Sọ́lu, bụ́ Merabu nwutaru nù phẹ́. Ẹ́pha ji nwanyị́ ono bẹ́ bụ́ Adurelu nwa Bazilayi, bụ́ onye shi mkpụ́kpu Mehola. ⁹ Dévidi kpuru phẹ́ nù ndu Gibiyọnu ono; ẹ́phe je megbushia phẹ́ l'eli úbvú l'iphu Chipfu. Ẹ́phe n'ẹ́saa ono lakọ́ta l'ugbo lanù. Ọ́ bụ́ru mbọ́ku mbụ́ lẹ́ teke aawatajẹ́ akpata iphe, e meberu l'alì; mbụ́kpọ́ephe lẹ́ teke aabya awata egbu balì bẹ́ e gbushiru phẹ́.

¹⁰ Noo ya; Rizupa, bụ́ nwada Aya je achị́ta uwe-aphụ́ phụ́shi l'eli oke mkpuma; zẹ́e. Nwanyị́ ono shi lẹ́ teke aawatajẹ́ akpata iphe, e meberu l'alì; nọ́du l'ẹ́ka ono swiru odzu ụ́nwu iya ono jeye mini, shi l'igwe dzeru kpua phẹ́. Ọ́phu o to kwejeduru g'ọ́ dọ́ru ẹ́nu, ephe l'eli, a-bya ebvua odzu phẹ́ ọ́nu l'eswe; ọ́zoo anụ́-ẹ́gbudu a-byapfuta phẹ́ l'ẹ́nyashi.

¹¹ E pfuẹrupho Dévidi iphe, nwada Aya ono, bu Rizupa meru; mbu nwan yi ono, Sọlu ta ludu ọkpobe alulu ono; ¹² ọ tughua je achita ọkpu Sọlu yee ke nwa iya, bu Jionatanu l'eka ndu mkpukpu Jiabeshi-Giladu wushiru iya. Ndu Jiabeshi jeru le mpya je achita iya l'eze edupfu, no le mkpukpu Betu-Shanu l'eka ndu Filisitayinu gburu phe woru kobe l'eli ubvu Gilubowa. ¹³ Dévidi tuko ọkpu Sọlu me ke nwa iya, bu Jionatanu g'ọ ha chilata e-shi l'eka ono; mekpoo ke ndu ophu e megbushiru emegbushi. ¹⁴ E mechaa; ephe woru ọkpu Sọlu yele ke nwa iya, bu Jionatanu je elia le mkpukpu Zela, no l'ali ndu Benjiaminu l'ilu Kishi, bu nna Sọlu. Ephe tuko iphe, eze karu phe g'ephe mee; mekota. E mechaa; Chileke meeru phe iphe, ephe rworu iya l'opfu ehu ali ono.

Ogu ozo, ndu Izurelu waa ndu Filisitayinu no lwugbabe

(Iphe 20:4-8)

¹⁵ A nonyakwaa ozo; ugu daru ndu Filisitayinu waa ndu Izurelu. Dévidi tughua yee ndu ojogu iya jeshia etso ndu Filisitayinu ugu. A nonyaa; ophu ike aduedu Dévidi. ¹⁶ Ishibibenobu, bu onye lanu l'eri Rafa rja l'owoa ge ya gbua Dévidi. Nwoke ono be erwa arwa iya du shekelu onyirubvu ukporo iri l'ise. Teme o turu ugu-echi ophu. ¹⁷ Ole Abishayi nwa Zeruya be byaru agbataru Dévidi; bya echitsua onye Filisitayinu ono; woru iya gbua. Oo ya bu; ndu ojogu Dévidi ribuaru iya angu su l'ọ to byadu etsobaa phe je ugu ozo k'ophu a taa tsonyidu oroku ndu Izurelu.

¹⁸ Tobudu iya bu; e mechaa; ugu ozo daaru ephe le ndu Filisitayinu le mkpukpu Gobu. O buru teke ono be Sibekayi, bu onye mkpukpu Husha gburu Safu, bu onye lanu l'eri Rafa.

¹⁹ Oḡu ọzo bya adaaru ẹphe ẹ ndu Filisitayinu ẹ mkpukpu Gobu. Ẹluhananu nwa Jiayi, bu onye mkpukpu Bẹtulehemu gbua Lahumi, bu nwune Golayatu, bu onye Gatu; mbu onye ono, igbidigbi arwa, o gude du ge k'oshi, onye ekweje ẹkwa egudeje ekwe ẹkwa.

²⁰ Oḡu ọzo bya adaa ẹ mkpukpu Gatu. L'eka ono be o nweru nwoke lanu, haepho ke kpikpirikpii. O fuchaaru mkpushi-eka ishii ishii l'eka iya ẹphenebo; waa mkpushi-okpa ishii ishii l'okpa iya ẹphenebo. Mkpushi-eka iya; me k'okpa iya tukoru du ukporo l'eno. Nwoke ono bukwapho eri Rafa. ²¹Nwoke ono bya awataepho akọ ndu Izurelu onu; nwa nwune Dévidi, bu Jionatanu nwa Shimeya woru iya gbua.

²² Ndu ono ẹphen'eno shikota l'eri Rafa, bu onye mkpukpu Gatu. O buru l'eka Dévidi yele ndu-ozu iya be ẹphe shikota nwushihu.

22

Ebvu ajaja, Dévidi guru

(Ebvu 18:1-50)

¹ Dévidi guru ebvu-a nu Chipfu ẹ mboku, Chipfu nafutakotaru iya l'eka ndu ohogu iya l'ophu; kekele ke solu.

² O guru su:

Oo Chipfu bu agbara-mkpuma nkemu;

bya aburu ulo-ezeru-ndzu mu; buru onye agbafutaje mu nu.

³ Oo Chileke mu bu agbara-mkpuma, mu agbabaje je edomia onwomu.

Oo ya egbobutaje mu g'o to du iphe, e-me mu nu.

O buru iya bu onye eegudeje okpehu iya dzo mu.

Oo l'ime iya be mu agbabaje je anodu zeeru ndzu.

Te me o buru iya bu onye ndzota mu;

- ọo yẹbedua adzoje mu l'ẹka ndu eme mu mkpawere.
 4 Ọo Chipfu ono, bụ onye gbaru g'a jajẹ iya ajaja ono bẹ
 mu arakuje;
 l'ọ dzọta mu l'ẹka ndu ọhogu mu.
 5 Anwụhu shiwaa chie mu ẹgbirigba l'olu.
 Ọla-l'iswi nọdu asọ gborogboro gẹ mini asọ-pfuta mu.
 6 Ẹkpa oyi alị-maa nwụa mu kpalaa.
 Anwụhu shiwaa woru ọnyà gbabẹru mu.
 7 Ọle teke mu eje iphe-ẹhuka bẹ mu rakuru Chipfu.
 Mu rakuru Chileke mu.
 Ọ gbẹ l'eze-ulo iya nụma olu mu;
 mkpu, mu chiru chiku iya rwua ya nchị.
 8 Noo ya bụ; eliphe l'ophu tehu kparịkpari; nmakọta
 jiiijiji.
 Ẹka a tūru ọkpa imigwe l'ophu nmaghukọta anmaghu;
 kẹle Chileke bẹ ẹhu eghu eghu.
 9 Ẹnwuru ọku, shi iya l'imi akpụ kẹ tūtutuutu.
 Ọku, shi iya l'ọnu afushi tukoepho iphemiphe ekepyashi.
 Icheku-ọku iphe, o kepyashiru tuko ẹkameka ata
 pfupfupfu.
 10 Ọ dojaha akpaminigwe kẹ tararara; ọ bụru iya alufuta.
 Ọchii, gbahuru kẹ tsukiribaa nọdu iya lẹ mkpula ọkpa.
 11 Ọ nọdu l'eli chierobu phezeta.
 Ọ bụru lẹ nkù pherephere bẹ o degeru ezi phuphupu.
 12 O woru ọchii kpuchia onwiya;
 mbụ l'urwukpu, mini jiru ejiji bẹ nọ-pheru iya
 mgburugburu.
 13 Icheku-ọku, ata pfupfupfu
 shi l'ogbunwịnwii ya agushihugba.
 14 No iya; Chipfu gbẹ l'akpaminigwe tūa egbigwe.
 A nūma olu onye ono, bụ Ọkalibe-kakọta-shii ono.
 15 Ọ gbaa apfụ gude chikaa ndu ọhogu iya.
 Ebemu-igwe bẹ ọ kuru kẹ phoo;

ẹ̀phe zẹ̀kota l'ọ̀so gbalachaa.

¹⁶ Chipfu ziru unme fuu gbọ̀oru ndu ọ̀hogu iya Ụ́ja.

Eze Ẹ̀nyimu sọ̀kahu ẹ̀bo; k'ọ̀phu a hụ́machaaru ọ̀hu-
ẹ̀nyimu l'ẹ̀nya;

kpuhachaa ẹ̀ka a tũru ọ̀kpa-alì mgboko; a hụ́ma.

¹⁷ Chipfu gbẹ̀ l'imigwe tũfu ẹ̀ka;

zũ mu gburumu; gũfuta mu l'ogbu-mini.

¹⁸ Ọ̀ nafũtakwaru mu phọ̀ l'ẹ̀ka ndu ọ̀hogu mu, ọ̀kphehu
dũ;

mẹ̀ l'ẹ̀ka iphe, bũkpoo ndu mu dũ ashì;

noo kẹ̀le ẹ̀phe kariru mu ẹ̀ka.

¹⁹ Mbọ̀ku ono, mu eje iphe-ẹ̀huka ono bẹ̀ ẹ̀phe tsoru mu
ọ̀gu;

obenu l'ọ̀o Chipfu gbatarũ mu ike.

²⁰ Ọ̀o yẹ̀bedua kutaru mu dobe l'ẹ̀ka mu nọ̀ tũsaru ẹ̀hu.

Ọ̀ yeru mu ẹ̀ka nafũta mu l'ọ̀gu; kẹ̀le mu dũ iya l'obu.

²¹ Chipfu buru mu nggo; kẹ̀le mu bũ onye pfũberekoto;

mbũ kẹ̀le mu bũ onye iswi dũ mma.

²² Noo kẹ̀le ọ̀ bũepho ụ́zo, Chipfu tọ̀ru bẹ̀ mu anọ̀duje
etso.

Ọ̀phu mu egudejedu eme ẹ̀jo-iphe gbakũta Chileke azũ.

²³ Ekemu Chipfu bẹ̀ mu nwũbekotaru ẹ̀nya g'ọ̀ ha.

Tẹ̀me ọ̀phu mu aghajẹ̀duru iphe, ọ̀ sũru g'e meje oko-
tazũ.

²⁴ Ọ̀ tọ̀ dũkpodaa ẹ̀ka ụ́ta dũ mu l'ẹ̀hu l'atatiphu iya.

Mu sedekpọ̀erupho onwomu; ọ̀phu ọ̀ dũdu ẹ̀jo-iphe, mu
yejeru ẹ̀ka.

²⁵ Chipfu buru mu nggo; kẹ̀le mu bũ onye pfũberekoto;

mbũ l'o buru mu nggo; kẹ̀le mu bũ onye iswi dũ
mma l'iphu iya.

²⁶ Ndu yeru ngu obu bẹ̀ iigoshije l'i yeru obu.

Ndu dũebe ree bẹ̀ ìiduebejeru ree.

²⁷ Ndu obu phẹ̀ gũru ìphóró bẹ̀ iidobejeru obu ìphóró.

I nọdu emejeru ndu doberu ọzo phẹ nggọdogo
nggọdogo g'umere phẹ gbaru.

²⁸ Ndu wozeru onwophẹ alị bẹ ịidzotaje;
obenu l'ẹnya ngu aduje l'ẹka ndu eku onwophẹ nọ
g'i wozeta phẹ alị.

²⁹ Ọo gụbedua, bụ Chipfu bụ orọku mu.

Ọo gụbe Chipfu emeje g'ìphóró duru mu l'ẹka ọchii agba.

³⁰ Eshinu iyeru mu ẹka bẹ mu e-tso ikpoto ndu ojọgu
Ọgu.

Igbulo mkpukpu phẹ bẹ mu e-nyi; eshinu mu lẹ Chileke
swị.

³¹ Ụzo Chileke bẹ ntucha adudu m'ilile;
opfu Chipfu bukota ọkpobe opfu.

Oogbobutaje ndu gbabarụ l'ime iya je anọdu ezeru ndzụ.

³² ?Bụ onye bụbaa Ọkalibe, dū nū, abudu Chipfu
kpoloko?

?Bụ onye buba agbara-mkpuma, abudu Chileke anyi?

³³ Ọo Chileke emeje g'ike dū mu.

Ọ bụru iya meru ọzo mu; ọphu ntucha adudu iya.

³⁴ Oomeje gẹ mu pfu shọshoo gẹ mgbada;
mbụ l'oomeje gẹ mu pfuru pfushia ike l'eli úbvú.

³⁵ Ọ ziru mu; mu maru g'aalwuje ọgu;
k'ọphu bụ l'ọ tọ dudu m'obeta ọ bụru apfu, e
kweru l'igwe; mu aduele-a ike gbaa ya.

³⁶ Ọo gụbe Chipfu egbobutaje mu; shi egube ono dzọo
mu ndzụ.

Ẹka iyeru mu ekutseje mu.

³⁷ I mesataru ọzo mu ọsa; g'ọkpa te echiswafu mu.

³⁸ Mu gude ọso chĩa ndu ọhogu mu; gwee phẹ arakabya;
ọphu mu anmaduru nggu; jasụ mu mee phẹ; ẹphe
bụru mkpurupyata.

³⁹ Mu chiru phẹ pyakapyaka; k'ọphu ẹphe ta aduedu ike
gbelibaa ishi ọzo.

Ẹ̀phe zẹ̀gbaepho kẹ́ manyọ́o lẹ́ mgboru ọ̀kpa mu.

⁴⁰ Ọ́o ike nkengu bẹ́ mu gude eje ọ́gu.

Ndu etso mu opfu bẹ́ i meru; ẹ̀phe gbushiru mu ikpere.

⁴¹ Ndu ọ́hogu mu bẹ́ i meru; ẹ̀phe chie ọ̀kpa l'ọ́so.

I mee; mu tṹko ndu mu dọ́ ashì gbushikọ́ta.

⁴² Ẹ̀phe chia mkpu; ọ́phu ọ́ dọ́du onye gbaru phẹ́ mkpu.

Ẹ̀phe raku Chipfu; ọ́phu o yeduru phẹ́ ọ́nu.

⁴³ Mu gweru phẹ́ uji mee phẹ́; ẹ̀phe dọ́ g'urwuku, dọ́ l'ali.

Mu tsuá phẹ́ ọ́tsuepfu; zọ́o phẹ́ tọ́litoli g'ẹ̀puchi, nọ́ lẹ́ gbororo.

⁴⁴ I nafutaru mu l'ẹ́ka ndu etso mu opfu;

bya emee mu; mu búru ishi ọ́hamoha;

k'ọ́phu ndu mu eshidu maru byaru alwakọ́ta mu l'ẹ́ka.

⁴⁵ Ndu ọ́hozo ephozekọ́taru mu.

Ẹ̀phe -nụ́ma l'ọ́wa-a iphe, mu sọ́ru g'e mee baa; ẹ̀phe emee ya ẹ́gwegwa.

⁴⁶ Meji tọ́fukota iphe, bú ndu ọ́hozo ono;

tẹ́me ẹ̀phe nọ́du eshijegbaa l'ẹ́ka ẹ̀phe shi wohaa onwophẹ́ phuru yẹ́yeye byapfuta mu.

⁴⁷ Chipfu nọ́kwa ndu; unu tua agbara-mkpuma nkemu ono ẹ́pha!

Unu kutsee Chileke; l'ọ́o ya bú onye adzọ́je mu nù!

⁴⁸ Ọ́o Chileke ejeje agwata ọ́gwọ́ iphe, ndu ọ́hogu mu meru mu.

O meru; unwu-eliphe nọ́du mu lẹ́ mkpula.

⁴⁹ Ọ́nafutaje mu l'ẹ́ka ndu ọ́hogu mu;

oowolije mu eli woru mu doghaa ndu etso mu opfu.

Ọ́gbafutaje mu l'ẹ́ka ndu emeje nemadzọ́ iphe-kpangangaa.

⁵⁰ Noo g'o gude mu je a-pfuru l'iphu ọ́hamoha kele gube Chipfu ekele.

Mu a-gu ebvu gude tua ngu epha.

⁵¹ Onye eze, o họtaru be oomeje g'o mekpee l'ogu.

N-yemobu iya be onoduje egoshi onye o wuru manu
l'ishi,
bu Dévidi yee oshilokpa iya jasụ le tuutuutuu le
mimiimii.

23

Opfu ikpazu, Dévidi pfuru

¹ Owaa bu opfu ikpazu Dévidi:

“Owaa bu iphe, Dévidi; nwa Jiesi pfuru;
mbu opfu nwoke ono, Chileke woliru eli;
mbu nwoke ono, Chileke ke Jiekopu wuru manu
l'ishi g'o buru eze ono;
mbu onye ono, agujeru ndu Izuru ebvu, atso utso
ono.

² Unme Chipfu be shi l'onu mu epfu opfu.

Opfu iya degeru mu edegeru l'ire.

³ Chileke ke Izuru be pfuwaru opfu.

Oke mkpuma ke ndu Izuru be suru mu le-a:

‘Teke eze eme iphe, pfuru oto;

mbu teke oome atsu Chileke ebvu

⁴ be oduje g'iphoro nchi-abohu le teke enyanwu
awa awawa;

mbu le mboku igwe du korokoro.

Oduje g'anwu, emeje g'eswa, akpo-futa akpo-futa l'ali
sha ke biribiri

me mini dzegheepho.’

⁵ Oo egube ono be ndibe mu ephe le Chileke du le ree.

Noo kele o meru; mu l'iya gbaa ndu, a-no jasụ l'ojeje.

O meru iya o nguru anguru l'iphemiphe;

bya emee ya g'o to du iphe, e-mebyi iya nu.

Chileke e-me ge ndota mu dzua oke;

tẹme iphemiphe, agụ mu nụ bẹ oo-meru mu.

⁶ Obenu lẹ ndu bụ ọgalemkpa bẹ ee-tuphachaa etupha g'onye tupharu obvu; kẹle e te egudejedu ẹka achita phẹ.

⁷ Onye edenyi ẹka l'obvu ono gudefuta je iphe-ígwè ọzoo oshi arwa; ọ bụru ọku bẹ aakpọkotaje iya l'ẹka ọ wushiru.”

Ndu a maru amaru lẹ ndu ojogu Dévidi (1Iphe 11:10-19)

⁸ Waa ẹpha ndu ojogu, ike kakota lẹ ndu ojogu Dévidi baa: Ishubelu onye Hakumonu. Oo ya shi bụru onye-ishi umadzu ẹto, kachakpọo mkparawa. O gudeje arwa jepfu unu umadzu labo ọgu; gbushikota phẹ l'ugbo lanu.

⁹ Onye ọphu etsota iya nụ bụ Eleyaza nwa Dodo; onye shi l'eri Ahowa. Yẹbedua yikwapho l'umadzu ẹto ono, kachakpọo mkparawa ono. O tso Dévidi pfubiyishia ndu Filisitayinu lẹ teke ẹphe dzukọberu k'ogu lẹ Pasu-Damimu. Ndu Ízurelu tsulaaharu azu; ¹⁰ yẹbedua pfushiepho ike gbua ndu Filisitayinu jasuru ẹka tsushihu iya mee; mbu ẹka kwekọbechaa ya ekwekọbe nyakuru l'ogu-echi, ọ pa. Chipfu mee; ọ lwu-kpee k'ọphu paru ẹka apaa lẹ mboku ono. E mechaa; ndu ọphu wu-phu azu. O bwaru iphe, ẹphe wu-phudoru azu bụ g'ẹphe gwee ivu ndu e gbushiru egbushi.

¹¹ Onye k'ẹto, etsota iya nụ bẹ bu Shama nwa Agee; onye Hararu. Ujiku lanu bẹ ndu Filisitayinu kpakọdzujeru onwophẹ k'ogu lẹ Lehi; mbu l'egu, azamu jiru ejiji ono. Ndu ojogu ndu Ízurelu yekota ọkpa l'oso gbalachaa. ¹² Obenu lẹ Shama pfushierupho ike l'echilabo ẹgu ono; tsoo ndu Filisitayinu ọgu; gbushia phẹ. Chipfu mee; ọ lwu-kpee k'ọphu paru ẹka apaa.

¹³ O be lẹ teke akpata iphe l'ali; ụmadzu ẹto l'ime ụkporo ụmadzu l'ụmadzu iri, bụgbaa ndu-ishi ọgu wuru jepfu Dévidi l'ọgba Adulamu. Teke ono bẹ ikpoto ndu Filisitayinu wufutaru bya adọru lẹ nsuda Refayimu. ¹⁴ Teke ono bẹ Dévidi nọ l'ime ẹka ọ kpuru; o shihu ike. Ndu ojogu ndu Filisitayinu dọru lẹ mkpukpu Bẹtulehemu. ¹⁵ Ẹgu-mini wata agushi Dévidi ike; ọ sụ: “Oowa-e; ọ dụ mu g'a sụ l'o nweru onye gbẹ je ekutaru mu mini lẹ wẹlu, nọ-kube ẹka eeshije abahụ lẹ Bẹtulehemu gẹ mu ngụ!” ¹⁶ Ọo ya bụ; unwoke ẹto ono, kachakpọo mkparawa ono kpata ụzo ghata ndu ojogu ndu Filisitayinu l'ẹka ẹphe dọru ono; je ekuta mini lẹ wẹlu ono, nọ-kube l'ẹka ono, eeshije abahụ lẹ Bẹtulehemu ono; wotaru Dévidi. Ọle Dévidi te ekwedu ngụa mini ono; o woru iya wushiaru Chipfu; ¹⁷ bya asụ: “Tụswekwa! Jiko Chipfu; te ekwekwa gẹ mu mee ẹgube iphe ọwa-a. ?Mini-a ta adụada ụdudu gẹ mee ndu-a, woru ndzụ phẹ tsebe l'ọnu ẹta g'ee-shi g'e kuta iya-a tọo?” Ọo ya bụ; ọphu ọ ngụduru mini ono. Nochaa eze iphe, unwoke ẹto ono, kachakpọo mkparawa ono megbabẹru bụ ono.

¹⁸ Abishayi, bụ nwune Jiowabu nwa Zeruya bụ onye-ishi ụmadzu ẹto ono. Abishayi bẹ gudeje arwa iya jepfu ụmadzu ụkporo iri l'ise ọgu; gbushikọta phẹ; e shiwarọ nno; a maru ẹpha iya gẹ k'ụmadzu ẹto ono. ¹⁹ Ọo yẹbedua bẹ a kachaa akwabẹ ụbvù l'ime ụmadzu ẹto ono. Ọ bụru yẹbedua bụ onye-ishi phẹ; ọle a ta gụkwanuru iya ye l'ụmadzu ẹto ono.

²⁰ Benaya nwa Jiehoyada bụ onye ọkpehu dụ shii. Ẹka o shi bụ Kabuzelu. Yẹbedua mekwarupho eze iphe, parụ ẹka apaa. Ọo yẹbedua gburu unwoke Mówabu labọ ono, ọkpehu dụ-be g'oduma ono. Ọ bụkwaru iya phọ jejeru egbuga oduma l'ime nsụ lẹ mbọku, akamini, kpukoru akpuko dashiru. ²¹ Benaya gbujekwarupho oke

mkparawa onye Ijiputu, pa arwa. Iphe, yẹ̀bedua gude bapfu iya bụ mgbọ̀ro; bya anata nwoke Ijiputu ono arwa, o gude l'ẹ̀ka; gude nmagbua ya. ²² Noo gẹ Benaya nwa Jiehojada meberu ike bụ ono. E shiwarọ nno; a maru ẹ̀pha iya gẹ k'ụmadzu ẹto phọ, kachakpọo mkparawa phọ. ²³ Ọ bụ onye a kwatakpọo akwabẹ ùbvù l'ime ụkporo ụmadzu l'ụmadzu iri phọ. Ọle a ta gukoboduru iya l'ime ụmadzu ẹto phọ. Dévidi meru iya onye-ishi lẹ ndu ojọgu, eche iya nche.

²⁴ Asahẹlu, bụ nwune Jiowabu yi l'ime ụkporo ụmadzu l'ụmadzu iri ono. Ndu ọzo bụ Ełuhananu nwa Dodo kẹ Bẹtulehemu; ²⁵ waa Shama kẹ Harọdu; waa Elika kẹ Harọdu; ²⁶ waa Hẹlezu kẹ Pẹleti; waa Ira nwa Ikeshi kẹ Tekowa; ²⁷ waa Abiyeza kẹ Anatọtụ; waa Mebunayi kẹ Husha; ²⁸ waa Zalụmonu, bụ onye shi l'eri Ahowa; waa Maharayi kẹ Netofa; ²⁹ waa Helebu nwa Bana kẹ Netofa; waa Itayi nwa Ribayi kẹ Gibiya, dụ l'alì ndu Benjaminu; ³⁰ waa Benaya kẹ Piratọnu; waa Hidayi, shi l'ụzo nggele Gashì; ³¹ waa Abiyalụbonu kẹ nsụda Jiọdanu; waa Azụmavetu kẹ Bahurimu; ³² waa Elyahuba kẹ Shalụbonu; waa ụnwu Jiashẹnu; waa Jionatanu; ³³ waa Shama kẹ Hararu; waa Ahayamu nwa Shararu kẹ Hararu; ³⁴ waa Elifẹletu nwa Ahasụbaya kẹ Maka; waa Eliyamu nwa Ahitofẹlu kẹ Gilo; ³⁵ waa Hezuro kẹ Kamẹlu; waa Parayi kẹ Arabu; ³⁶ waa Igalu; nwa Nétanu kẹ Zoba; waa Bani; onye ipfu Gadu; ³⁷ waa Zeleku, bụ onye Amọnu; waa Naharayi kẹ Berotu, bụ onye achijeru Jiowabu nwa Zeruya ngwọgu; ³⁸ waa Ira kẹ Itiru; waa Garebu kẹ Itiru kwaphọ; ³⁹ mẹfua Uráya, bụ onye Hetu. Epehe tukuru dụ ụkporo ụmadzu l'ụmadzu iri l'ẹsaa.

24

Dévidi agụ ndu Ízurẹ̀lu ọgu
(1Iphe 21:1-6)

¹ Tọ̀budu iya bụ; Chipfu vọru ọku wụa ẹhu l'opfu ẹhu ndu Ízurẹ̀lu. Ọ kpalia Dévidi g'o mee g'iphe-ẹhuka dapfuta phẹ; bya asụ iya: “Tugbua je agụa ndu Ízurẹ̀lu waa ndu Jiuda ọgu.” ² Ọo ya bụ; eze, bụ Dévidi zia Jiowabu; mẹ ndu-ishi ndu ojọgu, ẹphe l'iya nọ sụ: “Unu jegbabẹkota ipfu, dukota lẹ Ízurẹ̀lu; e -shi lẹ mkpụkpu Danu je akpaa lẹ mkpụkpu Biye-Sheba gụkota phẹ ọgu k'ọphu mu a-maru g'ẹphe ha.”

³ Jiowabu sụ: “Gẹ Chipfu, bụ Chileke ngu mekwaa gẹ ndu ono kabaa igwerigwe ugbo ụkporo ise eme lẹ g'ẹphe ha nta-a; tẹme gẹ gube nnajịuphu mu, bụ eze gudekwaphọ ẹnya ngu hụma iya. Ọle ?bukwanu kẹ gụnu meru g'o gude gube nnajịuphu mu, bụ eze nọdu eme g'i mee ẹgube iphe ono?” ⁴ E mechaa; opfu eze dagbunaa kẹ Jiowabu; yẹle kẹ ndu-ishi ndu ojọgu iya ono. Ọo ya bụ; Jiowabu waa ndu-ishi ndu ojọgu ono shi l'iphu eze tugbua jeshia agụ ndu Ízurẹ̀lu ọgu ono. ⁵ Ẹphe bya adaẹpho ẹnyimu Jiọdanu; ẹphe dọshia lẹ mgboru mkpụkpu Arowa; mbụ l'ụzo ndọhali mkpụkpu, nọ l'echilabọ nsụda; bya agbẹ l'ẹka ono jeshia l'alị ndu Gadu jerwuchaa mkpụkpu Jiaza. ⁶ Ẹphe bya abahụ l'alị Giladu; mẹ mkpụkpu Tatimu-Hodushi. Ẹphe gbẹ l'ẹka ono bahụ lẹ mkpụkpu Danu-Jianu; bya agbajia lufu jeshia mkpụkpu Sayidonu. ⁷ Ẹphe bya eshi nno chebewarọ mkpụkpu ndu Taya, a kpụshiru ike; jekọta mkpụkpu, dukota l'alị ndu Hevu yẹle ndu Kėnanu. Ẹphe mechaa kpọ-chia ya ishi lẹ mkpụkpu Biye-Sheba, nọ l'echiẹgu ndọhali l'alị ndu Jiuda. ⁸ Ẹphe jeru iya ọnwa tete l'ujiku ụkporo tẹme ẹphe lwaphuta azụ lẹ Jierúsalemụ.

⁹ Jiowabu bya akọ́oru eze, bú Dévidi gẹ́ ndu ono, ọ́ gúru ọ́gu ono hakọ́takpoo. Ndu Ízurẹ̀lu dù ụ́kporo ụ́nu unwoke ugbo ụ́kporo ise,* bú ndu ike dù l'ọ́gu; bya abụru ndu adụ́je ike paa ọ́gu-echi. Ndu Jiuda dù ụ́kporo ụ́nu unwoke ugbo ụ́kporo ẹ́to l'ụ́nu unwoke ugbo ụ́kporo labọ́ l'iri.†

¹⁰ Dévidi gụ́chaepfo ndu ono ọ́gu ono; meji tsukaha iya. Ọ́o ya bu; ọ́ sụ́ Chipfu: “Mu meakwaru iphe-ẹ́ji, parụ́ ẹ́ka lẹ́ k'iphe-a, mu meru-a. Ọ́le-a; jiko Chipfu; wofunu ẹ́jo-iphe ono, mụ́be onye-ozí ngu meru ono; kẹ́le ọ́o eswe bẹ́ mu meru ono.”

¹¹ Dévidi bya etehushia lẹ́ nchitabọ́hu iya; Chipfu pfuwaru Gadu, bú onye mpfuchiru Chileke; mbụ́ onye aphụ́jeru Dévidi ọ́phulenyá sụ́ iya: ¹² “Je asụ́ Dévidi lẹ́ Chipfu sụ́ru-a: Uzi iphe ẹ́to bẹ́ mu doberu ngu; g'ì hata nanụ́, mu e-me ngu.”

¹³ Ọ́o ya bú; Gadu jepfu Dévidi je asụ́ iya: “?Bú g'ẹ́jo ọ́kpa-nri byapfuta ngu nọ́o apha ẹ́to l'alì-a? Tọ́o ?bụ́ g'ì gbaa ọ́so ọ́nwa ẹ́to l'ẹ́ka ndu ọ́hogu ngu achì ngu? Tọ́o ?bụ́ g'ẹ́jo iphe-ememe bya emee nọ́o ujiku ẹ́to l'alì ngu? Nta-a búkwa g'ì rị́a ya arìri karụ́ mu; gẹ́ mu maru iphe, mu e-je epfuaru onye ono, ziru mu nụ́ ono.”

¹⁴ Dévidi bya asụ́ Gadu: “Mu nọ́akwa l'oke iphe-ẹ́huka. Ọ́le ọ́ kakwa ree g'anyi daba l'ẹ́ka Chipfu; eme l'anyi dabarụ́ nemadzụ́ l'ẹ́ka; noo kẹ́le obu-imemini Chipfu parụ́ ẹ́ka apaa.”

¹⁵ Ọ́o ya bú; Chipfu lọ́ru ẹ́jo iphe-ememe tụ́ ndu Ízurẹ̀lu shita l'ùtsu mbọ́ku ono jeye mbọ́ku, ọ́ tụ́-buru phẹ́. E -shi lẹ́ Danu jasụ́ lẹ́ Biye-Sheba bẹ́ ẹ́phe dù ụ́kporo ụ́nu nemadzụ́ ugbo ẹ́sato l'ụ́nu iri l'ise

* ^{24:9 24:9} Bụ́ iya bú 800,000, lẹ́ mbekee. † ^{24:9 24:9} Bụ́ iya bú 500,000, lẹ́ mbekee.

nwùshihu. ¹⁶ Ojozi-imigwe ono machiẹpho ẹka gẹ ya mebyishia mkpụkpu Jierúsalem; o rwua Chipfu l'ẹhu; mbụ ẹjo-iphe ono, dapfuru phẹ nụ ono. O pfuaru ojozi-imigwe ono, egbushi ndu ono sụ iya: “Ọ dūwaa ree! Sephu ẹka ngu azụ parụ phẹ haa!” Teke ono bẹ ojozi Chipfu ono nọwaa l'oma ẹka Arawuna, bụ onye Jiebusu anọduje echishi ẹswa lẹ balị iya.

¹⁷ Dévidi hụmaepho g'ojosi-imigwe ono gude echit-sushi ndu ono; ọ sụ Chipfu: “Oowa-e; ọ kwa mbẹdua meru iphe-ẹji; mbụ l'ọo mbẹdua bẹ meru iphe, adudu ree. ?Ụnwu aturu-a mehunuru ole? G'ọ bụ-chiaru mbẹdua waa ndibe nna mu bẹ ịi-da ẹjo ẹka l'ẹhu!”

¹⁸ Ọ bụru mbọku ono bẹ Gadu byaru abyapfuta Dévidi bya asụ iya: “Tugbua je akpụaru Chipfu ọru-ngweja l'oma ẹka ono, Arawuna, bụ onye Jiebusu anọduje echishi ẹswa lẹ balị ono.” ¹⁹ Ọo ya bụ; Dévidi tugbua jeshia eme ẹgube ono, Chipfu shi l'ọnu Gadu zia ya ono. ²⁰ Arawuna tufuepho ẹnya hụma eze, bụ Dévidi yẹle ndu-ozì iya g'ẹphe eje abyapfuta iya; o je je adaa kpurumu l'atatiphu eze phozeta kwabẹ iya ùbvù. ²¹ Arawuna sụ: “?Bụkwa ole bẹ nnajìuphu mu, bụ eze byapfutashìaru onye-ozì iya?”

Dévidi sụ iya: “Mu byaru gẹ mu zua ngu ẹka iichishije balị gẹ mu kpụaru Chipfu ọru-ngweja; k'ọphu ẹjo iphe-ememe-a, emenua e-buhu.”

²² Arawuna sụ Dévidi: “Gẹ gube nnajìuphu mu, bụ eze wotakpọepho iphe, dū ngu ree gude gwee ngweja ọbu. Waa eswi, ee-gude gwee ngweja-akpọ-ọku nụ Chipfu; waa iphe, eegudeje echishi ẹswa l'ereshi; mẹ odogoro, eegudeje tugbabe eswi g'ọ bụru nkụ. ²³ Gube eze; iphemiphe ono g'ọ ha bụ mụbe Arawuna nūru ngu iya.” Arawuna bya asụkwa iya phọ: “Gẹ Chipfu, bụ Chileke ngu natakwarọ ngweja ngu.”

²⁴ Eze, bŭ Dévidi sŭ Arawuna: “Waawakwa; mu a-pfŭ ngu ũgwo iya. Mu te egudedu iphe, adŭdu iphe, o phuru mu egweru Chipfu, bŭ Chileke mu ngweja-akpŭ-ŭku.” Oo ya bŭ; Dévidi zŭa ōma ęka aanŭduje echishi ęswa lę balŭ ono azŭzu; mę eswi ono. O bŭru mkpŭla-ŭchaa, ęrwa iya dŭ ŭkporo shękelu labŭ lę shękelu iri bę o gude zŭa ya. ²⁵ Dévidi bya akpŭaru Chipfu ōru-ngweja l'ęka ono; bya egwee ngweja-akpŭ-ŭku; mę ngweja-ęhu-guu l'eli iya. Chipfu nŭma arwŭrwo, ŭ rwŭru iya l'opfu ęhu alŭ Ízuręlu ono; ęjo iphe-ememe ono, eme nŭ ono mebuhu.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d